

**SIXTH LEGISLATIVE ASSEMBLY OF MIZORAM  
( EIGHTH SESSION )**

**LIST OF BUSINESS**

**FOR FIRST SITTING ON TUESDAY, THE 7<sup>th</sup> JULY, 2011  
( Time 10:30 AM to 1:00 PM and 2:00 PM to 4:00 PM )**

**OBITUARY**

1. **PU LAL THANHAWLA**, Hon'ble Chief Minister to make references on the demise of the following dignitaries :
  - 1) Pu H. Lalsangzuala, former Member of Mizoram Legislative Assembly.
  - 2) Pu H. Hrangdawla, former Member of Legislative Assembly of Mizoram.
  - 3) Shree Dorjee Khandu, former Chief Minister of Arunachal Pradesh Legislative Assembly.

**QUESTIONS**

2. **QUESTIONS** entered in separate list to be asked and oral answers given.

**LAYING OF PAPERS**

3. **Pu H. LIANSILOVA**, Minister to lay on the Table of the House a copy each of the following Rules :
  - 1) The Mizoram Finance Commission (Salaries and Allowances) Rules, 2010.
  - 2) The Mizoram Money Lenders and Accredited Loan Providers (Regulations) Rules, 2010.
  - 3) The Mizoram Public Servants Personal Liability Rules, 2011.

**PRESENTATION OF REPORTS**

4. **Pu R. ROMAWIA**, Hon'ble Speaker to report to the House the time table as chalked out by the Business Advisory Committee for the current Session

**MOTION FOR ELECTIONS TO FINANCIAL COMMITTEES**

5. **Pu LALSAWTA**, Minister to move for Election to Financial Committees in the following form :

“That the members of this House do proceed to elect in the manner required by sub-rule 1 of Rule 202 read with Rules 250, 252 and 254 of the Rules of

Procedure and Conduct of Business in Mizoram Legislative Assembly to serve as members of Public Accounts Committee, Committee on Estimates and Committee on Public Undertakings, Mizoram Legislative Assembly for a period of 30 months”.

**OFFICIAL RESOLUTION**

6. **Pu LALSAWTA**, Minister to move an Official Resolution in the following form:-

“Mizoramin kum 25 chhung lai mai Remna leh Muanna kan nei ta hi lawmawm kan ti a. Remna leh Muanna kan neih hi chhunglam leh pawnlam atanga tihchhiat a nih loh nan mi tinte inpe thar leh turin he House hian a ngen a ni”.

**LEGISLATIVE BUSINESS**

**Bills for introduction, consideration and passing.**

7. **Pu H. LIANSAILOVA**, Minister to beg leave of the House to introduce “The Mizoram Protection of Interests of Depositors (in Financial Establishment) (Amendment) Bill, 2011”.

**Also  
to introduce the Bill  
to move that the Bill be taken into consideration  
And  
to move that the Bill be passed.**

8. **Pu LALSAWTA**, Minister to beg leave of the House to introduce “The Mizoram (Pension for Members of the Defunct Mizo District Council and of the defunct Pawi-Lakher Regional Council) (Amendment) Bill, 2011”.

**Also  
to introduce the Bill  
to move that the Bill be taken into consideration  
And  
to move that the Bill be passed.**

NGURTHANZUALA  
Secretary

**S P E A K E R** : A dik apiang te, a zahawm apiang te, a fel apiang te, a thianghlim apiang te, a duhawm apiang te – thatna reng a awm a, fakna reng a awm pawt chuan, chung chu ngaihtuah rawh u.

Philippi 4 : 8

Vawiina kan tih turte kan tan hmain, office lam atangin tihsual palh kan nei a, member-ten min ngaihdam kan duh a. List of Business kan han sem takah khan a tan hun kha dar 10:30 kha dar 11:00 kan lo ti palh hlah mai a. Kha kha kan tihsual palh a ni a, in mi ngaihdam kan dil a ni.

Awle, Obituary kan hmang anga Pu H. Lalsangzuala former MLA, Pu H. Hrangdawla former MLA leh Shri Dorjee Khandu former Chief Minister, Arunachal Pradesh, heng mite pathum hian session hnuhnung ber leh tun inkarah min lo boral san a, an mahni sunna thu sawi turin Pu Lal Thanhawla kan House Leader zahawm tak i lo sawm ang u.

**Pu LAL THANHAWLA, CHIEF MINISTER** : Pu Speaker, a zavai hian ka sawi tlang nghal mai dawn nge? ....(Speaker : an pathum khan sawi nghal vek mai rawh). Ka lawm e.

Pu Speaker, kan session hnuhnung leh tun kan session inkar hian, helai kan member pui mi pawimawh tak tak pahnih lai kan chan hman a. Tin, Pu Dorjee Khandu, Chief Minister, Arunachal Pradesh pawh under tragic circumstance-in a boral a, chumi te sunna hun helai House-a kan han nei thei tur hi a ropui a, a lawmawm ka ti a, lawmthu pawh ka han sawi hmasa duh a ni.

Pu H. Lalsangzuala Ex-MLA, Mizoram, Sangnova ti a koh thin hi ni 20.4.2011 zan dar 10:30 khan kal tha lo (kidney problem) avangin Aizawl Civil Hospital-ah a boral a, kum 58 a upa a ni.

Pu H. Lalsangzuala hi Pu H. Hranghlira (L) leh Pi Siallawmthangi (L) te fa pali zinga pathumna a ni a. Ni 22 March, 1953-ah Suangpuilawn khua-ah a piang a. Kum 1955-ah Aizawlah an rawn pem thla a, Ramhlun vengah awm hmun bengbelin tun thleng in he vengah hian an awm ta a ni. Kum 1980-ah Pi Pangkungi nen inneiin fapa pathum leh fanu pakhat an nei a.

Zirna lamah chuan HSLC thleng a zir a. A pa Pu Hranghlira hi Health Department-a thawk a ni a, a pa a boral hnuin Health Department-ah a lut a, mahse, kum 1987-ah ram tana rawngbawlna lamah a in hman duh a vangin a bansan a. A theih ang tawka ram tana rawngbawl chungin sumdawna chi hrang hrang a khawih a, damdawi zawrhna dawr hawngin chhungkua a enkawl thin.

Kum 2003 MLA Election-ah Suangpuilawn bial atangin Independent ticket-in MLA a thlan tlin a ni a. MLA a nih chung hian a bial mipuite tan hmasawna hrang hrang thlenin hmachhawp tam tak a nei a. New Delhi-ah President Pratibha Patil te hmu-in a bial mipuite tana thil tangkai turte a sawi pui a. Amaherawhchu a hriselna a tlakhniam tak avangin a duhthusam angin hna a thawk thei lo a, MLA term hi a tawp thleng (2008) a chelh a ni.

Pu H. Lalsangzuala hi khawtlang leh ram tana mi thahnemngai tak a ni a. YMA, VDP leh an veng V/C ah te dinhmun pawimawh tak tak a lo chelh tawh thin a. An veng V/C memberah term li (4) lai thlantlin niin, kum thum chhung V/C President leh kum sawm pahnih chhung Vice President hna a chelh a ni. Tuna Ramhlun South Middle School hi V/C Vice President a chelh laia a thahnemngaihna leh inpekna a vangin Deficit status-ah hlan kai a ni. Ramhlun South YMA Hall leh V/C House neih takte pawh hi a hmun hma leh a building neih theihna a a bul tumtu zinga mi pawimawh tak a ni nghe nghe. Tin, Aizawl North College din a nih theihna tur a sulsutu pawimawh tak a ni bawk.

Pu H. Lalsangzuala hi Kohhran rawngbawlina lamah pawh theih tawka inhmang thin a ni a. KTP ah leh Sande Sikul ah te rawngbawlina hna chanvo a chelh thin a, a boral ni thleng hian Kohhran-ah Building Committee member a ni a. Mi harsa zawkte leh chanhai tanpui a peih em em a, khawtlang leh tlawmngai pawl tan a neih ang ang sum leh pai a thawh hreh ngai lo. Pu Sangzuala hi kum 2007 vel atang khan kal thalo, kidney problem a nei tan a. Apollo Hospital, New Delhi-ah te, AMRI Hospital Kolkata-ah te vawi engemaw zat kalpui a ni a. That deuh changte awm thin mahse, a natna hian zual lam a pan zel a, kum 2010 atang phei kha chuan khum betin a awm tan a, In lam leh damdawi in lam a kar tawn sek a ni. Ni 28.2.2011 a Aizawl Civil Hospital atanga a chhuak chu tha chho zel tura beisei anih laiin hniam lam a pan zel a. Ni 4.4.2011 ah Aizawl Civil Hospital-ah bawk dah luh leh a ni a, that lam a pan theih chuan loh avangin ni 17.4.2011 zan a a muhil chu biak theih lohina awm a, hniam lam pan zelin ni 20.4.2011 zan dar 10:30 khan chatuan ram min lo pansan ta a ni. Pu H.Lalsangzuala hian a nupui Pi Pangkungi leh a fate 4 leh a tu te 4 a kalsan a ni. Amah kha mimal taka a pa atanga ka hriat a ni. Mi tha tak, mi tluangtlam tak, itsikna leh elrelna nei lo, mi taima, mi inngaitlawm a ni a. Hetianga min kalsan ta hi kan ui tak zet a, a kalsan a nupui fanau leh tu leh fate Pathianin awmpui zel se tih hi kan duhthusam leh kan tawngtaina a ni.

Tin, Pu Speaker, Pu H.Hrangdawla Ex-MLA Mizoram hi ni 19.6.2011 tlai dar 5:00 khan cancer avangin Kothari Hospital, Kolkata-ah a boral a, kum 79 a upa a ni. Pu Hrangdawla hi Pu Thanglawka (L) leh Pi Suakchhingpuii (L) te fa 11 zinga a upa lam atanga 3-na a ni a. Ni 23.10.1932 khan Mualcheng khuaah a piang a. A naupan laiin Lungchhuanah an pem a. Kum 1962-ah Aizawlah an pem leh a. Ni 25.3.1966 khan Pi Hmingliani nen Tuikual Presbyterian Biak In ah Pastor Thanga kutah an innei a, fapa 1 leh fanu 3 an nei a.

Zirna lamah rualawt tak a ni a, harsatna tam tak paltlanga inzir chhuak a ni. Lungchhuan atangin Lower Primary a zo va, kum 1951 khan N.Vanlaiphai Middle School a zawh hnuin kum thum hlo a thlo leh phawt a. Zirna kawnga hlawhtlin ngei a tum tlat avangin High School leh College zir chhunzawm turin ke ngatin Manipur a pan a. Kum 1956 ah Bengali High School, Imphal, Manipur atangin Matric a passed a. DM College, Imphal-ah B.A (Economics) a zir a, chhungkaw harsatna avangin a zirlai a chhunzawm thei ta lova. Kum 1967-ah Pachhunga Memorial College (PUC) atangin BA chu tha takin a zo a.

Pu Hrangdawla hi 1959 khan a pain a boral san a. Eizawna kawngah chungkaw khaipa ber a nih avangin lehkha zir chungin a u Pakunga nen bungbel, khuhhriang leh fian te kengin Mizoram dung leh vang bakah Reng ram Tripura leh Burma ram Chin Hills thlengin an zuar thin a. Aizawla a

awm hnu hian Motor (Truck)-te leiin ei a zawng a. Mizoram Union Territory a lo nih khan PWD hnuaih contract hna hrang hrangte a thawk a. Kum 1983-ah Class-I Contractor Association-ah President-ah thlan tlin niin 1985-1987 chhungin Mizoram Urban Co-operative Development Bank (UCO) din a rawt a. He Bank-ah hian Board Chairman hmasa ber a thlan niin he hna hi kum 9 lai a chelh a ni.

Pu Hrangdawla hian politics hi a tuipui hle a. B.A. pass lovin politics zuang lut vein Congress party a zawm a. Tum thum lai Legislative Assembly election-ah contest ve in a tling zo lo va. Kum 1987 Mizoram State putling a inthlan hmasa berah MNF ticket-in Aizawl W-I bialah MNF ticket-a thlan tlin a ni a. Mizoram State Protest Speaker hmasa ber a ni. MLA anih chhung hian Committee on Subordinate Legislation-ah Chairman hna a thawk a, a hun hnuhnungah Mizoram Pradesh Congress Committee-ah a awm a. A lo upat tawh avang leh a hriselna a that tawh loh avangin politics lamah chuan a inhmang zui thei ta meuh lo a ni.

Pu Hrangdawla hi pa taima, mahni in leh lo bakah ram leh khawtlang tan pawh a tha leh zung nasa taka seng mi a ni. Tuikual veng tan pawh sulhnu pawimawh tak tak a hnutchhiah ve a. Tuikual Presbyterian Biak in atanga thlanmual panna kawng leh Tennis Court atanga Dinthar kawm Motor kaltlang theihna sial anih dawn te hian a sulsutu ber a ni. A phak tawkah Kohhran tan thahnem a ngai thei hle a. A neih sum ui lo a khawtlang leh Kohhran tana pe thin a ni.

Kum 1986 ah a zun a thlum a ni tih hmuhchhuah a ni a. Kum 2007 khan a zun thlum chuan lung natna a thlen a. BM Birla Hospital, Kolkata-ah Angioplasty tih a ni a. Kum 2010 June khan khawsik leh luakin a tlakbuak a, nikhaw hre mang lova a awm avangin Aizawl Hospital and Research Centre Mission Veng-ah dah luh a ni. Hetah hian a mit (Bile) leh a ril bawh a Cancer tih hmuhchhuah a ni a. Ni 17 June, 2010 khan Kothari Medical Centre, Kolkata-ah kalpui a ni leh a. ERCPP Stenting tih a ni a.

Pu H.Hrangdawla hi a chak lo telh telh a, October 2010 atangin a hrawkah harsatna a nei tan a. In lamah theihtawp chhuaha enkawl reng a ni a. A natna hian zual lam a pan tak zel avangin 17<sup>th</sup> May, 2011 khan Aizawl Hospital and Research Centre Mission Vengah bawh dah luh leh a ni a. Hetah hian a hrawk cancer a ni tih hmuhchhuah a ni leh a, 15<sup>th</sup> June, 2011 khan, Kothari Hospital, Kolkatta panpui a ni leh a, theihtawp chhuaha enkawl a nih mek laiin, 19<sup>th</sup> June, 2011, tlai lam dar nga khan Lalpa hnenah min chawhlsan ta a ni.

Pu Hrangdawla hi helaiah Member a nihna in, Member pawimawh ber, tha ber, Parliamentarian tha tak a ni a. Tin, mimal takin inhre tha tak kan ni a, Shillong-ah te fate tlawhin kan zin ho a, tin, Party khatah te kan thawk tawh a, a hun tawp dawn lamah kan thawk ho leh a, mi thahnemngai thei tak a ni a, mi tha tak, inngaitlawmtak, pa zaidam tak a ni. Hetiang mi pawimawh takin min lo kalsan ta hi kan ui takmeuh a, Pu Speaker, a nupui fanau, tu leh fate, lainate zawng zawng Pathianin awmpuiin thlamuan turin kan dilsak a, kan tawngtai a ni e.

Pu Dorjee Khandu, Chief Minister of Arunachal Pradesh chu 30<sup>th</sup> April, 2011 khan a chuanna helicopter a tlak avangin a borala, kum 56 a upa a ni. Pu Dorjee Khandu, Arunachal Chief Minister panga na hi, Pu Leki Dorjee fapa a ni a. Ni 19<sup>th</sup> March, 1955 khan Gyanghai khua, Tawang District, Arunachal Pradesh ah a piang a. Pu Khandu hi Buddhist sakhaw zuitu niin nupui pali a nei a, fapa 4 leh fanu 2 a nei, zirna lamah chuan Tawang school atangin CI- VIII a zir zo a. Hemi hnu hian Indian Army Intelligence Corp-ah a lut a, kum 7 chuang a thawk a ni. Bangladesh War lai khan Intelligence Service lamah a thawh that avangin Gold Medal a dawng a ni.

Pu Dorjee Khandu hian Army a chhuahsan hnu hian vantlang lama hnathawhna lamah a inhmang tan a, Culture & Co-Operative Society-ah hruaitu hnate a thawk thin a. Kum 1982 ASIAD, New Delhi a neihah khan an State aiawhin Cultural Troupe a hruai a, hetah hian Silver Medal a hawn pui nghe nghe a ni. Pu Khandu hi Social Worker ropui tak mai a ni a, kum 1987 – 1990 chhunga a thawhrimna a zarah thingtlang khaw tam takin Water Supply, Electricity connection leh Communication, School leh Religious Institution te an neih phah a ni. Chutianga mi tangkai tak chu a ni.

Kum 1990 Arunachal Pradesh State Legislative Assembly Election hmasa berah khan uncontested in Thingbumukto Constituency atanga thlan tlin a ni a. Kum 1995 Second General Election-ah a bial ngaiah thlan nawn leh a ni a, Minister of State-a lakluh niin, Co – Operation Department a enkawl a. Kum 1996 ah Cabinet Minister for Animal Husbandry & Veterinary and Dairy Development atan lak luh a ni a, kum 1998 ah Power Department enkawl tura dah leh a ni.

Pu Dorjee Khandu hi 1999, General Election-ah a bial ngaiah thlan tlin leh a ni a, hemi term hian Cabinet Minister ni leh in, Mines, Relief & Rehabilitation leh Disaster Management te a enkawl a. Kum 2004, General Election-ah a bial ngai Mukto Constituency atangin khingtu awm lovin thlantlin a ni leh a, Minister for Power, NCER leh Relief & Rehabilitation-a dah phawt a ni a. Ni 9 April, 2007- ah Arunachal Pradesh Chief Minister 5-na atan lak luh a ni a. Ani hian Chief Minister Pu Gegong Apang a thlak a ni. Kum 2009 Assembly Election-ah a bial ngaiah tho khingtu awm lova thlan tlin leh a ni a. Ni 25 Oct., 2009 ah Chief Minister atan lak luh leh a ni. Pu Dorjee Khandu hi a bial ngaiah a zawnin term ruk lai thlan tlin a ni.

Pu Dorjee Khandu leh mi dang pali, Pilot Capt. J.S. Babbar, T.S.Mamit, Security Officer Yeshi Choddak leh Yesh Lhamu, MLA Tsewang Dhondulp farnu te hi Helicopter-in 30 April, 2011 zing lam dar 9.56 ah Tawang atangin Itanagar pan turin an thlawk chhuak a. An thlawh chhuah atanga minute 20 velah chin hriat loh vin an awm zui ta nghal a. Theihtawp chhuaha zawn zui nghal a ni. Ni 4 May, 2011 zing lamah an chanchin hriat loh atanga darkar 100 dawnah Pu Dorjee Khandu leh a chuan puite ruang hi Keyla leh Luguthang inkar Jung Falls, Mukto khua a ama Constituency Tawang District chhungah hmuh an ni ta a ni.

Hetia an zawn chhung hian thuthang dik lo tam tak a awm a, Bhutan-ah an tum a, an him tih te, chutiang chuan chanchin dik lo thawn chhuah thin a ni a. Hemi avang hian an Governor Gen. J.J. Singh pawh an puh hle a ni. Tun thleng hian khatiang message dik lo thawn chhuaktu tiin an la puh ta reng a ni.

Pu Dorjee Khandu te ruang hi Luguthang-ah lak phawt niin, heta tang hian Tawang-ah lakluh a ni a. Tawang atang hian MI-17 in 1:00 PM ah Itanagar-ah thlawh luhpui a ni a. Hetia an bo chung hian Union DoNER Minister pawhin a tawp dawn lamah mangan thuah a hmuna search operation conduct pui turin Itanagar-ah a han inkulh nghe nghe a. Tin, Minister thenkhat dangte pawh rawn ngaihvenin an inkulh a ni. Union Minister engemawzat leh Arunachal Pradesh State Minister tam takin Airport-ah hmuah a ni a. Raj Bhavan leh Chief Minister's Bungalow inkarah hian mipui tam tak amah ngainatuten an lo hmuak a ni.

Ni 6 May, 2011 khan a pianna khua Gyanghar, Tawang District-ah thlenpui a ni a. A vuina hunserh hnuhnung ber chu ni 10 May, 2011 khan an hnam Monpas dan anga hman a ni.

Dorjee Khandu hi a mimal takin inhre tha tak kan ni a, Chief Minister a nih hma atanga inhria kan ni. Delhi-ah pawh kan thlenna inah te a lo kal thin a, chutiang chuan an harsatna thenkhat khatah te pawh tanpui turin min rawn sawm thin a. Mi fel tak, pa tha, nei nung tak a ni a. Tin, Mara District Council inthlan tumkhat pawh ama helicopter kengin min rawn buaipui nghe nghe a ni. Chutiang chuan kan ramah pawh rawn inhmang ve tawh a ni a. Pa tha tak, pa zaidam tak, pa thilphal tak a ni a, a neihin a zir bawk a, chutiang mi chu a ni a. Chief Minister a nih pawh hian a tluangtlam hle a, a rawn nih chhoh dante leh a Chief Minister lai pawhin. Chutiang mi tha chu Arunachal Pradesh hian an chan ta a. Tin, keini tan pawh ram rawngbawlnaah kan thawhpui mi thahnemngai tak, mi thiltitheh tak a ni a. Chuvangin, Arunachal tan chauh ni lo, keini mimal taka hretu leh kan thawhpui a nih hrim hrim ah leh India ram tan pawh channa rapthlak tak a ni a. Tunlai tak phei chuan China lampang atanga eng eng emaw buaina leh harsatna awm thin avangte pawhin an state khu a pawimawh a, ngaihven te pawh an hlawh a, chutiang karah te pawh chuan rintlaka ngaih a ni a. Chutiang mi chu kan chan ta hi a uiawm hle a ni. A chhungte, a nupui te leh fanau te kan tuarpui a, thlamuanna kan dil sak ani. Pu Speaker ka lawm e.

**SPEAKER** : Sawi duh nei te kan la awm em? Hun hawng lawk ang. Dr. R. Lalthangliana, a dawtah Pu Duhoma.

**Dr. R. LALTHANGLIANA** : Pu Speaker ka lawm e. Hei, kan session hmasa March thla leh tun inkarah he House-a rorelnaah pawh lo thu ve tawh thin kan thawhpui duh tak te pahnih Pu H. Lalsangzuala, Pu Sangnova ti a kan koh thin leh Pu Hrangdawla te kan han sun mai hi mi a barakhaih hlein ka hria a. Tin, tuna kan ngaihthlak ang khan kan thenawm state-a Chief Minister nilai mek Pu Khandu-a a lo boral ta bawk a, hun tawi te han lak lawk ka duh a.

Pakhatnaah chuan Pu Sangnova ka'n ti mai ang a, ani hi kan koh dan a ni a, mimal tak pawhin kan inkawm ngeih a, pa biak nuam tak mai, kan ngaihthlak ang khan a ni a, kum 58 mi lek, kan chan ta mai hi a lungchhiat thlak hlein ka hria a. La dam sela thawhpui nuam tak a ni tih te ka sawi duh a. Tin, zirna lamah hian kan ngaihthlak tak ang khan a thleng sang lutuk lo na a, amaherawhchu Mizopa zingah mi chhuanawm tak niin ka hria a, personality a nei tha

a, a thluak hi a tha khawp mai a, mi tangkai tak a nih zia, khawtlang Village Council-a VCP a lo nih tawh nate leh YMA leh NGOah te dinhmun pawimawh tak mai lo nei tawh thin a ni a. Ka'n sawi duh lai chu Pu Speaker, kum 1996 a remna leh muanna a lo thlen khan MNF Party hi a zawm a, nihna pawimawh tak tak Party-ah hian a chelh tawh thin a. Thil pakhat chhinchhiah tlak deuh mai ka sawi duh chu nihna a chelh mai nilovin thiltiturtur awmah hian a pha ve ngai lova, zin ngaite emaw tih tur kan tuk reng rengah hian engmah hnial lova ti mai thin mi a ni a. Hei hi a fakawm hlein ka hria a.

Tin, a chanchin ka hriatnaah chuan a tlangval lai pheih chuan pa chak deuh mai a ni an ti a. Feet 5.9' a sang a ni an ti a. A mah hi buh a phurh pawh hian tin ruk hi zang tak anga phur thei mai chi a ni an ti a. Tiang chuan Mizopaah chuan pa chak tak mai pawh a ni awm e. Tin, a nuna thil entawn tlak tak mai kan sawi duh chu mi chanhai, rethei mangangte tanpuina lamah hian khawngaihna leh hmangaihna nghah tak, mi thilphal tak mai a ni tih hi kei pawhin ka hriatpui a. Hei hi a ropui ka tih em em vawiina sawi chhuah loh theih loh ni a ka ngaih a ni a. Tin, kan party (MNF party) a Secretary dinhmun an chelh chhoh khan a thil chak zawng pakhat ram tana a thawhna tur atana han zawh pawha a sawi fo thin chu 'ka pian leh murna lam hi Suangpuilawn lam khi a ni a, khi lamah khian han ding thei ila, bial angin han enkawl ve ila, mahni pian leh murna lai vel khi theih tawp chhuaha tan lak hi ka chak a ni' tih thu hi a sawi thin a. Tiang chuan term khat chhung kha khilailah MLA a thlantlin niin he House-ah pawh kan hriatpui a, thahnemngai taka a bial tana thawktu a ni tih kha kan hre awm e. A nupui leh a fate tuarpuina hunah hian ka'n sawi duh a, chumi rual chuan Pathian awmpuina leh kaihhruaina kan dil sak bawka ni.

Tin, Pu Hrangdawla, kan senior politician a ni a, ani hi Pu Speaker, kan ngaihthlak ang khan he House-ah hian Protem Speaker hmasa ber niin an sawi thin a, a dikin ka ring a. A nunah hian thil chhinchhiah tlak tak tak a awmin ka hria a. A vui ni-a a chanchin kan ngaihthlak tawhna te han thlir let ila, mi tumruh, hrehawm tamtak tuara hetiang lo zi chhuak kha a ni tih a chiang a. Lehkha zir chung state pathum vela sumdawnga bel leh fian leh thleng tih vel han zuar kual kha chu tunlai dinhmun han thlir chuan a ropui a ni. Khatiang ang mi kha kan nei tawh zen zen awm lo mang e aw ka ti a, a ropui ka ti khawp mai. Tin, Mizoram-a Party hmasa ber, Mizo Union, 1946 bawra a din tan tirh vel atanga politics-a tui mi a ni a, Janata Dal Party ticket khan Mamit bialah khan a ding a, mahse a hlawhtling chiah ta lova.

MNF leh India Sorkarte inbiakremna awm theih hi a nghakhlel ve em em mai a, a sawi fo thin an sawi chu 'Inbiak remna hi awm vat vat sela, Party-ah hian ka awm ang a' tihte kha a sawi thin a. Chuan, a sawi ang takin 1986 a remna leh muanna alo awm khan Mizo National Front Party hi zawmin, keini pawhin State Assembly inthlan hmasak ber 1987 khan Aizawl West – I bialah hian Party ticket-in a ding a, tiang chuan MLA a lo ni chho ta a ni.

Pa kawm nuam em em a ni a, kan in kawm ngeih a, kum lamah chuan inthlau hle mah ila. Tin, thil pakhat, Pu Speaker, han sawi loh theih loh nia ka hriat chu, khatia MNF te 1986 a an lo chhuah khan, tam tak chu ngaihtuah awm ve tak tak, thawmhnaw pawh nei lo, mutbu/mutpuan pawh neilo kha an tam em em a, Pu Dawla thiltih hi vawiinah hian sawi chhuah chakawm ve hlein ka hria a. Blanket/Mut puan te leh thawmhnawte kha ama sum khan a lei teuh teuh mai a, khatiang ramhnuai atanga lo chhuakte kha a chhawmdawl ve teuhin ka hria a. A in



hi han tikhawmna leh ei khawm nana khatih hunlaia kan hman ber thin a ni. Tin, zai hi a ngaina a, mak ve deuh mai, a chhungte lamin min hrilh dan chuan, ama awmna Kohhran an zai tui loh deuh pawhin Aizawl khawpui chhung khawilai pawh a hla pawh sawi lo hian zai tui deuhna hi a zawng a, tiang chuan a thian thenkhatte nen khatiang kha panin thlahlel em emin an zawng thin tih an sawi thin a ni. A ropui em em a, amahah hian Pathian fakna nun nghet takin Pathianin a dah a, hei hi a entawn tlak hlein ka hria a ni. Vawiinah hian kan hruaitu hlun tak mai leh kan duhlai kan han chan ta hi a pawh hle mai a, a nupui fanaute Pathianin awmpui zel sela tih hi kan tawngtai sakna a ni.

A tawp berah chuan Pu Dorjee Khandu, Arunachal-a kan Chief Minister a nih lai mekin, kum 56 mi lek a nihin Helicopter chetsualnaah kumin April ni 30 khan a boral kha a ni a. Mizoram pawh min barakhaih a, India ram hmun hrang hrang a barakhaih hle a. Kan Chief Minister zahawmtak sawi ang khan, a ruang hmuh lawk loh, a chin hriat lawk loh kha a ni rei bawk si a. Ka lo hriat dan chuan, he Helicopter hi Pilot nen mi pali chauh chuan theihna tura tih a ni a, a lian vak lo a ni awm e. Tah hian an lo chuang tam deuh hlek pawh a ni awm e, Pilot nen panga (5) an lo chuang a, bungrua pawh an load thla teuh a. Chumi chung chuan pakhat khan an exceed hrim hrim a. Engpawh nisela, term hnih lai mai khulaiah Chief Minister hna lo thawk a ni a. Zirna lamah hian a thleng sang lo khawp mai a, Pu Speaker, pawl riat chauh a zova. Indian Army Intelligent Corps-ah kum sarikh lek a thawk bawk a. Chumi chhung chuan Gold Medal (Bangladesh War) a a tih that avanga a hmuh thute kan ngaithla a, a ropui hlein ka hria a. A back ground chu a ropui lo, amaherawhchu, dinhmun ropui tak maia a awm thei hi mak tak mai niin ka hria a. Arunachal hian hnam hrang hrang 26 bawr vel an awm niin ka hria a. Chung hnam zingah chuan Adi kan tih leh Nisi kan tihte hi a tam deuh hnamte pawh niin ka hria a. Amaherawhchu, a ni hi, hnam tenau hriat hlawh vak lo atanga lo chawr chhuak chu a ni a. Chutiang zing atanga Chief Minister an neih chu a ni a. Kawng leh lamah chuan dinhmun tha vak lo atangin dinhmun pawimawh tak maiah a rawn awm chho a ni a. A chanchin ka hriata thenkhatah thil pahnih khat lek ka'n sawi duh chu - Arunachal hi land record velah hian an tha vak lova. Itanagar an khawpuiah hian a Chief Minister laiin mirethei te te, ram nei si lo te hi an rawn pem lut a, in an sa tawp tawp mai a; keini Mizoram angah chuan tih ngaihna awm lo a ni a. Ani chuan harsatna siam lovin a lo accommodate zel mai a, mi harsa te te te hian pa angin an ngai a ni tih hi sawi a awm a ni.

Tin pahnihnaah chuan Arunachal hi development-ah chuan an hnufum hle mai a, tun tuma CM anih chhung hian project hrang hrang leh scheme han formulate chungchangah hian a sorkarah chuan a thawk tha viau niin an sawi a. An sawi ka hriatah chuan CM a ni a, DO letter kha pawisa ruahmanna chungchang a ziah a ngaih chuan Protocol hi a awm leh awm loh hi a care vak lova, Joint Secy. ah te hian CM anih angin forwarding a siam mai thin an ti a. Tin, Arunachal hi Forest-ah an hausa viau thin a, amaherawhchu an Forest protection lamah hian an CM ber hi a tangkai khawp mai a, Climate change an tih Forest alo chhiat zelna turah pawh hian theihtawpa tan la a an rama ngaw tha a awm theih nan tan latu a ni tih hi a chanchinah hian sawi a ni thin a.

A tawp berah chuan mirethei chanhaite hian an ui hle a, ui tu hi a ngah hle a ni tih hi an sawi thin a. Amah hi mimal tak chuan hre lo mah ila amahah hian entawn tur tam tak a awmin ka hria a ni. A pian leh murna chhe te mah nisela dinhmun pawimawh tak CM vawihnih a chelh a. Amaherawhchu, vanduaithlak tak maia accident thila an thi mai hi a vanduaithlak hlein ka hria a. Engpawhnisela, vawiinah hian a nupui fanaute, a chhungte Kristian ni lo mahse Pathian awmpuina duhawm tak chang se tih hi ka duhsakna a ni.

**Pu LALDUHOMA :** Vawiina hruaitu pathum kan sun mek te chanchin tlangpui kan ngaihla tawh a, sawi nawn lovin tawi te ka'n sawi ve ang a.

Hei Pu Sangnova hi ram rawngbawlnaa a nihna piah lamah a mimal taka in thian tha kan ni a. Zoram dung leh vangah hian kan lo inzui ve thin a. Pa inthlahrung tak, pa hawihhawm tak a ni a. Zannah hian a hnar ring em em mai thin a. Khatih lai khan mi chhuatah kan mu thin a, zan han mut dawn hian kawngka bul hi a chuh a, a mu hrang mai thin a ni. 'Ka tibuai ang che u,' a ti a, a hla thei ang berah hian a mu thin a, chuti chung pawh chuan min la tibuai ve tho thin a. Chutiang ang, mi tlawmngai leh mi dang tihbuai hreh mi chu a ni. Mizoramin boruak kan la tawn ngai reng reng loh hnuaiah MLA a rawn tling chho va, a hun tawn kha a khirh dang dai bik em em a. A tlin hlimah te pawh nupui fanau bulah pawh khawsa thei lovin lak hran tein a awm a, a vanduai hle a. Helaiah hun reilo te a neih chhungah Recess Room pakhat intawmin kan awm tlang a. Harsatna tam tak amah leh a chhungkaw rilru tibuai thei chi, MLA lo ni ve tawh thin ten kan tawh ngai loh kha a tawh thin a, a khawngaihthlak hle a. Taksa hrisel lohnain a tlakbuak reng bawh a. Chuti chung pawh chuan theihtawp a chhuah hram hram thin a. Tunah chuan min lo kal san ta a. Ka ui tak zet zet a ni.

Tin, Pu Hrangdawla hi pa kawm nuam, pa ti ti ngah a ni tih kan hre theuh a. A chanchin kan ngaihthlak tawhah khan pakhat chiah han sawi nawn leh ka duh chu, bel kha a zuar mai ni lovin a chung thin a ni. Ama bel chhun ngei kan Mizoram ram ri hrul leh Zoram pawn lamah amah ngei-in phurin a zuar ngat ngat mai a ni a, chutiang atanga vawiina helaia rorelna sang ber atanga sun tlak ni thei tura in vawrh a nih a vangin amahah hian entawn tur kan ngah em em mai a. Tin, tawngkam bungrua a ngah em em mai a, then khatin kan sawi a kan huat tur huat theih hauh lova sawi te a thiam em em a ni.

Pu Speaker, he House proceeding record ngeia chuang ama sawi ngei thil pahnih khat han sawi ka duh a: Zirtirtu chungchang sawi a nih tum khan, Zirtirtu ni tura an sawm tuma ama chanchinte a sawi a, zirtirtu atana a tlak loh zia, "Ka rilru hi a pawr a, a thianghlimlo bawh a, zirtirtu ni tlak ka ni lo", a ti tawp mai a ni. Tin, "Zirtirtute kan transfer kual rengte hi a diklo a ni, an tan hian Quarterte hi kan siam ve tur a ni, in luah tur pawh kan pe silova", a tih te kha a sawi a kan record-ah a la chuang a. Tin, mirethei a ngaihsak a, helaia a sawi ngei kan record-ah chuan, "Miretheite bengah Chingchip a kiu mum mum a", a ti e maw ni kha le, chutiang khawp chuan rit phurte, thawkrim te a, an awm nasat zia sawiin an mahni chhan chhuah a duh zia te kha a sawi thin a ni. Tin, hruaituten kan ti ang an tih an tih leh si loh amah ngei pawhin a lo beisei em em, a beisei ang ni leh ta si lo chungchang sawifiah nan khan "Vawrselapa", kha a hmang a, vawiin thlengin kha tehkhin thu

khan a chek thuk hle a ni. Chutianga mi tawngkam ngah chu a ni a, a ngainatawmin a uiawm tak zet zet a ni.

A tawp ber atana kan sawi duh chu Class I Contractor a ni a, remna leh muanna duh mi a nih avangin 'kan MNF unaute hian heng kawngah hian cease fire-te a awm si a, chhiahte an khawn thiawng tawh si lo va, an lo harsa lutuk ange, an harsat avang hian pawite an lo khawih palh ange' tiin Remna-a hman turin pawisa an khawnkhawm a ni. Khatilai dinhmunah chuan thahnem tawh tak a ni, chu chu Pu Laldenga hnenah khan a hlan a ni. Chutianga remna duh mi chu a ni tih ka tarlang duh a.

Tin, Pu Dorjee-a hi kan ngaihthlak tak ang khan mi ropui tak a ni a, khata tang khan lehkhah thiam kherlo pawhin ram hruaitu ropui tak a nih theih tih min zirtirin ka hria a, min tumruhna an neih chuan engmah hian a dal tak tak thei lo a ni tih hi min hnutchhiah chiang hlein ka hria a. A chanchin han ngaihthlak mai khan uncontest-te khan a tling a tling mai a. Engtin nge ni khatiang thilte kha a thlen theih tihte kha hriat zau a chakawm hlein ka hria a. Tin, a thihna chungchangah hian thlawhna Company lampang mawhpahna leh sawichhiatna a tam em em mai a. Hemi avang hian Company lamte pawhin tan an lain nasa takin an improve a ni tih pawh kan hria a. Mi tam tak chu kan thi a, kan thi ringawt a, ani chu midangte tan a thihna hi malsawmin a awm a, a thihna pawh hi mi tamtak ten hamthatna an dawnna tura hma lak tirtu alo ni lehzel a, kawng lehlamah chuan a thi ropui hle a ni. Heng hruaitu pathum kan han chan takte hi an chhungte kan tuarpui a, Pathian thlamuanna leh awmpuina kan duhsak a ni e. Ka lawm e.

**SPEAKER** : Pu P.C. Zoramsangliana leh Pu P.P.Thawla'n an phar an phar ve maia, amaherawhchu hetah hian Question Hour kha ala tel a ni tih kha hria ila, mahse an sawi duh chu tawi kimchang taka sawi tur an ni a. Tunah Pu P.C.Zoramsangliana i lo ko ang.

**Pu P.C. ZORAM SANGLIANA, MINISTER** : Pu Speaker, vawiina mi chhuanawm tak tak, mi pathumte sunnaah hian tawi te te sawi ve ka duha, Pu H.Lalsangzuala hi 'Sangnoa' tia kan hriat lar, a hun rawn tawn chhoh dan leh he House ngeia Member a rawn nih dan hi Mizo History a awm chhunga reh lo tur a ni a. Kidnap lem tih leh Pu Sangnoa tih inzawm tlat leh Political Party hrang hrangte inpuh mawhna nasa tak, NGO thleng te pawha puh mawhna leh khatiang anga puh nasa, nichinah member zahawmtakten an sawi tawh a. Amah pawh MLA zahawmtak a ni chung pawha zahawmna pawh keng hlei thei lova rikrap leh tih retheih karah khan a awm thin a. Chutiawng karah chuan Co-ordination Committee tih te, political party hrang hrang ten a chanchinte kan ngaichang a, kan ngaihven thin a, chutiawng chuan a hmingin Chairman ka ni ve thin a. Vawiinah hetiang amah sunna hun kan han neih a sawichuah ka duh chu, a principle-ah hian a ding nghet em em mai kha, ropui ka ti a. "Hetiang puh mawhna zawng zawng: kidnap lem hi chu, nakin hun lo la kalah ka nih loh zia, ka telloh zia alo la lang dawn a ni" tih hi a sawi a. Chu chu Mizo mipuiten kan hre ta a ni lom ni ? ka ti a ni. Chungvang chuan helai chungchangah hian Pu Sangnoa hian khang hunlai pawha zam hauh lova, min an puhna te nghing lo leh zam lova ama dinhmun a nemnghehna kha a ropui ka ti a. Miretheite tan leh midangte tana malsawmna anihna kha chu kan hotute khan an sawi tawh a. Kan han hmuh ve phak

chinah pawh miin an ngainat zia te, nemnghehna an in leh lova miretheite an tlangnel zia hi mak ka ti a. MLA a nih lai khan inentirin Delhi-ah a kal a. Chutih lai chuan kei pawh United Bank of India-a official Director ka nih lai a ni a. Delhi-ah meeting-in kan awm ve a, kan in hmu a, ‘Vawiin chu President hmuh ka tum a, central Minister leh officer leh tu tu te emaw hmuh ka tum a, hengte hi ka bial tan sawi ka tum a ni’, a ti. Min lo hmu a, a mak ka ti hle mai a. A bial Suangpuilawn tante India ram President leh official te, Minister te, hnena thil sawi tur a neih kha sawi turin appointment a dil a, a hmu te kha ropui ka ti a. Tiang mi, natna khirh tak tuar chungam in han boral san ta hi ka ui tak meuh a, a nupui fanau te, a tu leh fa te Pathianin thlamuan se tih ka sawi duha.

Pu Hrangdawla, ani pawh hi kan hriat ve phak chinah remna leh muanna duh mi leh nghakhlel mi a nihna hi ka hriat ve dan pakhat a ni a. Politics-a a awmnaah pawh remna leh muanna awm hma zawnga a thupui thinah chuan, ‘Remna leh muanna a awm theih hma hi ka duh a ni’, a ti thin a. Chutiang tur chuan pawl hrang hrangah pawh a awm lawr a ni thei e. A principle-ah chuan he kan ram hi hmasawna alo awm theih nan chuan remna leh muanna hi awm hmasa tur a ni a ti thin a. Chutah chuan remna leh muanna hi awm hmasa tur a ni a, theihpatawp kan chhuah tur a ni a ti thin a. MLA a nih hnuah ngei pawh khan nghet tlat a awm a ni. He kan House record-ah leh Mizo History-ah ngei pawh lang awm chu Pu Hrangdawla leh a thiante chungchang, khang hun laiah pawh “sazu mittel pa riat maw fang ko tu”, tih hlate kha alo chhuahna a ni a. Mahse, chu chu khang hunlaia kan ram tana pawimawh, mahni nunna pawh chan ngam khawp, ke pen chhuak ngam nihna kha a ropui ka ti em em a ni. Chumi piah lamah chuan miretheite tan belh tlak a nihna hi Pu Hrangdawla chanchinah hian sawi hmaih loh turah ka ngai a, hei hi ropui ka ti em em mai a. Tin, chu bakah chuan, Aizawl khawpui chhungah hian khawhar in, a kal phak tawhna chinah hian khawhar chhungte tan hian pa nih a tling a ni, a kal phak tawhna chinah chuan khuang a chang deuh ngei ngei thin a. A khuang vuaka zai leh lam te hi mihlim hote hian an thlahlel thin a ni, chutiang mi chu a ni a. Hetiang mi natna khirh tak mai tuara a hun tawp alo thleng hi a nupui fanau, a tu leh fa te thlamuantuin awmpui sela. Kan hotute pahnih Pu Sangzuala leh Pu Hrangdawla te thil tih tha kha keini helaia an awmna thin a lo thu mekte pawh hian chhonzawm zel ila tih hi vawiinah kan tihhlawhtlin tur a ni tih hi ka ring a ni.

Arunachal Pradesh Chief Minister ropui tak mai Pu Dorjee Khandu hi nichinah kan House Leader te leh midangten a chanchin an sawi nual tawh a. Han sawi ve duh ka neih chu, helaiah hian mithiam lo, khawvel danah degree nei hraw lo a ni. Mahse a degree hrawna em em chu a mipuite tan Leader anih tlinna lai hi a degree hraw vena lai chu a niin ka hria a, chu lai tak chu ropui ka ti a. Mahni bialah Chief Minister a nih hma pawhin uncontest a tling thei, Chief Minister a nih hnu phei chuan chuh ngam rual loh ang khawpa an ngaih uncontest a tling chho niin tiang hian an awm chho a. Tin, kan inhriatna hi a rei ve fu mai, 1989 – 1993 a North-Eastern Youth Congress Co-ordination Committee-a Chairman ka nih lai khan kan Joint Secretary pakhat a ni ve thin a ni. A promotion chu a chak khawp mai, State-ah a Chief Minister daih tawh a ni, chutianga pa ropui chu a ni a. Chumi chuan vawiinah hian accident rapthlak tak avangin min han boral san a, a aiawh tur han thlanna kawngah pawh khan an buai ve viau a ni. Tunge tha ang tih kha an ngaituah reiin an ngaituahna pawh a buai ve viau a ni. Tun June ni 5

khan DoNER Minister nen a room-a kan inkawm a, ka zu len tuma DoNER Minister lo sawi hmasak ber chu, “i pu, i thianpa ni bawk a thihnaah khan a vuina leh thihnaah khan ilo kal ve ka rin tehlul nen, engatinge i lo kal ve loh”, tih hi min lo sawipui hmasak ber a ni a. Chutianga in hre tha ve te kan nih avang chuan hetiang a thihna hi a paw ka ti takzet zet a. Arunachal Pradesh tan chang ni lovin, India ram tan pawh hian channa ropui tak niin ka hria a, chutianga min hruaitu ropui takte an han boral hi mimal tak pawn channa nasa tak niin ka hria a, ka’n sawi chhuak ve duh a ni e.

**SPEAKER** : Pu P.P. Thawla

**Pu P.P. THAWLA** : Pu Speaker, vawiinah kan Session ni hmasa berah ram hruaitu ropui lo ni tawh thinte mi pathum Pu H. Lalsangzuala, Pu H. Hrangdawla leh Shree Dorjee Khandu te sunna hun hman a lo tul leh ta mai hi vanduai thlak ka ti hle a ni. Chutih laiin Pu Speaker, heng ram hruaitu uiawm tak takte sunna huna thusawi ve thei dinhmuna Pathianin min din tir avangin vannei ka inti a, ka lawm hle bawk a ni. Pu H. Lalsangzuala hi kum 2003 MLA inthlan result December ni 2-a puanah khan Suangpuilawn Constituency atangin Party lian candidate engemaw zat karah independent-a thlan tlin ngat a ni tih puan a ni a. Kei Tuipang Bial-ah Independent ni chiah lem lo, party recognized lo atanga tling ka lo ni ve bawk a. Aizawl ka lo thlen hnuin December ni 14, 2003 khan ka va leng ngat a, kan inkawm a, kan innel a, kan inngaina nghal viauin ka hria a, chutianga lo inhre tawh kan ni a. 1953-a piang 1955 atanga Aizawl lo pem lut leh Aizawl-ah pawh Ramhlun Vengah ngat khawsa kha a ni a. Ani hi kan ngaihthlak tawh ang khan a pa aiawha Health Department-ah a thawh mek laiin Mizo hnam pa kan lo tih hial thin Pu Laldenga’n ram rawngbawlnaa a hnung zui ve tur leh kut leh ke pakhat atana a sawm chhuah ngat kha a ni a. Chutiang atanga in tanin a ni pawh VC term 4-ahte a tling a. Tin, chubakah VCP te, Vice President te, Member satliah te anih chung zawng pawh khan Aizawl North College lo dinna tur atana mi tangkai leh bul tantute lo niin, tin, an veng chhungah Middle School tha tak an lo neih theihna tur atana Chairman-te lo ni a nasa taka tan lo khawhtute a lo nih thu kan hriat tawh kha. Khatianga mi pawimawh tak mai, tin, VDP a lo dinchhuah tirh atanga lo tel ve zel mihring a ni a. Chuvang chuan Pu Sangzuala hi pa fel tak mai, pa taima, pa tlawmngai leh mipui tana mi inhmang mi, ‘mahni tana nun loh’ tih Pathian thua kan hmuh ang deuha a hun hi lo hmang thin mi a ni. Man of Principle kan tih ang mihring kha a lo niin ka hria. Kan inkawm ngeih em em thin a, chhunah ka office-ah a lo leng thin a, a damloh a phaia hospital-a a awm laite pawhin ka tlawh a, chutianga vawi tam tak lo ti ti dun tawh thin kan ni a. Chutiang mihring chu vawiinah hian hmuh tur a awm ta lo hi a ngaihawm ka ti a, uiawm ka ti hle a, a nupui leh fanaute ka tuarpui tak zet a ni tih ka sawilang duh a ni.

Tin, kan ngaihthlak tawh ang khan Pu Dorjee Khandu, Chief Minister ropui tak mai hi Arunachal State hausaah hnam langsar ami pawh ni lem lo, hnam tenau deuh ho zing atanga Arunachal rama Chief Minister ropui tak lo ni ta chanchin kan ngaihthla nual tawh a. Army-ah hun a hman zawh

hnuin Politics-ah a zuanglut leh ta a, Arunachal State-ah vawi 6 lai thlan tlin a lo ni a. Kum 2007 Chief Minister a nih hmasak tum khan April ni 24-ah Mara Autonomous District Council-ah kan tanna lam atan min rawn campaign pui ve a. An sorkar sensoin copter-te a rawn hire a, Union Minister zahawmtak Oscar Fernandes-a a rawn zui a, a rawn kalna senso kha aman a tum sak nghe nghein ka hria. Chutiang chuan a ni pawhin mipui hmaah Hindi tawng ngatin Congress Bhavan-ah thu a sawi a. Mara ram mipui te hnenah a chanchin te min hrilhin min duhsakna thute kha a rawn chhakchhuak nghe nghe a ni a. A thih thu ka han hriat phat khan Saiha District lama ka awm lai a ni a, mi a barakhaih hle mai a, uiawm ka ti a, Saiha-a campaign tura a rawn zin chhoh lai te, helipad-a kan hmuah lai te, Bhavan-a a thusawi laite ka mitthlaah a lo lang a, chutiang anga ka lo hmelhriat leh ka rilru te te chuan ka lo ngainat ruk ve em em mihring a ni. Mahse waviinah chuan Arunachal Pradesh-ah chuan a hmel hmuh tur a awm ta lo va, a chanchin sawi chauh hi kan chan a lo ni ta mai pawh hi a uiawm ka ti hle a, Arunachal-a mipui amah ui tute zawng zawng, amah zuitute ka tuarpui a, a chhungte zawng zawng pawh ka tuarpui a. Hetiang anga mi ropui tak takte lo suntute ka tuarpui a, thlamuanna Pathian hnenah rilruin ka dilpui bawk a ni. Ka lawm e.

**S P E A K E R** : Awle, sawi tur tam tak kan la awm ang a. Kan Finance Minister zahawmtak Pu H. Liansailova pawn a phar a, mahse, kan duhtawk mai ang a. Zawnha hunah kan kal dawn mai anga. Hetiang anga kan mi uiawm tak tak waviina kan sunte hi an chanchin pawh nilengin sawi ila kan sawi sengin ka ring lova, kei ngei pawhin sawi tur tam tak ka nei a. Tin, kan Minister Pu J.H Rothuama te pawh Pu Dawla te nen chuan inzui leh inkawp tlat an ni a, sawi tur tam tak a nei ang, khatiang kha kan ni hlawm a ni a. Engpawhnise, khati lam kha chu kan duh tawk ang a. Tunah anni pathum kan uizia lan tir nan leh kan sun nan ngawi rengin minute khat i lo ding ang u. (1 minute ngawi renga dingin sunna hun hman a ni). I lo thu tawh ang u le. Awle, zawnha hun tawi te kan la nei a, amaherawhchu, thil har a ni lova. Tunah zawnha Starred Question No. 1-na zawt turin Pu T.T Zothansanga i lo sawm ang.

**Pu T.T. ZOTHANSANGA** : Pu Speaker, ka lawm e. Starred Question No.1-na hon'ble Minister RD Department ka zawnha chu hei hi a ni. BADP in a cover area thin thinkhat ten BADP Fund an dawng ta lova, hei hi engvang nge ?

**S P E A K E R** : A chhang turin a changtu Minister Pu R. Lalzirliana, Rural Development Department changtu i lo ko ang.

**Pu R. LALZIRLIANA, MINISTER** : Pu Speaker, BADP hi tunhmaa a cover area thin kha tunah hian tih theih loh tam tak a awm tawh a. Chu chu a chhan chu Ministry of Home Affairs Govt. of India-in a guideline hi 2009 khan an rawn siam a. Chutah chuan priority an rawn siam a. 1<sup>st</sup> priority-ah chuan (0-10 Kms) thawh tur a ni a. 2<sup>nd</sup> priority-ah chuan (10-15 Kms) thawh tur a ni a, 3<sup>rd</sup> priority thlengin an siam a. 3<sup>rd</sup> priority-ah chuan (15-20 Kms) thleng a ni a. (SPEAKER : Khami Km kha khawi atangin nge an teh ? ) Border atangin teh a ni a. Chuvang chuan keini duh angin a hma ang khan kan siam thei ta lo a ni e.

**S P E A K E R** : Zawhbelhna Pu T.T. Zothansanga, a dawtah Pu K. Liantlianga, a dawt lehah Pu Ramhluna.

**Pu T.T. ZOTHANSANGA** : Pu Speaker, ka zawhbelhna 1) BADP Fund hi 2009-2010 leh 2010-2011 chhungin engzatnge kan dawn ? 2) BADP hi engtia rei nge kalpui anih dawn ? 3) Constituency engzatnge BADP hian a cover theih ? 4) International Border hi engtia thui nge kan neih ? Myanmar leh Bangladesh a hrangin min chhang thei em ?

**S P E A K E R** : Zawhbelhna Pu Pu K. Liantlianga.

**Pu K. LIANTLINGA** : Pu Speaker, ka lawm e. Ka zawhbelhna chu BADP 2010-2011 sum kan hmuh hi hman zawh a ni tawh em ? K Deposit ah te dah a awm em ? tih kha ka zawt duh a. Tin, ka zawh duh leh pakhat chu BADP Scheme hnuaiia hna awmte hi tender-in nge pek anih thin a, a in-charge Minister hian a duhsak zawngte a pe mai ? tih kha ka zawhna a ni e. Ka lawm e.

**S P E A K E R** : Zawhbelhna, Pu C.Ramhluna.

**Pu C.RAMHLUNA** : Pu Speaker, ka lawm e. Ka zawhbelhna chu hei hi a ni - BADP sum hi Ministry of Home Affairs hian Autonomous District Council pathumah hian direct a pek tumna kha an nei niin kan hria a, hei hi an pe ta reng em ? tih kha ka zawhna a ni e.

**S P E A K E R** : Awle, kan zawhna leh chhanna hun a tawp a, House rawn a ngai tlat mai. Khang zawhna ho kha kan han chhantir phawt dawn em ni ? Minister-in chhang phawt mai rawh se aw Minister in. Awle, chhang turin Pu R.Lalzirliana, Minister.

**Pu R.LALZIRLIANA, MINISTER** : Pu Speaker, a tawp lam atang khan chhang ta ila. Pu Ramhluna, MLA zahawmtak zawhna kha, direct-a pek tur tih niin keini pawhin kan hria a. Chuvang chuan a vaukhanna deuh te pawh kha kan lo sawi ve tawh a. Direct-in in khawih dawn a, in tih that loh chuan kan laklet sak ang che u te kan ti a. Amaherawhchu, tunah hian 2010-2012 ami tur hi Mizoram Sorkarah an rawn release leh ta a. Chuvang chuan a kal ngaiin a kal mai loh chuan eng emaw khatianga han tih dawn khan Financial Control chi hrang hranga dan leh hrai kha ngaihtuah a ngaih avangin kan la ti thei dawn hrih lo niin a lang a, chu chu a tawpna ka chhanna nisela.

Tin, a pahnihna a tawp lam ami bawh kha. 2010-2011 a sum hi K-Deposit-ah ala awm nual a, engemaw chen release a ni tawh a. Chuvang chuan an thawk tan dawn a, amaherawhchu working season tunah hian a nih loh avangin, a tlangpui chuan K-Deposit atanga Finance-in an release pawh kha ala thawh theih loh

a ni. Tin, tender a ni thin em tih hi Minister changtuin duhsak zawng pe mai ni lovin, a mamawh leh a tul ang kha kan pe a. Tender hi a guideline-in a phalloh avangin, tender kan duh khawp a, heti em ema buaia a kum tela BADP hna dil ringawt mai hmuh hi hahthlak kan ti khawp mai a. Theih se chu tender kan duh a, amaherawh chu Audit objection a awm thin avangin kan tender ngam ta lo a ni. Chu chu MLA zahawmtak Pu K.Liantlinga zawhna ka chhanna a ni.

Tin, zawhna neitu Pu T.T. Zothansanga zawhna kha kum 2009-2010 ah khan nuai 2494.420 Central atangin kan hmu a. Tin, 2010-2011 ah khan nuai 2506 kan hmu a, tichuan nikum khan kan hnathawktute an thawk tha khawp mai a, Sorkar hnathawk pawh. Chuvang chuan additional pawh nuai 424 min rawn pek belh a, chu chuan hna kan thawk mek dawn a ni. A vai chuan nikuma kan hmuh kha nuai 2930 zet a ni. Tichuan, 2011-2012 ah hian nuai 3720 kan hmu a. Nikum lama kan thawh that em avang khan Central Sorkar pawhin min rawn duh sak niin kan hria a, kan lawm hle a ni.

Tichuan, BADP hi engtia rei nge chhunzawm tur tih a ni maw kha? Kha kha chu keini thu a ni lova, Central lam thu a ni a. Kum tluanin hmang thei ila Border area-a awm kan ni a, kan vai hian hmang thei ila, helai Constituency zawng zawng, Zoram pumpui hian kan duh a. Amaherawhchu, a priority te an rawn siam a, an titlem telh telh a, chutiang chu kan ti thei chuang dawnin a lang lova. Central lam thu a ni, a rei leh rei lo chu. Constituency engzatnge a cover tihah hi chuan hemi border area-a block hian Constituency 16 lai a cover a ni tih ka sawi duh a.

Tin, International Boundary hi engtia thui nge tih niin ka hria a. Hei hi kan sawi dan a inang lo thluah a, amaherawhchu, keini sawi dan base line survey kan neihah chuanin Bangladesh ramri hi Km 488.63 a ni a. Hei hi metre ni turah kan ngai a, Km. 488.63 a ni a. Tin Mymmar ram hi Km. 138.51 a ni e.

**S P E A K E R** : Awle, kan zawhna leh chhanna hun a lo tawp a, a dangah kan lo kal ang a. Hei vawiinah Member-te kan kim tlat mai. Kan senior Brig.T.Sailo pawh kan zingah a rawn tel ve thei a, a lawmawm hle a ni.

Tuntum kan Session-a kan Panel of Chairmen turte kha Pu B. Lalhlengliana, Pu Nirupam Chakma, Pu Lalduhoma, Pu K.Lianzuala te an ni.

Tunah chuan Paper lay-na kan lo nei ang a. Paper lay turin Pu H. Liansailova, Minister zahawmtak kan sawm ang a. Heng Paper te :-

- 1) The Mizoram Finance Commission (Salaries and Allowances) Rules, 2010 te
- 2) The Mizoram Money Lenders and Accredited Loan Providers (Regulations) Rules, 2010 te leh
- 3) The Mizoram Public Servants Personal Liability Rules, 2011 te hi House dawhkan ah rawn lay se, i lo sawm ang.



**Pu H. LIANSILOVA, MINISTER** : Pu Speaker, i phalna leh i remtihna in he House zahawmtakah hian heng :

- 1) The Mizoram Finance Commission (Salaries and Allowances) Rules, 2010 leh
- 2) The Mizoram Money Lenders and Accredited Loan Providers (Regulations) Rules, 2010 leh
- 3) The Mizoram Public Servants Personal Liability Rules, 2011 te hi ka rawn lay e.

**S P E A K E R** : A copy kha han sem rawh u le. Tunah chuan 7<sup>th</sup> Report of the Business Advisory Committee ka lo present ang a. Business Advisory Committee hi 24.6.2011(Friday) Dar 11:00 ah khan Speaker Chamber-ah meeting neia thut a ni a. Tuntuma kan session tur programme uluk takin a duang a, Bulletin Part – II No. 138 Dated 24<sup>th</sup> June, 2011-a kan inhriattir tawh ang khan BAC Report chu House-ah ka rawn present a, a copy kha han sem ula. Awle, a copy kan nei tawh a, House-in BAC Report hi kan adopt thei em? Kan adopt thei a, a lawmawm e. Tunah chuan Committee pawimawh tak tak pathum Finance Committee kan tih thin kha, kan inthlan a lo hun ta a, kan danah khan thla 30 atan khan a ni a, chu chu hei kan lo hun leh ta der mai. Public Accounts Committee te, Committee on Estimates te, Public Undertakings Committee te House hian kan thlan tur a ni a, kan dan ang khan, chutah pawh chuan a principle-ah proportional representation by means of single transferable vote tih kha a ni a, kan Dan 250-na, pakhatnaah khan, chuvangin a pawimawh em a. He Motion hi rawn move turin Pu Lalsawta, Minister zahawmtak, Parliamentary Affairs changtu i lo sawm ang.

**Pu LALSAWTA, MINISTER** : Pu Speaker, ka lawm e. He House remtihna in hetiang hian ka rawn move ang e. “ That the members of this House do proceed to elect in the manner required by Sub – Rule 1 of Rule 202 read with Rules of 250, 252 and 254 of Rules of Procedure and Conduct of Business in Mizoram Legislative Assembly to serve as members of Public Accounts Committee, Committee on Estimates and Committee on Public Undertakings, Mizoram Legislative Assembly for a period of 30 months.” Ka lawm e.

**S P E A K E R** : Aw le, Parliamentary Affairs Minister zahawmtakin ti khan thlan tur kha a rawn move ta a, kan Dan ang chuan inthlang tur kan ni a, mahse inthlan tak tak hi kan ti vak lova, member-te atangin nomination siam tur a ni a, Minister-te tellovin, mahse inthlang buai lovin tunhma pawh khan kan insiamrem mai thin a. Nomination atang khan siamrem tum leh mai ila thain ka ring a, ti laiah kan kal tlang pur pur mai ang a.

Tunah hian heng Committee-a han awm thei hi Ruling Party lam atangin 12 an ni a, Opposition lam atang hian pariat an ni a, kan danah chuan member 7 aia tam lo tih a ni a. Mahse, chutiangah chuan khami han awm thei kha an zavaiin 20 a ni a. Committee pakhat kha chu 6 an nih kha a tul hrim hrim ta a. Hetiang hian ka han ruahman ve chhin ringawt a – PAC-ah hian ruling party hi 4 awm ta sela, MNF hi 2 awm se la, UDA 1, a zavaiin 7 a lo ni ang a. Tin, Estimates-ah hian ruling 4 awm

sela, MNF 1 awm se, UDA hi 2 awm thung se la, 7 a lo ni ang a. Tichuan, COPU-ah hian ruling 4 ni se, MNF 1, UDA 1, a vaiin 6. Chutiang chuan kan member-te kan han sem sawm khan 20 chiah an lo ni a, ruling lam 12, opposition lam 8 kan lo ni a. Khatiang khan helam atang chuan ka han ruahman ringawt a. Hei hi kan pawm tlang thei em le? Ngaihndan neite kan awm chuan sawi ila. A tha kan ti mai maw, a lawmawm e. Chuti a nih chuan in Legislature party theuh khan nomination in rawn siam a ngai ta a, office lamah in rawn thehluh a ngai ta a. Vawiin atangin naktuk ni 8.7.2011 tlai 4:30 PM thleng khan thehluhna hun kha hawn ni sela. Hetilaia a member zat tur awm bituk pawh a tul a nih chuan kan office lam atang khan kan la hrilh Chiang ang a.

Tunah chuan hei Official Resolution kan dawng tlat mai a. Naktuk kha chu Private Members' Resolution a ni a, vawiin chu Official Resolution a ni a. Sawrkar lamin pawimawh a ti ngang a ni ang e, Official Resolution a rawn pulut a. Minister zahawmtak Pu Lalsawta, Parliamentary Affairs changtu hnen atangin Official Resolution kan hmu a, move turin i lo sawm ang.

**Pu LALSAWTA, MINISTER** : Pu Speaker, ka lawm e. Official Resolution hi Sawrkar lam atangin siam thain kan hria a, uluk takin kan han ngaihtuah a, chutichuan hetiang hian a thu kan han phuah chhuak a. Kumin hi 1986 atanga kum 25 lai mai remna kan lo neihna a lo nih avangin kan hriat theuh angin a lawmna te pawh Zoram tluanin kan nei a, Aizawlah pawh a lawmna ropui takin kan nei a. Hemi den chhen hian Mizoram remna kan lo neih hlut zia te leh vawn him a tul ziate ngaihtuahin he House zahawmtak hian hetiang hian Sawrkar Resolution/Official Resolution hi nei ila kan ti a ni, hetiang hi a thu a ni e, Pu Speaker "Mizoram kum 25 chhung lai mai Remna leh Muanna kan nei ta hi lawmawm kan ti a. Remna leh Muanna kan neih hi chhung lam leh pawn lam atanga tihchhiat a nih loh nan, mitinte inpe thar leh turin he House hian a ngen a ni" tih a ni.

**SPEAKER** : Awle, Minister-in Official Resolution sorkar lam atanga Resolution kan ti mai ang chu a rawn pu lut a, kan sawiho dawn anga. Remna leh Muanna hi a pawimawh khawp a. Hei in hma a lo thu pawh hi ka'n hawi vel thin a, Remna leh Muanna a lawm berte zinga mi ni tur pawh niin ka inhria a, vawiinah kan han sawi kher kher hi ka rilruah rawn lang thar a awm a. Ni 7.7.2011 a kan han sawi hi ni 7.7.1970-ah MNF mi ka nih avanga DIR 32(5)-ah 1967 April ni 30 atanga ka tan vang vang tawh hnuah ADM-in kum 4 rigorous imprisonment pek ka ni a, House-ah hian kan en thin a, tang ve tawk te chu in awm ngei ang a, mahse rim taka hnathawk tura kawrtial ha a, MNF nih avanga convict hi chu in awm awm lo mang e ka ti a. Kum li convict kha ka awrh a ni. Ni 7.7.1970-ah Gauhati High Court-ah Jail appeal ka bei a, tahchuan kum 3-ah min tihlem sak a ni, chu chu ka dinhmun a ni a, chuvangin Remna leh Muanna hi ka tan a hlu hle a ni tih kha Chair atangin kan sawi hmasa a ni. Tunah chuan kan sawiho dawn anga hemi kan Resolution hi ngaihnam takin han sawi ila a tha awm e. Engtia rei nge hun kan inpek ang le? Minute nga a tawk mai em? A vang chu business dang hi kan la nei nual mai a. Nakinah a tawp lamah hian, a hnukung hnung phungin seh tih ang hian chawhnu lamah hian kan intlanbo san rum mai ang tih a hlauhawm viau mai a. Engpawhnisela, minit sawm aia tam lo ti ila, minit thum leka sawi zo pawh kan awm thei a, lo sawiho ang aw, tunge han sawi hmasa dawn le? In va phar lo

ve, sawiho ngai lo kan ti mai dawn em ni? Pass theih mai em ni? Aw sawi turin Pu J.H. Rothuama, Minister i lo sawm ang.

**Pu J.H. ROTHUAMA, MINISTER** : Pu Speaker, ka lawm e. Remna leh Muanna hi kan sawi thin a, a lawmawm a, nimin lawkah khan Mizoramah pawh kum 25-na champa kan lawm a. Sorkarte leh Kohhrante nen tangrualin Vanapa Hall-ah ropui taka kan lawm kha a lawmawm em emin ka hria a. Kan ramah hian engvanga Remna lo ngai ta nge a nih tih thangthar tam tak hian an hre tawh lo a ni. Kan Speaker zahawmtakin a sawi ang khan kei pawh Jail-ah Christmas wawi nga (5) ka hmang a. Tin, 1965 khan tuna Bangladesh kan tih takah khuan East Pakistan a la ni a. MNF khan palai turin min tir a, haw leh mai tura kan ngai kha April-a kan kal kha July thlaah kan kir leh thei chauh a. Tahchuan Pu Lalthangliana Philips, boral ta nen khan kan kal a ni. Chumi kum vek chuan Pu Hawla te thiandun hi Pu Biakchhunga nen, tuna kan Chief Minister zahawmtak hi Burma-ah palai tura tirh chhoh an ni bawka. Chutiang chuan MNF movement kha a bulte atangin a bul tantute zinga awm kan ni a. Tin, ram pawnah te kan lo kal ve a, buai kum pawh khan Bangladesh hi East Pakistan a la ni a, lut thlain midang kha an lo dan vek avangin kan President Pu Laldenga kha hmuh theih a ni lova. Kei kha a hma te a lo kal tawh ka nih avangin min tlang thlak tir a. Rangamatiah, Chittagong-ah 1966 Good Friday, kha ka hmang a. Tichuan, anni nen inhma in, Burma lamah min tir chho leh a, Burma Sorkar leh a tul chuan khawchhak lama kal chho turin. Amaherawhchu, Burma Sorkar khan India palai an ngam loh avangin min hreng a. India-ah Pu Hrangnawla nen min thleng tawp mai a, ani Burma MP India rama awm, kei Burma lama awm kha kan inthleng tawp mai a ni. Min thleng tawp mai a, ramri-ah min hlan a. Tiang chuan India Jail-ah reitak kan awm a.

Tin, kan ram buai khan Mizo zawng zawng MNF-ah min ngaih avangin a hnam ang khan kan buai ringawt mai a. Mi State buai dan ang pawh kan ni ve lova, chuvang chuan kan tawrhna kha a nasa em em a ni. A hre phak ho chin, tuna upa deuh ho chin chuan zan engemaw zah sawi tur hi chu kan pai theuh mai a, han sawi khawm pawhin. Mahse thangthar hian tunah hian khang buai awmzia te, India leh MNF indo chhunga thi tam zia te leh khua min khawm a, kan duhlohna khua-a min dah te, kan economics-a wawiin thleng pawha kan la tawrh zel lo thleng ta ang te kha an hrethiam lova, tin, curfew awmziate hi an hrethiam tawh lo a ni. Chung karah chuan remna a awm theihna turin theihtawpin kan lungin tang chhuah hnuah kan bei chho ve leh a. Delhi-ah kei ngei pawh wawi engemawzat ka kal a, Prime Minister-te kan bia a, a changin Home Minister te, a changin Pu Laldenga te lam team kan be bawka. Chutiang chuan palaiin wawi engemawzat Delhi-ah ka kal ve a ni. Chutiang ang zawng zawng hnua hetiang remna a lo awm hi rambuai tuar tawh tan chuan thil lawmawm a ni tih hi kan thangtharte kan hrilh leh a ngaiin ka hria a. Wawiina House-a thu chin pawh hi khatih laia naupang te te la ni te kha kan awm tawh a ni a. Chuvang chuan, he remna leh muanna kan lo neih a, theihtawp chhuaha ram development ngaihtuah theia kan han awm ta hi a lawmawm em em a ni. Chuvang chuan remna lo buaipuitu zawng zawngte, a bik takin Mizoram Congress kan han tih thin te, bang thei hial khawpa an nihna te lo kian a, khatiang hun an lo pe thei te kha a lawmawm zual a. Khatiang a awm loh chuan inthlang ram kan ni a, nihna kan ken theih loh kha chuan remna kha a awm theilo a ni mai a, hei hi thudik a ni.

Chuvangin, remna a lo awm theihna tura insaseng thei Chief Minister kan lo nei te pawh kha vawiinah hian House hian kan chawimawi a phu hlein ka hria a.

Tin, a lo bei hah tute zawng zawng Mizorama political party-a senior hote, vawiinah chuan tam takin min awmlah san tawh a, khang senior tak tak hote zawng zawng kha, kan ram remna leh muanna atana, hma lo latu an ni. Tin, a bik takin vawiinah hian he House ah hian kohhran ho hmalakna pawh kha sawi tel ngaiin ka hria a, kohhran hoin hma nasa takin an la a, theihtawp chhuaha Prime Minister-te zuk bia a, an feh chhuah chhan a awm a. Tin, Mizoram lam, kan MNF unau te bia a, an fehchhuah chhan a awm a, chutianga palai hnuah vawi engemaw zat an thawh hnuah, inbiaknate pawh kha lo awm leh thei a ni a. Tin, he remna leh muanna alo awm theihna tur hian kei ni PC 'B' MLA pali te khan, MNF in inbiakna alo tawp a, Central nen inbiak theih tawh loh hnuah khan, MLA te hi opposition lamte hi lo bang thei ula, he inbiakna hi a tan leh thei ang a, tiin minrawn ngen hlawm a, tah chuan keini PC 'B' MLA 4 khan banna thelutin remna leh muanna alo awm theihna tur atan khan kan MLA nihna te pawh lo hlan ve tawh te kan ni a. Chuvangin he ram buai hi a bul te atanga vawiin thlenga la hretu, tin remna a awm leh theihna tur leh a kap tur zawng pawha theihtawp lo chhuah tute zinga mi ka nih ve avangin, he remna leh muanna kan neih thu a Resolution anrawn pulut hi lawmawm ka ti a, chu chu ka sawi ve theih chu ni rawh se. Ka lawm e. (SPEAKER : Pu John Rotluangliana)

**Pu JOHN ROTLUANGLIANA** : Pu Speaker, tawi te a ka rawn sawi ve duh chu vawiinah Remna leh Muanna kum 25-na, a Silver Jubilee kan han lawm ta mai hi a ropui ka tiin a lawmawm ka ti a. Keini naupang deuh te chuan, ka hma a, kan senior-te sawi ang khan ram buai pawh kha kan hre mumal vak lova. Engvanginnye kan ram a buai tih pawh kha tuna thangtharte chuan an hre lo leh zualin ka ring a. Kha tih hun lai khan kan MNF unauten independent an puang a. Mizoram lak hnan tumin India Sorkar an kar kha a ni a. Kan tlangval laiin kan thianpa MNF returnee in a sawi ka hre reng a. 'MNF ah kan tang a. independent kan sual a, ramhnuaiyah kan kal a, khaw enzawn hian kan kal a. Khua kan thleng dawn a, kan hel leh a, MNF tan chuan kan kal kan kal mai a ni a ti a. A tawpah sipaiin min han man a, Jail-ah kan han tang chu Nilaini leh Chawlhni te a inang vek a, Krismaste phei chu kan zai tui duh phian a', a ti a. Kha, kan senior zahawmtak khan kum 5 lai Krismas a hmang a. Kan thianpa'n, 'Jail-a Krismas kan han hmang hi chu kan zai tluk tluk mai a, in hawsan hni hne hi a awm lova, kan tui duh khawp mai,' a ti a. Chutiang chuan kan MNF unaute khan independence an puan avang khan India sorkar nen inkapin ram a buai a ni. Buai lai kan han ti ngawt a. Vawiin-a kan fate chuan Buai lai kha an hre tawh lo reng reng. Remna leh muanna kan han tih pawh hian engnge remna leh muanna chu an hre lo reng reng a. Kan buai tih hre lo hlir kha an nih tawh avangin remna hlut zia pawh kha an hre lo reng a ni.

Keini kan tleirawl ve lai pawhin ram a buai a, curfew a ni a, keini chu bazar bula awm kan ni a. Rambuai lai te khan engnge ni an tlan chhiat chhan pawh hre lo, an tlan huk ringawt mai a, bazarah sawn. A hre hnukung hnung kha kan tlan chak kha a ni ringawt mai a. Chutiang chuan ram kha a buai ringawt mai a ni. Tu ber nge kan hlauh pawh kan hre lova, Special Force kha nge kan hlauh a, MNF pawh kha kan hre lova. Pistol kawnga thiat thei kha an tam bawk si a, kan ram kha a buai a ni. He hnam hi tuboh leh dolung inkarah kan awm a ni. Chuti karah chuan political party hrang hrangten Remna leh Muanna tih hi Policy No.1 ah neiin Zoram dung leh

vangah an lo au pui ve a. Party dangte pawhin remna leh muanna tih hi anrawn tui pui hmasa ber a ni thin. Amaherawhchu, he remna leh muanna tluantling awm tur hian mahni lalthutlheng ken a, MNF unaute ramhnuaiia awm kha hruai luh an ngai a ni. Chumi ti thei tur chuan kan hotuten hma nasa takin an la hlawm a. Politics-ah kan luh ve tirha kan hotupa pakhatin thu a'n sawi tak tak chu ka hrereng thin a. Longkora atanga a tan tawh chuan darkar 2 hi a ni hrim hrim tih fiamthu a kan sawi thin te kha vawiinah hian ka rilruah a lo lang a. Chutiang chuan remna leh muanna ringawt mai kha thusawi zawng zawngin an sawi, Zoram dung leh vanga an sawi a ni. Amaherawhchu lalthutlheng han neih chiah hian remna leh muanna atana inpek ai chuan mahni sahmim puarna atana kan hman fo thin avangin kan rin aiin Zoram mipui ten remna leh muanna kan nei lawk lova. Kan hnam a mangang a, kan kohhran a mangang a, tawngtai rualna nen he remna leh muanna hi kan au a ni. Tichuan Congress party a lo sorkar a. Congress party kha remna leh muanna policy No. I a neitu party a ni a. Tichuan kum 1986-ah vawiina Chief Minister zahawmtak Pu Lal Thanhawla CM anih laiin a Lal thutlheng kianin remna maichamah a inhlan a, vawiinah hian Zoram mipuite hian remna kan nei thei ta a nih hi. Hei hi a hlu a vawiinah hian infak derna lam ni lovin thil dik tak he House-ah hian kan sawi a ni, kan ramin a kum 25 lai remna kan han nei hi a lawmawm em em a, he ram hi India ram zingah ralmuang ber state kan lo ni hi a lawmawm takzet a ni. Vawiinah remna leh muanna hnuaiiah development pawh chak taka kalpui turin kan sorkar chak takin ruahmanna a siam te hi a lawmawm a, remna leh muanna a awm loh chuan development a kal thei lo anih kha. Chuvang chuan tunah hian remna leh muanna kum 25 kan lo nei ta e, a lawmawm a. Hetih laia kan sorkarin resolution a rawn pulut hi a lawmawm ka ti a, pass ngei chi niin ka hria a. Tin, remna leh muanna hi tibawrh bang lova vawn him zel anih theih nan he House-in kan pass hi ka duh a, chu chu ka rawn din chhuahpui ve a ni e, ka lawm e.

**Pu K.LALRINTHANGA** : Pu Speaker ka lawm e, vawiina Mizorama kum 25 zet remna leh muanna kan nei thei ta lawmawm zia sawi thei ka awm hi ka lawm a. Remna leh muanna hlutzia sawi tur hian a tuartute tawrh dan hi sawilan ve a ngaiin ka hria a. Rammbuai tan tirh 1966 lai khan MNF kal hman loh chiah kumin a la phak loh avangin mahse a awmzia hre pha chinah khan ka awm ve a. Chuvang chuan thil sawi tur eng engemaw nei vein ka inhria a ni.

Khang hun lai khan lehkha zir kan ni a, chutia lehkha kan zir chu rambuai a lo ni ta a. MNF in Mizo naupangte India dan hnuaiiah lehkha zir an phal tak loh avangin lehkha zirate pawh lo bansan a, naupang chung chung a hlo lo thlo ta kha kan ni ve a, naupangten lawmte kan nei ve a, chutiang chuan kan eizawnaah te kan tlan chho ve thin a. Chutianga kan awmlai chuan PWD hnuaiiah te labour ten kan tang ve bawka. Sipai awpna hnuaiiah kan awm a ni a, khaw karkawngah te hna kan thawk a. Chutihlaia kan tawrhna pakhat han sawi lan ka duh chu, PWD labour-a kan awm a, bawngtuthlawh kan put laiin Mara unau pakhat hi sipaiin anrawn man a, chu chuan thiante a nei a. A ni khan keini la naupang deuh chu pawilo ah a ngai a niang chu, sipai hmuh lai khan "ka thiante in lo hmuh chuan sipaiin an man tiin min lo hrilh sak dawn nia", a ti a. Chutia an tih vel leh, an hotupa khan "kia bolta, kia bolta", tiin a pheikhawk khan a tlawh zawt mai a, keinin engmah kan sawi ngam lo a ni, chutiang chuan min awp bet a. Kan khaw chan chin han sawi

leh ta ilang; 1966 kumah ramhuaiah khan Tawipui khua tlangval ten MNF an zawm ve a, ka thinlungin a zuk hmuh chu, kan nu leh pa leh khawtlang ti ti te han ngaihthlak chuan, tlangval lehkha zir tha peihlo deuh te, hnathawk tha peihlo deuh te kha an kal tlangpui a ni tih an sawi duh hle. Chutichuan, rambuai a lo nih khan Tawipui khua chu MNF tawmkhawmna khua a ni a. Chutia an tawmkhawm chuan Lunglei atanga Lawngtlai rawn pan tur sipai rawn kal kha Minpui daih an lo ambush ta a. Chutia an ambush-naah chuan MNF khan an hneh ta mang si lo va, anni kha an tawlhkiang ta a. Sipai tam zawk an rawn thlen belh ta a. Chutia an rawn thlen belh takah chuan Tawipui khua leh a chhehvel ramhnuai kha sipaite khan an rawn dap ta a. Chutianga ramhnuai an rawn dap chuan, “Tawipui khaw dai pawh an rawn dap dawn e”, an ti a. Ramhnuai-a kan bungrua chhek khawl sipaiin min hal sak ang tih te kan hlau a, kan la let leh a. Tuk khat chu, chawlhni tukah hian zing thawhhlimah tlang lam atangin sipaiin min lo hual vek tawh mai kha alo ni a. Mipui kha min khawm vek a, Tawipui khua kha hal a ni ta a ni. Zing thawh hlim kawr ha kha kan nia, engmah chuh lovin khatiang khan min hal sak fai ta vek a. Sikul pakhat (zirtirtu tawnglet tu-in) a thelh hman a, in pahnih dang a thelh hman bawk a, chung zawng chu kang bang te an ni a. Chutianga chuan kan lo tuar a. Lo kan nei a, lo kan neih pawhin ramhnuai hlo thlo in riah min phal sak lo a ni. Lo te chu vah min phal sak a, buh hmun va thlawh te pawh min phalsak a, ramhnuai hlo thlawh te min phalsak lova. Buh kan han thara, chutianga buh kan han thar pawh chu riaka seng kha min phal sak lova. Chutianga chuan mi thenkhat in pawh an khawih avangin sipai ten harsatna min siamsak a, mangang takin thingtlang mipuite chu kan awm thin a ni.

Chutianga kan kal zel hnuah chuan lehkha zir tura hmun danga kal ve te kan han chak a. Champhaiah lehkha zir turin ka kal a. Chutia kan kalna ah chuan (kan la tlangval chiah lova) kalkawng tluanin pass neih a ngai a ni. Khua kan thlenna apiangah sipai in report a ngai a, kan chhuah dawn apiangin in report a ngai bawk a.

Chutianga chuan Tawipui atanga Champhai kawng kan han kal pawh kha kein kan kal a. Rambuai anih avang khan Champhai kawng pawh enkawl theih a ni lova. Motor a tlan tawh lova, kein ni 5 kan kal a, Tawipui atangin lehkha zir turin kein Champhaiah kal a ngai a. Chu chu rambuaiin a nghawng avanga kan tawrhna, ke-a kal alo ngaihna chu alo ni ta a ni. Chutianga chuan nasa takin harsatna kan lo tawk a.

Chutih rual chuan ka han sawi duh chu, Congress Party-in “Remna lamtluang” kan chhuah a. Chumi ziaik tur chuan ‘Congress mi leh sate hian i ziaik lovang’ kan ti a ni. Congress mi leh sa ten kan ziah chuan, Congress lehkhabu chhuah a ni si a. Mipuiin an chhiarin, a hlutna kha an ngai hniam palh ang e, tih thinlung neiin remna alo thlen theihna tur atana hnathawktu hote kha lehkha kan ziah tir a. Kohhran lampangah Presbyterian unaute atang te, Baptist unau atang ten kan ziah tir a. Tin mimal anga lo thawktute lehkha kan ziah tir a. Chutah chuan ka hriatreng chu thil pakhat Rev. Zairema hnenah kan kal a, chuta a lehkha ziah ah chuan, ram buai dawn khan rambuaina siamtu tur MNF party hotupa a rawn kal a; “Nagaland-ah te chuan rambuai a ni a, hei ramhnuai hlo thlawh kal kan tum ta a, kan kal hnu ah remna a awm theihna tur atan hma i rawn la thei a ngem tiin min zawt a ni,” a ti a. Chu chu remna kan zawhna lamtluang kan ziahah pawh khan a rawn ziaik lang ani. Chutianga chuan ramhnuai kalte pawh khan, remna kha an kal hlim atangin an lo duh reng a ni a. Mipui a tuartute pawhin remna a awm theihna turin nasa takin kan tawngtai a. Kohhrante pawh an tawngtai a, Association hrang hrangte pawhin remna awm theihna

turin hna an thawk ta a ni. Chutianga hnathawh anih lai chuan Pu Speaker, mi tam takin hna an thawh laiin mi tangkai bik an awm a ni. Remna a awm theihna tur atana tuna MoU an sign hi tunhmain sign sa vek a ni a. Amaherawhchu, mi thenkhatin Lalna an duh avangin remna leh muanna kha a awm thei lo a ni. Amaherawhchu, Congress party hotupain seat a ken theih avangin remna leh muanna hi awm a ni tih hi ka tarlang duh a ni. A hmainsorkar dangte pawh a awm a, mipuiin remna kan duh, kohhranin kan duh, ramhnuaia awmte pawhin remna an duh, India sorkar pawhin a duh a. Remna leh muanna a awm theih nan hming sign tawh pawh a ni. Mahse remna leh muanna a awm chuang lo. Khatih hun lai 1986-a Chief Minister zahawmtak Pu Lal Thanhawla khan a seat a ken theih avanga remna leh muanna hi awm a ni a, a lawmawm ka ti a. Tun thlenga remna duhtuten remna leh muanna kan nei chho ta hi lawmawm ka ti a, he House hian lawmthu kan sawi hi kan tih tur niin ka hria. Ka lawm e.

**SPEAKER** : Pu P.P. Thawla kan ko ang a, a dawtah Pu K.S. Thanga.

**Pu P.P. THAWLA** : Pu Speaker, ka lawm e. Pu Lalsawta Minister zahawmtakin, “Mizoram kum 25 chhung lai mai remna leh muanna kan nei ta hi lawmawm kan ti a. Remna leh Muanna kan neih hi chhunglam leh pawnlama tihchhiat anih loh nan mitinte inpe thar leh turin he House hian a ngen a ni” tih hi tu member tan pawh hnial em em tur awmin a lang lova, thil tha tak mai, resolution lawmawm tak niin ka hria a, churangin lawmawm ka tih thute, tha ka tih thute tlem han sawi ve ka duh a ni.

Kum 1966 March thla buaina a lo chhuah dawn lai khan kum 16 tleirawl vel mi kan ni a pawl 6 kan zir lai a ni a. Tuipangah Hockey tournament a awm a, champion ngei tura kan inrin laiin buaina thawm khan kan tournament kha min tihtawp sak ta, a uiawm kan ti hle a ni. Champion mai tur ni a inngai a final-a chak kan chak hle tawh laia buaina lo intanin min tihtawp sak tak kha a pawl ka ti khawp mai. Tleirawl kan tan a, a ruka nu leh pate hriat loha nula rim kan han tan dawn lai vel tawh a curfew lo awm thin, nula rim hlei thei loa min siam thin kha a hrehawmin a buaithlak ka ti ve khawp mai a. Ringtu tam tak ten beihruah thlaah te leh hmun tam takah fak a, zai a, zaikhawm te nuam kan ti a, kan chak em em thin laia buaina lo awm tak avanga zaikhawm hlei thei lova mahni ina zan tin tawm mai te kha thil hahthlak leh hrehawm tak mai a ni bawka, chutiangte chu buaina chungchangah ka han tarlang duh a ni. Engpawh nita sela, Lal Isua Krista lo pian lai khan buaina chawka chhuak turin alo piang lova, Pu Speaker, khawvel chhandam turin alo piang a ni. Mahse alo pian veleh khan a pianna ramah buaina a chhuak a, mipa kum 2 hnuailam zawng chu tihhlum vek tur a ni tih kha order a ni tawp mai a ni. Ka mitthlain ka suangtuah thin a, nupa thenkhat chu an fa kum 2 mi mipa an nei ngei ang a, phir ni hlawm ta sela, a chhang pawh kha lo piangin mipa kha lo ni leh ta bawka si sela khatih lai khan, tute emaw chhungkua, tute emaw nupaah chuan mipa pahnih emaw pathum lai te emaw an chan kha a ngai kan ring bawka. Churang chuan a rapthlak dawn em emin ka hria. Mahse chu chu Isua Krista pian chhan a ni miah lo, tute emaw khan buaina an lo chawka chhuak ta mai a ni.

Nia, buaina chungchang kan sawi a, MNF party alo pian chhan pawh kha, Zoram tibuai tura piang chu a ni hauh in ka ring lem lova. Zoram leh Zo Hnam chhan chhuahna hna thawk tura piang a ni. Mahse an han kal zel chu chhan leh vang tam tak avangin buainain kum 20 chhung zawng kha hrehawm tam tak kan lo tuar ta a. Tlangval upa kan nih thleng khan buaina a in chhonzawm ta mai a ni. Chutiang chu kan ram awm dan kha a ni.

A dawl leha ka sawi duh chu Pu Speaker, khatiang khawp khan Pathian hnam thlan Zoram leh mipuite khan buaina leh harsatna lungngaihthlak tak mai kha kan lo tuar chhuak a ni. Hetianga kan awm reng kha Pathianin tha a ti lova, remna chu min chawh chhuah sak kha a tum ta a. Chumi tur atan nimin June ni 30 a remna ni lawmna hun kan hmanah khan thusawi hrang hrang kan hria a, kan Pastor lam thusawite kan han ngaithla a. Chuvang chuan, Zoram in kum 20 buaina kan tawh tawh hnu leh kha kha kan paltlang kan experience tawh hnuah remna rama kum 25 kan lo kal theih nana Pathianin hna min thawhsak dan hi a ropui hlein ka hria. Thlarau lama kan hotute Pastor-te zawng zawng pawhin an rawngbawl hna pangngai piah lamah remna a awm theihna turin sorkar tam tak an lo dawr kual a, an lo tawngtai baw a, party tam tak an lo dawr kual baw a, chutiang chuan nasa takin tan an lo la a. Chu mai pawh nilovin Zoram-a UT kan nih a, sorkarna lo chelh hmasa ber kha Mizo Union mah nisela Congress-a chhonzawm a ni ta a, kha sorkarna chelh hmasa ber tute khan 1986 vel khan sorkarna an lo chelh leh ta a. Khatah khan remna leh muanna a awm theihna tur atan mahni dawhkan kian a remna duh avanga in hlan kha thil har tak tur chu a ni. Amaherawhchu, chutiang ti thei tur chu Pathianin ram hruaitute min lo pe. MNF hruaitute lam ka han ngaihtuah pawhin kum 20 vel lai buaina an lo tawh tawh a, khang zawng zawng tlawm san a, an tum ni hauh lo State lo luh pui tura an lo haw dial thei pawh kha han in chantir ila thil harsa tak tur chu a ni. 1976 a agreement sign hmasak khan an phel phawk mai a ni, an inrem thei lo. Mahse, 1986 inrem dawn meuh kha chuan Pathian thlarauvin ramhnuai lamah khan harhna a thlen tir a, chu harhna avang chuan 1986 remnaah chuan tumah phel tawh lovin lungawi takin an lut khawm leh vek a ni. Khatih lai khan PC Party lam atanga an lo in pekna zawng zawng kan lo ngaihthlak tawh kha, ZNP leader lam inpekna pawh kha sawi tur a tam hlein ka hria.

Chuvang chuan, he remna lo awmna chungchangah hian tute mai pawh hi kan lo pawimawh vek mai tih kha vawiinah hian a thara hriat theihin a lo lang a. Chuvang chuan, hetiang taka remna duhawm tak mai kan lo nei thei ta hi politics lama ram rawngbawltute zawng zawng hian politics kan kalpui zelnaah hian rilru chhia pu lova, tute emaw sawisel ringawt mai hna a nei lova, rilru thianghlim tak pu a ram rawngbawl hna kan thawh zel hi ramin remna leh muanna a chhonzawm theihna atana thil pawimawh tak a niin ka hria. Chumi entawn chuan kan ram mipui zawng zawng pawh hi kan khalh theuh anih chuan kan ramah hian remna leh muanna tluantling hi a awm chhonzawm zel hi ka beisei a. Chumi tur chuan he House zahawmtakah hian he resolution hi lungruah taka kan pass zel pawh hi thain ka hria a. Chumi rual chuan ram mipuite pawh hian chhungleam leh pawn lama tibuitu nilova remna leh muanna tluantling kan chhawm chhonzawm zel theihna tur atana inhlam thar leh hi kan zavaia mawhphurhna a ni tih vawiinah hian rilruah a



chiang thar hle a, chuvang chuan resolution hi tha ka tih thu leh ka thlawp thu ka sawi ve a ni e. Ka lawm e, Pu Speaker.

**S P E A K E R** : Pu K.S Thanga, a dawtah Pu Lalthansanga.

**Pu K.S THANGA** : Pu Speaker, ka lawm e. Vawiina Official Resolution kan Minister zahawmtakin a rawn move a hi Mizoram kum 25 chhung lai mai remna leh muanna kan han nei ta hi lawmawm kan ti a, remna leh muanna kan neih hi chhung lam leh pawn lam atanga tih chhiat a nih loh nan mitinte inpe thar leh turin he House hian a ngen a ni tih hi ka'n support duh a.

A hmasain a pakhatna atan ka sawi duh chu, kum 25 chhung remna leh muanna kan neih lawmawm dan hi tlem han sawi hmasak ve ka duh a, venhim a ngaihna lai kha ka support baw ang a, a point hrang deuh in kan sawi duh a. Hmanni deuh khan Mamitah zirlai tithate chawimawina khulai District MZP hruaitu ten an buatsaih a, kan kal a, tah chuan Aizawl lam atang pawhin zirlai hruaitu thenkhatte an kal a, thu kan sawi a, chuta thusawitu pakhat zirlai hruaitu khan, development-te hi titha mah ila kan ram hian nationalism lamah te, kan ramah te, kan hnamah te, kan ram humhalhna kawngah te kan chian loh chuan, development hian awmzia a nei lo ti lek lek lampang khan thu a sawi a. Chuta tang chuan kan thalaite pawh hi remna leh muanna, hun harsa kan neih leh kan tawrh ram thim hre tawh lo hian development hlut zia te pawh hi hre lo te pawhin a awm theih dawn ni te pawhin ka hria a, chu chuan ka ngaihtuahna a ti thui khawp mai a.

Pu Speaker, a hmasa bera ka sawi duh chu vawiinah hian mi hrang hrangin kawng hrang hrangin he ram buai kum 20 chhung kha kan tuar a, mi tam tak nunna chan a ni a, Mizo mite, tin, India khua leh tui Mizoram state pawn ami te pawhin nunna tam tak kan chan a ni. Thihna tuar lovah chuan keini pawh hi a mimal tak pawhin a tuar ve pawl niin ka in hria a. Ka pa hi sawlai Sateek tlangdung a khatih laia MNF Commander anih avangin 1967 ah man a ni a, 1966 ram buaihan khan kan la naupang a, tichuan kum nga chung jail min tan san hnu khan, naupang hnathawk rual tak tak kan la ni lova. Tunlaia Africa ram te leh khawilai ram T.V a kan lo hmuh te dinhmun ai hian khang laia ram buai tuartu naupangte dinhmun kha a chhiain ka hria. Kan ei leh in te tunah chuan khawvel hi harsatna leh tamna hmunah an tangrual tawh a, engkim kan inpawh tawh a. Chuvangin, khawvel a tangrual a, Africa rama tawrhna berah pawh khuan an mamawh engemaw chen chu an hmu a ni. Keini chu thawktu awm lova, pa te lung in tan san kan nih chuan vawiinah hian engtinngan kan dam khawchhuah tih hi sawi ngam pawh a ni lo zawk a ni. Chutiang chuan, vawiin thlenga kawchung tha lo kan neihna chhan pawh hi khang laia ei tur chhe lutuk leh dam ve hram hramna tura kan ei khan vawiin thleng pawh hian khanglai huna naupangte hriselna hian a tuar a ni.

Tin, a mi mal takin kei ngei pawh hi zirlai hruaituah 1980 atangin College kan kal chho ve khan, khanglai huna MNF hruaitute min ngenna in Remna leh Muanna au puiin zirlai hruaitu hna hi Mizoram pumah kan lo thawk ve a. Khanga kan lo kal chhohnaah khan Sorkar hruaitute tumah huat tur an awm lova. Thing leh rua innawh lai a ni a. In hriatsualna avangte, politics kal vungna a vangte pawhin, kei ngei pawh hi zirlai hruaitu ni si, MNF ni miah si lova, luman siam sak te pawh ka lo

ni ve a. Chutiang chuan, Bangladesh-ah pawh khat dawn ka raltlan a. Tin, khang lai a MNF in thu ro rum tak tak an chhuah thin lai 'Quit Mizoram Order' tih te leh thil dang dang order an chhuah lai pawh a, ramhnuaiah MNF ni si lovin, loh theih lohna avanga an zinga awm ve a, rawtuai leh chaw chhia ring a, MNF zingah khan awm ve ka ni.

Tin, man ka ni a, zirlai hruaitu ni si, sawisak avangin Damdawi Ina admit ngai khawp te ka ni a. Chutiang chuan, kum khat leh a chanve chuang Jail-ah ka tang leh a. Tuna kan Chief Minister zahawmtak ni ta Pu Hawla sorkar hmasa berah khan khatih hun laia Jail tang zawng zawng zinga case ngah ber, case 13 ka nei a. Under section leh tih te chu a tam lutuk a, 121,120 (b) IPC, 307, 302 ah Murder Case, Arm Act leh a dang te India rama Case-a hautak thei ang ber chi zawng zawng hi ka Case-ah khan pek loh a awm lo a ni. Amaherawhchu, Remna leh Muanna atana hma latu kan ni a ni tih hriain, Pu Hawla sorkar lo ding khan a thuthlung tihlawhtlinna zing atan bail-in min chhuah chho ta kha a ni a. Chutiang chuan, remna leh muanna kawngah hian vawiina sawi ve phal lote leh sawi ve phate pawh mi tam takin rapthlak tak an paltlang a ni. Tin, chumi karah chuan thihna leh thil dang, kan tawrhnat dan a inanglo a. Amaherawhchu, tam tak chuan vawiin thleng hian an chhiat phah a ni.

Chungah chuan vawinah hian lawmawm kan tih chu, pawl hrang hrang abikin hmannah pawh khan lehkhavute kan chhuah a. Kohhran lam atangte pawhin mi hrang hrangin an ziak kan chhiar a, mi hrang hrangin Remna leh Muanna atan hna an thawk a. A bik takin khang hunlai a bul atanga Kohhran hruaitute, Peace Committee leh thil hrang hrangin hmalakna nasa tak a kal a. Tin, Political party hrang hrangte pawh hmalakna a kal a, tiang chuan keini Zirlai Pawl ngeite pawh kha mahni in tawrh phah khawpin, tam takin lung in tan phahin, harsatna tawkin kan lo ti tlang baw a ni. Chunglo tepawh chu mimal ang te, pawl angte pawhin beitu kan tam ang. Chutiang chuan kha hun thim tak mai kha mi hrang hrangin thawk thin mah ila, a hlawhtlinna awm thei chu lalthutthleng tel lovin MNF te an rawn haw thei si lova. Chumi chu ken anih hmaa lalthutthleng pek anih loh chuan Mizoramah khan vawiina an rawn hawn ang hi a hmate pawhin rawn hawn theih a ni. Kan hre vek a ni engkim, thuhruk theih a ni tawh chuang lova. Mahse, lalthutthleng an mamawh a, ram a buai laia mi harsatna laka an hmaiphihna te pawh a ni ve ang chu, thil hrang hrang a ni ang. Engpawh nise, lalthutthleng an rawn mamawh a ni. Chuvang chuan an lo hawnna turah hian an lalthutthleng rawn luhna tur lo siamsaktu kan mamawh a. Chuvang chuan chu rambuai kum 20 hrehawm taka kawng chi tina kan tawrh chu, a kawng awmchhun a chu Chief Minister nena lo haw a ni mai a ni. Chumi tur chuan mihring kan ramah kan nei tlem hle a, mahse nichina ka hmaa Member zahawmtakin a sawi ang khan Pathianin mihring ropui tak mai min pe a, Pu Lal Thanhawla, vawinah pawh Chief Minister lo ni leh ta hi. Mahni lalthutthleng namkiang a, vote khat mah hmulo a Chief Minister midang nih tir thei tur khan Pathianin a thinlung alo buatsaih a ni a. Chung chuan vawiina remna leh muanna kan tih tak hi a rawn thlen thei chauh a ni. Chu chu vawinah hian kan dinhmun alo ni ta a.

Thangthar tam takte pawh hian tunah remna leh muanna kan neih hnu pawh Silver Jubilee kum 25 kan lawm tawh avangin khang hun laia tuartute tawrhna leh a rapthlak zia kha thalaite leh mi puitling lehkhathiam tak takte pawh hian khati lama history emaw research an zu zir chian loh chuan an hre thei tawh lo a ni. Chuvangin vawinah hian remna leh muanna hlut zia leh vawn him a pawimawh zia Resolutin-a kan Minister zahawmtakin a rawn

pulut hi lawmawm ka ti a. Chumi remna leh muanna siamtu tura Pathianin kan ramah mi ropui tak a lo siam a, mahni dinhmun kian a, mite tana malsawmna siam theitu Pu Lal Thanhawla he ram hruaitu tur atana min lo pe kha he hnam tan hian malsawmna a ni a. Vawiin thleng hian thangtharten a zar kan zo a ni tih hi hria ila thain ka hria a. Chu chu han sawi ka duh chu a ni. Keini pawh chuti khawpa tuar a, zirlai hruaitu ni chung a chuti khawpa tuar ve ni mah ila, keini thiltih khan awmzia a nei lo. Lalthutthleng kha a ngai tlat a ni. Chuvang chuan Pathian pawhin mal a sawm niin ka hria a. Mizorama Chief Minister ni rei ber leh eng chen nge a la nih zel dawn, ni tam ber, a hun pawh tam ber, khatiang tur khan Pathian malsawmna pawh a dawng a. Remna siamtute malsawm an nih tur thute pawh kha Bible-ah kan hmu a ni. Vawiinah a takin kan hmu a. Chuvang chuan heng remna leh muanna kan neih, a kawng harsat zia leh tawrhna rapthlak zia hre tur hian tunlai kan thalai hre ve tawh lo hian tunlaia Politics infuihna leh awmze neilo a infuihpawrhna laka kan fihlim a, awmze neia remna leh muanna hi kan vawnhim a, kan ram hi hmasawn zawnga development kan kalpui a, he ram hi Pathianin min pek a nih ang hian, kan remna leh muanna neih sa hi i vawng him zel ang u. Ka lawm e

**S P E A K E R** : Pu Lalthansanga i lo ko ang.

**Pu LALTHANSANGA** : Pu Speaker, ka lawm e. Vawiina kan Resolution, remna leh muanna kum 25na hmang thei tura min hlangkaitu Pathian leh mipuite chungah lawmthu ka sawi a. Tun ang hun tha hetiana kan nei hi lawmawm ka ti a.

Mizoram hi han en hian, Vailen vawi-1-na leh vawi 2-na te kan lo nei tawh a. 1875 leh 1870 chho velah Mizoramah, keimahni duh vang ni lovin, sap hoin kan ram encroachment min rawn tih vangin harsatna kan nei a. Kei ni'n kan ram independent rama kan lo chhiar thin kha, min rawn tihbuai tak avangin, thingpui huan te min rawn siam hnan a, chumi duhlo chuan kan lalten nasa takin an lo bei a. Chumi atang chuan Mizote hi moral destruction, kan rillru hi tihchhiatin kan awm chho tan tlat a ni. Tichuan Vailen vawi 2 - na 1888, tuna Aizawl kan tih, kum 100 - na Centenary pawh kum 10 chuang zen zawn alo nih tak, 1898 chutiang chho atanga lo din thar leh te an lo nih te, chuvang chuan kan ram hi eng ang chiah hi nge a dinhmun tih hi insawisiak dawn ta ila, sawi tur kan hre awm hlein ka hria a. Kha nichin ah khan kan senior te ho leh kan Speaker zahawm tak te pawhin an rawn sawi a, a sawi awm deuh niin ka in hria a, tilai tlara mi ho hi chuan ram buailai kha chuanin nu leh pate hoin min puak hnawh hnawh emaw min kaih hnawh hnawh emaw, thenawm te inah te mangan laia lova kal tawh vel emaw te kha kan la ni a. Chuvangchuan thangtharte in han tih ah khan keini lai vel hi min rawn hrilh deuh khan ka hria a. Tin, chumi hmang chuan Zoram thalai te kan han address leh dawn a ni a. Chutiang tak maia kan ram kan han hriat theih chin atang hian kan Mizo-na kan humhim duhna luatah hian kan hnam hian nasa takin alo tuar chho a, chumi hrin chhuahah chuan hnam movement-te alo piang hial a ni a. Chutiang anga hnam movement-te alo awmah pawh chuan, Aizawl an buai a, Aizawl chhuahsan an ngaih khan kan Home Minister zahawmtak Pu Zira te khua ah hian, an ni hi kan chhungte an nih avangin Tualbungah kan han bela, tichuan an ni hnenah hian kan han thleng a. Tichuan ram a buai a, mangan em em lai khan ka chhang chiah hi khawsikpui veiin a kaih thin a, a thi tawh emaw an tia, an thah luh luh a, a rawn harh leh thin a. Chutiang chuan kei ngei pawh Aizawl kang te chu

min han thlirpui ve lawp lawp a ni a, chu pawh chu ngaihtuah vak loin khawilai emaw ah thiante nen kan lo inkawm a, chutiang chuan kan lo awm a. Chuta tang chuan Jowai-ah kan han tlanche ve leh a, engemaw chen kan zuk awm a, Khasi ho nen kan zuk awm a, chutiangte han ngaihtuah chuan kan ram buai tawrhate kan hre tlem em em mai a, keini chuan. Kawng leh lamah kan sawi ang chuan kan rilrute pawh chu, kha kan ram buaina chuan hnam dang ngaih theihlohna rilru, hnam dang reng reng ngaihtheihlohna rilru kha keimahniah hian a lo intuh hle a ni ang tih kha a rin theih a.

Kan han tleirawl nun chhoah te pawh kan nun kha engemaw chenah a kalsual nasa em em a. Kan hmalam hun pawh thlir lovin, ei tur a awm hi chuan ngaihtuah ngai lo ang khawpa inthlahthlamna hi Aizawl tlangval tam tak hian kan nei lo chho ni hian ka hre thin a. Pu Rokamlova nau Pu Buktea'n a sawi ang deuhin 'Lamah ka kal a, ka sleek a got zaih' han ti chin hi chuan ngaihtuahna hi kan nei thui lo angreng hle a. Tin, thil va duhamna leh engemaw va tih deuh huam huamna hi kan nei lem lo tlat mai a ni. Chutiang chuan keimahni khawpui bera thangtharte generation rawn awmah khan nasa tak maiin kan rilru kha min tithuanawp nasa a. Chutih karah chuan mifel tak takte an chhuak tho a, tam tak kha chu khatieng lampangah leh kan nun dan kha miten min sawisel tawh lova, miten min rawn dictate lem lova. Keimahni chhungkuaa kan insawisel bak kha mihring hi kan insawisel tawh lo tlat a ni. Chuvangin kan awmdan apiang kha nun tha leh awmdan turah kan ngai a. A chhan chu rambuai khan mite han insawiselna leh mite nun han inzilhhauna ang chi kha tumah khan kan intih loh avang khan kan tha inenna avang hian keimahni Aizawl khawpui tlangval han inti hote, Aizawl original han inti hote nasa takin kha rambuai khan kan nun hi khati zawnga thahnemngaihna ai khan khati zawng khan kan rilru hi kan nu leh pate thawhchhuaha lawmna leh nu leh pate ngen tlatna leh belh tlatna nunah khan min hruai thui hle hian ka hria a. Chutiang tak mai chuan kan ramte pawh chu lo thang chhoin chu chuan thingtlang khuate pawh chu a lo nghawng chho ta zel ni hian a lang ta a.

Chutiang chuan kan ram chu rambuaiiah kum 20 kan han tal meuh chuan keimahni rilru reng rengah hian kan ngaihtuahnaah hian vested interest, mahni hmasialna leh mahni chhungkaw bil, mahni bila tlanna hi a lian ta em em mai ni te hian a lang ta a. Chu chuan duhamna leh kawng tinrenga a risk huai huai chak tumnaah hian kan ram hi a lo piang ta ni hian a hriat theih a, han en han en hian. Chumi keimahni moral destruction min rawn neihna ata, British hun atanga India independence 1947 hnuah chumi dungthula min enkawlata chu Mizo fate hi kan chhuah ngai hian ka hre tak meuh meuh a ni. PC sawrkar lai khan han ti ta ila, PC sawrkar khan nasa takin economic revolution rawn awmna turin, kan ramah retheihnain min bawhbet a, chumi ata chu awmze awm lovin mihring kan nun tawhna ata chu economic revolution chu nasa takin a rawn fight a. Chumi rawn ti tur chuan a hmasa berin enge ngai tih chu PPV ho grouping ho zawng zawngte kha an khuaa haw leh vek a lo ngai ta a, chu chu an han ti hmasa te te ta a, chuta tang chuan economic development turin six basic need atangin tan an han la ta a. Central Sorkar nen pawha thawk dunin an han ti chho a, chumi karah pawh chuan remna leh muanna tur atan chuan nasa takin an zuk bei a, kan hotuten an han sawi thin danah phei chuan Central lampang khu a buaithlak ang reng khawp mai a, insurgency should not pay tihte hi kan hriat dante a nih vang hian hma lak a har thin hle a ni tihte a ni a.

Chutih lai karah chuan kan ram buai chuanin engkim mai hi a rawn tawng tawh avang khan mihring mimal tin ten mahni hmasialna leh mahni hamthatna um duhin kha ram buai kha a fel zawnga kalpui aiin, khati zawng khan kan kal liam ta nasa hle mai a. Pu Speaker, minute hnih khat chauh, kan pu hi chuan a hrelo maithei a, kan sawi hi, kan sawi kep lawk mai teh ang vawin chu. A lo kal thei dawnlo emaw kan ti a, vawiin chu a lo thei hlauh mai leh nghal a. Rambuai chuan nasa tak maiin khatiang zawng khanin min rawn ti a. Chumiah pawh chuan keimahni pawh chuan a corrective measure la tura tan kan laknaah te engemaw inbahna te leh mimalahte harsatna namenlo te awm chhovin, keimah ni leh keimahni, Mizo hnam leh hnamte pawh kan insual phah lek lek a ni. A bikin keini PC Party te phei chuan kan tuar nasa khawp a, tun generation angah phei chuan Politics vanga tuar nasa ber kan nih ka ring hial a ni. Kan candidate-te leh kan hotu tam takin nunna an chan a, kan VCP Sateek ami thleng pawhin. Chutiang khawp chu kan chungah thihna a lo thleng a ni. Mahse, chuvang chuan a ni vawiinah hian kan Resolution rawn puluttu kan Minister zahawmtak hian a tih awm tak pawh ni hian ka hria a. Keini tan pawh lawmthu sawi mawlh mawlhna tur lai niin ka hria a ni. A chhan chu chutiang tak maia he khawvel tharah ti mai ila, tun ang khawvelah pawh chutiang ang dinhmuna lo ding thinte khan vawiinah chuan remna leh muanna kan rama lo thleng ta a lawmawm zia te, vawiinah keini chuan kan enjoy tak meuh meuhin ka hria a. PC Party ang phei hi chuan kan lawm tak meuh meuh a, kan thinlung chhungril hi a lawm a. Chumi rual chuan kan ram hmalak, kan ram hmasawanna tur atana development programme kan siam hianin tun ai hian kha ram buai zawng zawngte ngaihtuah a, kan thuanawpna zawng zawngte ngaihtuah a, hmalam chaktaka pen tur zawk, kum thum turte hi kum hniha ti turte in, kum hnih hi kum khata zo tur anga he kan development programme-te pawh hi siam a, kha kan rambuai kha khuh tur hian he kum 25 kan hman chhung hian kan kal dan hi a Satel kal lutuk a. Chuvang chuan, tunah hi chuan a Vamur/Pengleng thlawh deuhin, chak deuh hlekin Pu Speaker, a kal theih lawm ni tiin vawiinah hian he Resolution support pah hian ka rawn sawi a ni e, ka lawm e.

**S P E A K E R** : A lawmawm e, tunah Pu Lalduhoma i lo sawm ve ang. A dawtah Pu R. Lalzirliana.

**Pu LALDUHOMA** : Pu Speaker, kan ram remna kalkawng hi tu thinlung mah tina lova, thudik tak erawh chu tluangtlam taka sawichhuah thiam ka chak khawp mai a. Mizo Union hruaitute khan kan ram tan State an nawr a, rambuai hma fe atangin. India Sorkar-in Pataskar Commission a rawn tir a, Scottish Pattern te, Sub-State te min rawn zawrh a, engkim kha kan hnar a. Tichuan, MNF ten independent hial an lo puang ta a. Amaherawhchu, independent an nawr atanga reilote-ah, MNF hruaituten independent hi khatia tharum thawha nawr chhuah chi a ni lo tih hrechiang a, thudik huaisen taka pawm a, India Constitution hnuai inbiakrem lehna kawng an rawn zawh kha ropui ka ti a. Kan thil tih hi a lo fuh vak lo tih kan hriat chuan, kan inlamlet ngam tur a ni a, kan tlawm ngam tur pawh a ni a. Kha kha chhuanawm ka ti em em a ni.

Chumi kal zelah chuan 1976 July ni 1-ah Shillong-ah Accord signed a ni a, July Agreement kan ti a. Mizoram-ah Kohhran zawng zawngin dar kan vua a, lawmthu sawi tawngtai kan hlan a ni. Khatih lai khan kan Chief Minister Pu Ch.

Chhunga nen Shillong-ah kan awm a, ‘Enge kan inremna kalhmang hi’ tiin miin anrawn zawt a, ‘hei a copy hi chhiar ve mai rawh u’ tiin kan siampung a, kan lope ringawt thin a, khami copy kha kan la nei deuh vekin ka ring a. Khatah khan kan ram dinhmun tur engmah sawi a awm lova, MNF ten ralthuam an tun dan tur programme kha a ni deuh ber a, a hnuah khan awmze nei lova rawn chan chhuah a ni ta a. Signed loh ang deuh mai a lo ni ta a, biakin dar kan vaw thlawn anih kha. Chumi hnuah inbiakna a kal chhoh leh khan, inbiakna-ah kan ram dinhmun tur, State-a hlankai a nihna tur emaw leh thildangah khan harsatna em em a awm ta lova, Pu Denga khan thil thar a rawn rawt ta a. India ramah chuan kan hriat angin U.T te State-ah hlan an ni a. U.T-a Constituency zat leh State ami te a inzat ta lova, U.T MLA-te State-ah pakhatmah an chhunzawm ngai lo. U.T chu State-a a awm dawn chuan U.T MLA zawng zawng an ban vek a ngai a, an tawp vek thin a, thlaruk President Rule-ah an awm a, chumi chhung chuan inthlan buatsaih a ni mai thin a ni. ‘State kan nih theihna turin kan MLA nihna kan hlan’ tumahin an ti ngai lo. President Rule-ah an awm a, tichuan inthlanna a awm zel mai a ni. UT atanga State kai a nih kha chuan eng Party pawh nise, MLA zawng zawng an vaiin an ban a ngai hrim hrim a ni.

Amaherawhchu, thil thar lo thleng ta chu, Pu Denga khan ‘he thlaruk chhung hian President Rule hi awm suh se, tah hian ka lo Chief Minister ang e’ a ti ta a ni. Interim period a dil ta a ni. Chu chu India Constitution-a thil awm ngai lo a ni. Chu chuan harsatna a rawn siam ta a. “E, a ni tak a lawm, keini sorkar lai pawh hi President Rule-a lut tho tho tur kan ni a, kan ban tho tho a ngai a, state kan nih dawn chuan thlaruk lek chu lo thu ve ang hmiang,” kan tih theih leh theih loh khan kori a tu ta ber a ni. Khami tih theih lohna avang khan inbiakna a tawp a, London-ah a zu kal a. Kan hotuten Londonah min tir a, chuta Pu Denga ka zuk biaknaah chuan, “kan bei a dawng tawh, amaherawhchu, terrorist type-in kan kal ang a, Colonel Gadafi-a hi ka be pawp tawh a, terrorist type-in kan kal dawn a ni”, a lo ti a ni. Kei chuan, “E, hei Prime Minister Pi Indira Gandhi thu leh hla pawh ka rawn keng a, he thlaruk chhung interim period-ah hian keini Congress hi kan sorkar chuan avaiin kan kian ang che, kan ti takzet a ni. I tape rawn siam sa hi siamthala, i thlak leh ang,” tiin kan siamthala dun ta a. 1984 inthlanah khan Pu Laldenga tape kha London atangin ka rawn hawn a, kha kha kan sawrkar phah Chiang Khawp mai, thudik a ni. Tichuan kan han sorkar ta a, London atanga lakchhoh dan kan han ngaihtuah a, inbiakna kan tinung leh ta a. Tichuan, Congress President-te ka lo ni ve a, M.P. te ka lo ni ve a, All Party Peace Committee-ah Chairman ka ni tluanchhuak zak bawka. Pu Denga kan la chho a, kan han inbiak khan, kan ram dinhmun tur, State-a hlankai kan nihna tur leh a kaihnawih thil dangah khan harsatna tak tak kan nei ngai lo. Amaherawhchu, President Rule-a luh aiah interim a ngiat si avangin, chu interim thlaruk chhung chu engtingge kan tih ang tihah bawk khan harsatna ngai kan tawk leh a ni. Chumi kan tawh avang chuan President ka nihna te, M.P. ka nihna te ka chan phah ve bawka ni. Tichuan, a tawpah chuan chu thlaruk chhung Mizo ten kan inchuh nasa lutuk ta leh, hnamdangte President Rule-a an awma an inhlankai mai laia keini khati em ema kan han inchuh mualpho ta bik kha a zahthlak viau zawka ni. A tawpah chuan chu thlaruk chhung kian loin, sorkarna intawmin, thlaruk chhung chu kan hmang tlang thei ta a. Remna a lo awm ta a, a lawmawmah ka ngai. Chu chu thil awmdan dik tak a ni.

Vawiinah hian thawnthu hlui sawi sawi pawh hi tul ka ti tawh lo. He kan Resolution ang hian he remna hi a awm zel theih nan engnge kan tih ang? Internal Peace Mizoramah hian a awm zel theihna turin Politic kan khelhnaah te, tlin kan tumnaah te, helho thurualpui kan chin te hi hi i sim ang. Silai nen campaign thin te i sim ang u. Kidnap lem tih te hi awm tawh suh se. He ramah hian remna a awm theih nan mi tam takin a man an pe, tuna kan Chief Minister pawhin a pe lo ka ti lo, ka ngai sang tho. A pawimawh ber chu kan kal chhoh zelna turah hian remna nena kan kal a, Politician ten eng engemaw tih ching lovin he remna hi kan humhim ka duh.

A tawpna atana ka sawi duh chu he Accord kan tih hi Mizoram leh India Accord a ni lova, MNF party leh Central Sorkar accord a ni. Pu Laldeng-an a sign pawh khan On behalf of Mizoram tiin a sign thiango lo, "On behalf of MNF" tiin a signed a ni. Khamiah khan kan ram a dam zo lo, chuti chung chuan kan pawm tho. Remna sign a nih hma khan Pu Denga hnenah, "Mipui i hriattir ang, mipuiin aw an tih chuan mawh an phur ang a, 'helai hi ennawn leh rawh u', an tih pawn mawhphur bawk sela, tichuan kei MP ka nih lai a ni a, Convention ka han ko ang e," ka tih pawhin an phal lo a ni. Tichuan, kha kan inremna turah khan mipui rawn kan ni lova, party rawn kan ni lova, kan inrawlh ve thei lova. Mizo mipuite hian kan awmdan turah inrawn khawmna vawikhatmah kan la nei lova, he Accord pawh hi mipui ngaihndan la lova siam a ni. Chuvang chuan a nih ang ang hian kan dam zo lova, engtingge kan tih tak ang? Vawiinah hian UNO in Resolution a siam tawh a "Right to indigenous people" a lo siam tawh a, India hi a signatory a ni. Chutah chuan keini ang hnam, khawvel pumpui ami ten zalenna sang zawk kan neih a, Self Determination thleng kan neih a, kan leilung pawh hlan let leh kan nih theihna tur thlengin a chuang vek. Vawiina Legislator-te hi chuan a copy pawh i nei vek ang u, kan right a ni. Hmana Atlantic Charter kha ka sawi ve lo. Tunah chuan kan tan liau liau right pekin kan awm a, hei hi chuh ila, kan hmalam i thlir ang. Vawin ang te hi kan hmalam thlir nan hmang ila ka duh a. Mizoram mipui zawng zawng party anga inbeihna lam ni lovin, inrawn khawm ila, kan hnam dinhmun thar tur hi i nawr ve ang u. Tunah chuan kan budget kan dil pawhin Planning Commission lal lutukah Chief Minister zawng zawngin kut an dawh a ngai a, chumi kan budget min pek aia tam chu Central Scheme dil turin chibai kan buk a ngai leh a. Central Sorkar hi a lal lutuk, khati ringawta min siam chuan remna tluantling hi a awm reng thei bik lovang. Chuvangin Right kan neih ang ang hi kan claim tur a ni. China nen kan inkar a chhia, North East a pawimawh tih kan hria, keini pawhin India khua leh tui rinawm tak nih kan duh, Central pawhin min duh bawk a ni. Special Administration tih te chu Union Home Minister ten an sawi ri tawh a ni. Naga hel ho nena an inbiaknaah pawh hian an thilphal dawn niin kan hre tlat a ni. Chutih laia keini economic development ringawta inhman ral hi a ni lo, nationalism-a kan ram dinhmun thara hlang turin, he Accord-a kan dam kim lohna lai te, dinhmun sang zawk, tharum thawhna tel miah lovin kan demand a ngai. India ramah hian indigeneous people te hian MP 200 rual lai kan nei a ni. Tuna kan hotupa ber, India ram pum huap ami pawh tuna kan sorkar khuan Rajya Sabha-ah MP ah, ruat seat-ah a dah a ni. Chuvang chuan tharum thawhna tel lovin, mipui tiralti zawng ni lovin kan dinhmun thar tur thlir tur hian hma kan lak a tha ka ti a. Chumiah chuan remna hi kan humhim ang a, kan venghim tlat zel ang a. Chuti chung chuan Satyagraha ram kan ni a, silai ram kan ni lova, Mahatma Gandhi ten min zirtir ang khan, kan dinhmun tura

phal tawh sa leh ziah tawh sa na na na chuh chhuak tur hian, hnam anga lungruala ke kan pen hi a tul ka ti khawp mai a. Chungte hmang chuan Pu Speaker, he resolution hi tha ka ti a, pass ka han rawt ve a ni, ka lawm e.

**Pu R.LALZIRLIANA** : Pu Speaker, ka lawm e. Kan hmaa MLA zahawmtak thu sawite kha lawmawm hlawm hlein ka hria a. Pu Lalthansanga kha han pek belh deuh te pawh kha awm hlein ka hria a. Brig T.Sailo vawiinah a lo tel thei a. Remna kan neih lawmawm zia hi ani hian chak deuh se chu sawi tur a ngah khawpin ka ring a. Amaherawhchu, a nau khan a rawn sawi sakah ngai ta ila thain ka ring.

Vawiina kan resolution, Mizoram kum 25 chhung lai mai remna kan lo neih tawh a lawmawmzia leh veng him tlat tura kan duhna kan Law Minister zahawmtakin a rawn pulut hi lawmawm ka ti tak zet a. 1959 bawr chho vel khan mautam tam kan nei a, chu mautam tamah chuan Mizo Famine Front a lo ding chhuak a, chu chu 1961 ah Mizo National Front tiin a lo awm a. Chu chuan independence an rawn tuipei chho ta ber a. Khatih laia sorkarna nei Mizo Union-te nen phei chuan an ngaihkan a hrang hlah a. Chuvangin an ngaihkan a hran tak avangin rambuui, 1966 a mipui hnena puan chhuah an nih takah phei kha chuan Mizo Union tam tak 200 chuangin thihna an tawh a ni tih kan hria a, a runthlak hle a, mahni thil tum a lo dik lova, an let leh ngam kha a lawmawm a. Amaherawhchu, thisen tam tak chhuah tawh hnua han tih erawh hi chu a tlai lam hrat tih hi kei ka ngaih dan a ni a. Mahse kal zel sela chu kha aia tam kha thisen chhuahna tur la awm zel tur a ni, an lo let ngam kha a lawmawmah ngai ta ilangin. Khatih laia Mizo Union hotute khan MNF hotuten independent a theih e ti mahse lang, a theihna kawng an hmu ve lo va, a theihna kawng ni a an hriat chu, India sorkarin phal takin min pe thei se a theih a ni an ti a. Tin, India Sipai hi kap hneh i la, tichuan independent kan ni thei ang an ti a ni, Pu Chhunga te, Pu Rawnga te hnung kan zui ve lai khan hei hi chiang takin an sawi thin. 1966 ah tharum thawhna an awm khan Rev.Zairema lehkhabu kan chhiar chuan independent kha an hotute khan an lo tum tak tak lo a mi chu aw !!!! kha a tih theih a. A chhan chu palai turin remna kawng zawng turin Pu Rev.Zairema kha MNF hruaitu te khan an lo hualin an lo be lawk reng tawh a ni tih kha kan hre thei a, thil zahthlak angreng tak a ni, independent meuh puang ve tan chuan. Mahse, kan Sipai rual an hotute thleng pha ve lo kha chuan tihtakzetin Independent kha an sual a ni tih kan hria a ni.

Tichuan, rambuui a lo ni a, rambuui rapthlak zia chu kan hotuten an sawi tawh a, sawi leh a ngai lova. 1984 inthlan dawnah, ‘min thlan tlin chuan remna kan neih pui ang che u’, Congress party-in a ti a. Tichuan, thlan tlin an lo ni ta ngei a, thlan tlin an lo nih ve leh khan, ‘remna atan hei thlantlin ka ni ta bawh a, ka dinhmun hi ka kian e’ tiin, kan Chief Minister kha chhuak ta ringawt sela, President Rule a awm a ni mai, Presedent Rule a awm kha kan duh lova, tumahin kan duh lova, Central pawhin an phal bawh hek lo. Kha tih lai a, ‘a kiang duh lo ve’ ti a sawitu an awm a nih chuan mahni inpholan tuma bei mai an ni tih hi mipuite hian kan hriat a pawimawh khawp mai. A ram leh a felna zawn hmasak zel a ngai a. Tichuan, nichina kan hotute hnen atanga kan ngaihthlak tak ang khan London lamah te kalin khatiang khan thil a lo awm chho zel a, 1986 June Ni 30 dar 9:30 velah chuan remna sign theih a lo ni ta a. He remna hi a hlu a, a lawmawm em em a ni tih kan chiang a ni. Tichuan, remna chu muannain a zui a ngai a. Remna zu nei vete leh helte an lo kir



a, aggrement-te an han siam a, Shilong Accord kan tih ang chi te, Tripura lamah te aggrement tamtak an lo sign tawh a, helte nen. Assam-ah an ti bawk a, Manipur ah an ti bawk. Hel chi hrang hrangte nen agreement siamna a tam tawh a ni.

Chutiang ang chuanin hel chi hrang hrang te nen hian aggrement siamna a tam tawh hle a ni. Amaherawhchu kan rama remna kan neih erawh hi chu muanna tluan tlingin a zui ta a, a lawmawm takzet a. Rambuai rapthlak lai, Congress Party-te thil tum Remna leh Muanna helaia tihpuitlin theih a ni ta hi keini mipui piah lamah Party neitu nih chuan kan thil tuma kan hlawhtlinna hi ropui kan ti a, lawmawm kan ti tak zet zet a ni. Tiang chuanin rambuai lain theih tawpin Congress Party-in ramhnuai mite tan pawh hna a thawk thin a. Kan Minister-te car-ah ngei pawh an hotute an man thin a ni tih te pawh kan hria a ni.

Chutiang anih lai chuan tuna remna neih theihna tur atana dinhmun kian tu Pu Lal Thanhawla dinhmun lo kiantu kha a fapa thihni ngei maia procecution order, amah huphurh lutuk avanga a chhang eitute khan doral an chang zo ta tihte, rul chau an hem lum a, an han hem lum meuh chuan a hem lum tute kha a rawn chuk leh mai a, an tih ang mai a, an han tih te kha chu a huatthlalaawm ve viau a ni. Nimahsela, khami ni khan kan pu kha thihnain a tlakbuak bakah remna duh mi a ni tih kan hria a, remna atana a inpekna kan hre reng a. Chuti chungin worker-te kha amah khan hmet dai lo selang chuan kan ramah hian buaina rapthlak tak a chhuak ngei ngei ang, khami ni khan.

Nimahsela, chutiang awm lova kan han reh duak mai te kha a lawmawm ka ti a. Tichuan remna neiin kum 25 lai kan lo lawm thei ta a, he kan lawm ni a MNF President thusawi kha mak ka ti a, 'remna atan hian tumah inchhuang tur kan awm bik love' an ti te kha chu mite hamthatna leh an hlawhtlinnate tihbawrhban tum tu hi an ang khawp in ka hria a. Independent an soal a, Independent an soal hnuah helaiah open-ah sorkarna a rawn chelh a, ei leh bara intodelh a tum a, ei leh bara intodelh a tumnaah chuan .....

**SPEAKER** : Ngawi lawk rawh aw, khi kan hun a tawp a. Tunah khan a sawi laklawh viau a. Reilo te han sawi ve leh phawt rawh se aw. A sawi tui lai kan break rih phawt a ni.

**Pu R. LALZIRLIANA, MINISTER** : ...ei leh barah chuan Agriculture leh Horticulture hi ka la chat a ni. Chief Minister dang reng rengin an la ngam lo a ti a. Amaherawhchu, kum thum an nih chuan kan tam a zual telh telh a tiang khanin midang a pe leh ta mai a ni. Chutiang anga mahni thil tuma hlawh tling lo ten mite an thil tuma an hlawhtlinna lawmpui thei reng reng lova kan awm hi a pawl ka ti khawp mai a. Chutiang chuan engngemaw chen rorelna an neih laiin kan ramah ngei, he Aizawl khawpuiah ngei hel leh hel inthahna te, hel dinnate an awm chho ta te kha, remna kan neih muanna hian a zui zel lovang tih kan hlau em em a ni. Chuvang chuan vawiinah hian he Remna kan han neih kum 25-na kan lawmna hi muannain zui chho zel sela mipui zawng zawng tang tlangin vawiina Resolution kan neih hi kan zavaia support turin kan insawm a, kei pawhin ka thlawp zia ka rawn sawilang ve a ni e. Ka lawm e.

**SPEAKER** : Awle, kan chawlh a lo hun ta a. Kan chawh rih ang a, kut lo phar lawk kha chu Pu Lalrinmawia Ralte leh Pu K. Liantlinga te an ni a. Tin, Pu Zoram Sangliana a ni bawk a, kan la sawiho leh zel dawn anih hmel e. Kan chawl rih ang a, dar 2:00 p.m.-ah kan chhunzawm leh ang.

**2:00 P.M.**

**SPEAKER** : Sawihona kan tan hmain kan member zahawmtak Pu P.P. Thawla'n a thusawi tawhah khan engemaw han sawi nawn duh, siam that duh a nei a chu chu i lo ko ang.

**Pu P.P. THAWLA** : Pu Speaker, ka lawm e. Nichina kan resolution-a ka thlawp vena thu ka sawiah khan tawngkam ka hman pakhat kha tihdanglam leh deuh ka duh a khawngaihin i remtihna, 1986 remna thuthlung sign zawhah khan a bo a bang awm lovin an in surrender tih tawngkam kha ka lo hmang zeuhin ka hria a, ka hmanhmawh a leiah kha kha khati zawng ni lovin remna thuthlung ti hlawhtling turin lungrual takin ke an lo pen ta a, ti a thlak ni hram se tih tihdikna ka rawn dil a ni e, ka lawm e.

**SPEAKER** : Awle, chutiang chuan thlak ni sela, tu thin mah tina lo zawng kha a tha hrim hrim a ni, hon'ble Member-te kaa chhuakah chuan. Hei Pu Lalduhoma leh Pu Liantlinga te chawhnu lamah programme pawimawh an lo neih avangin an tel theih loh thu an rawn thehlu a ni, chu chu pawm sak an ni. Tin, thusawitu kan koh leh hmain a sawitu tur kha Pu Lalrinmawia Ralte a ni a, mahse, kan koh hmain kan Office lam atangin kan Minister-te han request duh che u kan nei a. Kan session a bichilh deuh hlek a, zawhnate pawh kha a lo lut nghal naa a chhanna hi kan hmu tha tlat lo mai a, vawiinah pawh khan 3 chiaah kan hmu a obituary khan kan la rei ta em mai a, kha vang khan kan ti zo hman lo tho va, naktuk tur pawh hian chhanna pakhat chauh kan la dawng a ni Office lamin. Chuvang chuan, darkar khat hun kan hmang tur ang kha a ni a, chu chu kan Minister zahawm tak ten in department chan theuh kha kan MLA zahawm takte zawhna lo chhang vat turin ti thei ula tih kha Office lam atangin kan rawn request che u a ni. Awle, sawihona lam kha .....

**Pu LALSAWTA, MINISTER** : Pu Speaker, tawitein ka han sawi ve zawk ang e. Hun a hmanhmawh em avang khan Minister-ten hei hi khawn mek a ni a, instruction awmsa angin, "information being collected" tiin lo chhang mai rawh u tihna kha a awm sa tho va, a forward-naah khan chutianga min ngaihsak mai loh chuan Directorate atang te, District Office atang te-a khawnkawm ngai a ni a, zawhna hi kan hmu tlai bawk si nen District Offices atange a ti tur kan nih vek hlawn avang hian information leh question ready hi kan nei dawn lo tlang a ni ang tih hi ka hlau khawp mai.

**SPEAKER** : Keini lo ngaihdanah chuan computer engkim kan hmang tawh a, thil khawih chhuah theih zung zung thil vek a ni tawhin kan hria a.

Ni hnih khatah pawh hian kan Department-te pawh hian hei le hei le tiin rawn phawrh thei zung zung turin kan han beisei che u mawle. Awle, tunah sawihona kan chhonzawm ang a. Kan Resolution kha hre reng ila, “Mizoramin kum 25 chhung lai mai remna leh muanna kan nei ta hi lawmawm kan ti a, remna leh muanna kan neih hi chhung lam leh pawn lam atanga tih chhiat anih loh nan mitinte inpe thar leh turin he House hian a ngen a ni”, tih kha a ni a. Tunah Pu Lalrinmawia Ralte i lo ko ang.

**Pu LALRINMAWIA RALTE** : Pu Speaker, ka lawm e. Kan hmalamah khan he kan Official Resolution thlawpna thu bengvar thlak tak tak leh thu benglut tak tak, rilru hneh tak takte kan ngaithla a.

Ram buai kan tih 1966 atanga India sorkar leh MNF te indonaa a taka tel a, jail bange zut a, hrehawm tam tak tuartu leh remna kawng zawng a harsatna tam tak paltlang tu mi engemawzat helai member zingah pawh kan awm tih ka hria a, in zahawm ka ti a, nangmahni avanga remna leh muanna hi nei kan ni a, in thawhrinna leh in beihna a chhuanawm ka ti a, hmun leh hmunah pawh hian lawmthu in hrilh tur a awmin ka hria.

Nichina member zahawm tak tak ten an rawn sawilan tak ang khan, tunlai Mizorama thalai ka ngaihtuah let a, 1983 a piang kha remna siam kum 1986 khan kum thum mi an ni ang a, kum thum mi ka nih lai ka ngaihtuah let a ka hre phak si lova, 1982 te, 1983 te a piang kha chuan an hre reng reng lo a ni tih ka ngaihtuah a. Chu mi awmzia chu kum 30 leh a hnuai lam reng reng hi chuan Mizoram buai lai kha an lo hre reng reng lo a ni tih hi ka ngaihtuah a. Vawiinah hian ka thalai pui kei ai a la naupang ve leh chhawngte ka rilruin a ngaihtuah lian em em a ni. Mi hrisel tak, dam thei tak, chak tak tan hian hrisel nawm zia a hriat loh reng reng a. Tin, rim tak leh hah taka thawk thinte tan lo chuan chawlhna hun awm thin nawmzia hi a hriat miah lova. Nisa tuar thin tan lo chuan daihlim nawmzia hi a hriat miah lo. Chutiang chu a nih a vangin 1966 leh 1988 inkar ram buai hre miah lo ten vawiina kan nunphung hi an pian tirh atanga an hmuh a nih avangin, kan thenawmte State ang lo tak mai a, he boruak nuam tak maia nun kan hman theihna hi tu te emaw inpekna avanga kan neih a ni tih hi hre miah lovin, thalai lehkha thiam tam tak kan zinga a thiam ber ber te zawk hi kan history-ah hian thil hriat loh pawl tak neiin an awm tlat ni hian ka hria a. Kan History zirilaibuah a lang bawk si lova. Chuvang chuan, vawiina House zahawmtaka sawi ho ni thei tura kan Minister zahawmtakin a rawn pulut hi lawmawm ka ti a, he Official Resolution hi thlawp turin ka lo ding a ni.

Mitthlaa hmu thiam miah lo, a taka tuar ve miah lo, dik tak chuan, keini te chu laltin khaiin kan tlanche ve phak a ni. Chung angtan tan chuan tuarna an tih hi ka thalaipuite hian engtinngan an mitthla thiam ang aw! ka ti a. Thingtlang khua-ah sipai an lo kal a, nunau mangang tlan khawm nasat thin zia te. Hmun hrang hrangah, an duhna hmun hmunah min khalh khawm a. Kan pa te khawkhath mi huai in ti ve ren rawnte pawh tangkawng chaw zawnin an han vah tir a, an duhna lai laiah an han sawisa a. Chung zawng zawng mit ngeia hmutute tan chuan an hriatfiah dan tur a sawi dan hi engtinngan ni ang ? tunlai kan naute ve leh chhawng hnenah hian ka ti thin a. Hollywood film Rambo tih te, Missing in Action tih te leh a dang dang Vietnam indote en selangin. Heng kan en a, Vietnam mipui thlabar khawlaiah vawk nen, ar nen an tlan chum chum mai thinte hi a tak takin 1966 leh 1986 inkarah kha chuan a thlang thin a ni tih hi kan Mizo thalaite hian hre let leh se la. Vawiina kan nu leh pa leh kan

ram hruaitute, kan hnam sipaite ngei pawh an niang, Remna leh Muanna kan neih theihna tura an inhnuh hnamna ropui zia hi an hrechiang nawn fo in ka ring a ni.

Vawiinah hian thil kan han sawi a, politics-a tute emaw hmingtha tur kan duh lohna avangtein thudik tak tlema han kuaiher hlak te hi Politic-a in hmang thin ho hian kan thiam hlawm hle niin ka hria a. Ka phak tawh tawkah kum 1986-87 chho vela India News magazine ka dahthat hote ka keu let leh a, record ka neih ang ang, file-a ka dah te ka keu let leh a. Lungleng rual ni miah lo mah ila, khang thil avang khan Pu Speaker a lunglen thlakin ka hria a. Kum 1986 July ni 31 chhuak India Today-ah Principle Correspondent, Indranil Banerjee a'n kan Chief Minister hlui zahawm tak boral ta Pu Laldenga interview a neihpuinaa a thusawi, a tawngkamte, Pu Speaker i phalnain chu Chanchinbu ami chu anih ang ang hian ka'n chhiar ang a – We always wanted a Political settlement of the Mizo problem. But we were forced into violence. Politic-a Mizote buaina hi chinfel kan duh reng, mahse loh theih loha tharum thawh tura nawrluih kan ni, a tihte hian thil tam tak a sawiin ka hria a. Remna kawng zawn hi a har hle a ni tih hi hei hian a tichiang a. Rammua huai taka penchhuakte hruaitupa berin hetiang a sawi hian an thil tawn kha thil namen a ni lova, a tih tawpna tur pawhin thil namen a ni lova, a kawng a bumboh zia a chiang hlein ka hria a ni. Chutianga tuarna rapthlak tak a lo tawp theih nan chuan thil pawimawh em em pakhat chu kan Hnam sipaten an silai an kalsan ngam a ngai a, kalsan ringawt mahsela kan ngaihlak tawh ang khan helaiah an tan hmun a awm siloh chuan, tih kha a ni tlat mai a ni. Chuvangin remna siam chu duh mahsela, helaiah hmun siamsak a ngai a. Chumi kawngah pawh chuan record hlui hi en let ila a chiang khawpin ka hria a. Nakinah a duhte chu in pek leh chi niin ka hria a, kan history-ah chapter pawimawh lai tak anih avangin. 1984 Inthlan dawnah Congress Party-in thutiam an rawn siam a. Remna leh Muanna hi kan thupui a ni, a awm theihna tur anih chuan, a tul phawt chuan kan kiang ang an ti. Sorkarna a inthlak dawn a, transitional period-ah U.T atanga State-a kai dawnah Pu Speaker, khawngaih takin a tlang kan kawm lawk ang a. A kai dawnah chuan anih ang angin a tawp a, President's Rule-ah tih kan ngaihlak takte kha thil nih dan nimahsela, chu chu hun pangngaiyah thil nih dan pangngaiyah a ni. Ramhnuai atanga lokirte hmun siam chungchang hi chu vawikhatmah ngaihtuah a ni ngai lo a ni. Chuvangin hemi atan hian Central Sorkar hi chuti lutukin an inhawng lo a ni tih hi thudik a ni. Mit ngeia hmutu leh beng ngei a hretu leh a dawrtu tam takin hei hi an sawi thei. Remna leh Muanna kan sawi thin pawh hmusit lek lek zawkin, “Inremna leh muanna hi engmah tak tak a nilo, party in tiboral anga sin”, tihte pawh hi an hlawh ve thin bawh a ni kan hotute hian. Amaherawhchu, mipui hmaah kan tiam tawh, mipuite tuarna hi tawp se kan duh tawh, kohhran zawng zawng kan tawngtai a, a rammute ngei pawn mipuite tuarna an hrethiam a, anni pawn a kawng tawp zia an hrethiam a, tawp kan duh tlang a, chuvang chuan kan kiang ang tiin khatihlaia kan Chief Minister zahawmtak khan a hmun a kian ta a, chu chu nichina kan sawi tak Indranil Bannerjee-a hnena a interview-naah khan – Pu Laldenga bawh khan chiang takin a sawi a, Pu Speaker i phalnain, “When one is in power, it is not easy to step down. What Lal Thanhawla did was a very noble step for peace in Mizoram”, a tih hi tunge hnial thei awm? Pu Lal Thanhawla thiltih hi Mizoram remna leh muanna a awm nan chuan thil chhinchhiah tlak thil ropui tak a ni a ti a ni, hei hi Pu Laldenga tawngkam a ni, Pu Speaker.

Chuvangin, remna leh muanna kan neih hi a hlu a, kan hnam sipaite pawhin tap chungin mittui tla chungin an silai an kalsan a ni tih hi

record-ah kan hmu vek a ni. Anmahni pawh zawh theih tam tak an la awm a ni, an keng ngam lo a ni lova, kan vaia tan hian an keng lo ngam zawk a ni. Chuvang chuan anni pawh an fakawm a ni, huaisennain a daih, inpeknain a daih, mahse an rammu lo ngam hi an fakawm hrim hrim ve tho a ni. Chuvangin, vawiinah hian kan Chief Minister, kan House Leader zahawmtak inpeknate avanga remna leh muanna ropui tak kan neih hi vawngnim zel turin he House zahawmtak kaltlang hian Zoram mipuite ka'n ngen a ni.

Buaina hian hlawkna reng reng a nei lova, mirethei ten kan tuar na ber ziah a ni. Ka thalaipuite he House kaltlanga ka ngen duh em em chu - buaina siam hi chak thin mah ila buaina hi kan ngeih tak tak lo. Keipawh kum ruk mi lek ka nih lai, mahni chungchang thu Pu Speaker i phalnain, kum ruk mi lek ka nih laiin ka Pa sipaiin a kut an tawn a hruizenin, kan khua atanga an kai chhuak lai hi kan tlan ham ham a, kan thlir liam a, ralkhat atangin ka thlir liam a, vawiin thlengin a lo la hawng lo, vawiin thlengin a ruang awmna kan hre lo. Chu chu ka damchhunga ka mitthlaa cham hi a reh tawh dawn lo reng reng. Chu chu buainain a ken a ni. Chuvang chuan remna leh muanna kan neih hi kan zavaia tan a that avanga vawngnim tura resolution lo lut hi thlawp a, support vek turin ka sawm a member te, ka support thu ka puang bawk a ni. Pu Speaker, ka lawm e.

**Pu K. LIANTLINGA** : Pu Speaker, ka lawm e. Nia kha kan President khan, Committee kan nei a, amaherawhchu, a zualpui darkar khat chhung khan kan tih hman deuh vek avangin vawiina resolution – “Mizoram kum 25 chhung lai mai Remna leh Muanna kan nei ta tih hi lawmawm kan ti a, Remna leh Muanna kan neih hi chhunglam leh pawnlama tihchhiat a nih loh nan mitinte inpe thar leh turin he House hian a ngen a ni”, tih Resolution hi han sawi ve ka chak a. Hei Aizawlah kan awm a, rambuai inkah lai atang khanin a hma mah pawh chuan kum 1961 ah an din chhoh leh MNF Movement atanga politics chhungkua kan nih avanga thil hrechiang ve khat niin ka inhria a, chuvang chuan han sawi ve hrim hrim hi ka chak a, tin, hetilaiah House-ah te thusawi thei dinhmuna ka lo ding ta, naupang kan nih lai atanga kan lo vei leh ka lo hriatte tlem azawng han sawi ve hrim hrim ka duh avangin, hun harsa tak karah ka rawn let leh a ni a.

Hei kum 1966 khan buaina kan han tan a, in control-te a hara, thalai thisen lum leh eng emawah miin duh bakin an thleng thei a, a hruaitute pawn an duh vang reng pawh alo nilo thei a khang chen chen han thlen kha chu, amaherawhchu thil reng reng a kal tawh chuan duh ai thuite hi a thlen thei thin a, kan beyond control hi a awm tawh thin a, khang kha kan hriat thiam tlan pawh a tul tawh thin a. Tawrhna leh harsatna tam tak kan tawk a ni. Keipawh a nihnaah chuan Jail-ah chuan Christmas chu ka hmanglo nanga, tum 3 chu min mana, amaherawhchu ka vannei a ka u te Army officer-te an lo ni a, tin, Central Services-te an lo nih avangin kan han insawifiaha tahchuanin, sipaiten min hriathiamna avangin min chhuah leh thin a, tiang khan tum thum lai chu man ka tawk a. Tin, man tawkte leh harsatna tawkte hi ka mitin ka hmuh hnem em avangin an lainat awmin an khawngaihthlak ka ti em em a ni. Khang khanin Remna leh Muana tul zia leh pawimawh ziate pawh alangin ka hria a. Tin MNF leh India an indo a, khatah khanin a karah mipui kan awm si a, harsatna namenloh kha kan tawk a, khatih lai khan party tharte lo piangin Party zawng zawngin Remna leh Muanna kha Thupuiah an nei a ni, khatihlai khan party mai pawh niloin kohran

zawng zawng pawhin an nei a ni. Chuvangchuan, tumah hi he remna leh muanna chungchangah hian a ropui ber emaw ropui ber lo emaw a zuk sawi theih chiah lem lovin ka hria a. Amaherawhchu a hmawr bawktute chu an fak awm em emin ka hria a, khang ang harsatna tam tak, thi leh dam karah khan thingtlang khua an hal a, Aizawl khawpuiah nise Curfew leh thildangin, khatiang ang hun tam tak kha kan thleng chho a.

Kum 1972 a UT kan han nih chho pawh khan kan matric pass kum a ni a, khalaiah khan ngaihtuahna kan seng nasa hle thin a. Pu Ch.Chhunga kha ka fak a ni, helai chungchangah hian Remna leh Muanna chungchangah Arakan-ah te a kal a, khawi khawiah emaw te kalin nasa takin CEM ni chungte, tin, Chief Minister ni chungte pawh khan a bei a ni. Ani kha a bul tumtu hi a ni tih hi pakhatat chuan han sawi ka duh a. Tin, CM a nih pawh khan sorkar hna appointment pe thei a nih avang khan, a pe hum hum lo. Kan thalaite hian lehkha han zir sela, chutah chuan kum 5 kum 6 hnuah an rawn zir chhuak ve ang a. Technical mite leh mithiam chi hrang hrang kan han nei ve ang a, tunah officer kan nei tlem si a tiin mi tam tak a zali/zanga rual phai lamah an thawn a. Kum 5 kum 6 a lo liamah chuan Pu Thena te pawh an rawn sawrkar a, ani pawh khan Human Right te a rawn ti chho a, a fakawm a ni. Mipui harsatna leh manganna karah khatiang Human Right a rawn din chhohnaah khanin, mipuiin nasa takin himna kan hmu a ni. Chuvang chuan, tumah kha a dem theih chuangin ka zuk hre lo va, thil duh anga a awm loh deuh te, han kal petek deuh hlek pawh kha thil awm ve thei pawh a ni. Pu Ch. Chhunga te kha an fakawm a. Thalai an lo chhuak a, an lo zir chhuak a – doctor, engineer leh technical mithiam chi hrang hrang. Chutah Pu Thena'n development a rawn tan a, khatiang khan kan ramah thil a kal chho a ni a. Amaherawhchu, khatihlai khan remna leh muanna kan neih loh avang khan duhthu a sam lo deuh a.

Kum 1984 inthlan khan helaiah hian han sawikai ka'n duh chu MC (Mizo Convention) a awm a, hei tuna kan Minister zahawm tak te, kan Speaker te pawh hi a ni ang a, PC 'B' atang khan MC a lo piang chho a ni. MC-in a chuh a, chutihlaiin Congress-in a chuh a PC-in a chuh bawk a ni. Khatih laia underground-in an rawn support-te tling thei tur an nih avang khan Pu Lalduhoma, tuna House member zahawmtak chu London-ah zuk kalin Pu Laldenga hnenah tape a zuk la a, chu chu Mizoram pumah play chhuah vek a ni a. Pu Denga pawhin, "A tul a nih phawt chuan kan ring phawt mai ang chu." tiin thu a sawi a. Kha khan MC chakna tur emaw PC chakna tur emaw ai khan, Congress chakna tur atan kha khan nasa takin hna a thawk a ni. Chuvangin, Pu Laldenga pawh kha remna leh muannaah khan a thusawi khan awmzia a nei a ni. "Barh luih sawrkar UT chu kan duh love" ti chung si khan 'remna leh muanna atan chuan kan ring phawt mai ang chu' a tih kha a pawimawh em em a. Khangah khan Pu Lalduhoma pawh hi a fakawm em em a ni. Tin, khatih laia CM kha inthlannaah chak a lo ni ta a, nasa takin campaign a ni a. Chutah chuan Pu Lal Thanhawla pawh Chief Minister, tuna kan House Leader hi a ni a. Khatah khan duh dan leh hmanhmawh dan te pawh a inang lo deuh te pawh a ni ang. Amaherawhchu, an contribution kha a sang theuh a ni. Hengah hian thiam taka kan thlir pawh a ngaiin ka hria a. Tin, Pu Lalduhoma MP niin Congress President a ni a. Tin, Coordination Committee-ah remna leh muannaah Chairman a ni a. Tin, sawrkar lam kha Pu Lal Thanhawla'n a kaihrui a ni. Khatiang ang khan Mizoramah tha takin a process kha a kal a, a chak deuh leh chak lo deuh te erawh chu a awm a ni mai a, chutianga kan lo thlenchhoh takah chuan khanga mitangkai pawimawh tak tak kha wawiiin hian kan House Leader-te, kan Legislature Party-a kan Group Leader Pu

Duhoma te, Pu Thena te hengte hi tunah hian House-ah an la thu thei hi a lawmawm hlein ka hria a. Pathian zarah a bul atanga lo hre chho ve tu nih chuan a hre chiang pawl tak chu ka nih ve ka ring a. Amaherawhchu thil zawng zawng erawh chu kan sawi kher turah ka ngai lem lova, chuvang chuan tunah hian he Remna leh Muanna hi vawng him a veng him tur chuan ka ta bik emaw a titu bik emaw hi inchuh ngaiin ka hre lo. Amaherawhchu Mizoram mipuite tan a ni tih hi kan hria a, tupawh an in sacrifice a ni.

Tin, kei pawh lehlamah chuan Pu Speaker han sawi ta ila, kha lai Remna leh Muanna tur chungchang thuah pawh khan overground-a awm reng ka ni. Ka in registered chu a ni lo, amaherawhchu a tul ang ang hnathawka awm ka ni. Chutiang chuan helai chhungrilah chuan overground-in School kal chungin, College kal chungin kan ti a. Engkim kha chiangtakin a chhung thu kha kan hria a ni. Chuvang chuan 1970 leh tih chhoah phei kha chuan Politic-ah khan ka inrawlh duh lem lova. Amaherawhchu Remna leh Muanna tan chuan kan tha leh zung zawng zawng kan pe theuh a ni, sum leh pai thlengin kan pe a, chuvang chuan vawiinah vawn him pawh hi a tulin ka hria a, tunah hian a venhim dan tur zawk kan ngaihtuah a ngai. Remna leh Muanna kan nei tihah hian a tawp mai tur a ni lo, Sorkar dikte kan mamawh a, politic dikte kan mamawh a, tin development kalphung dikte pawh kan mamawh a, hengah hian kan political concept hi kan tihchian a ngai a ni. Heng leader ho reng rengte hi ka bel chiang viau Pu Chhunga te pawh, Pu Laldenga te pawh han sawipui ve thei khawp khanin, kawng leh lamah chuan hma kan la a, thui tak kan inrawlh a ni, MLA hi ka ni ang tih pawh ka ingaihtuah ngai lo a, nih pawh ka rilru-ah a awm lo. Amaherawhchu, khatih laia thil tam tak tin, Pu Thenate pawh kan inbel chiang em em a, human right a tih laiin an kalphung leh an chetzia kha a tha vek a ni. Tin, ram leh hnam tana an contribution kha a sang vekin ka hria a, vawiinah hian hemi vawng him tura kan Resolution ti tur hi chuan kan Sorkarte hi a kal dik a ngai a, mipui kan hmangaih a ngai a, tin politics dik tak inchirhtheh leh engemaw mai mai nilova kan political concept dik kha kei chuan a pawimawhin ka hria a. Chumi anih loh chuan Remna leh Muanna hi indona leh inhniaalna mai maiin a khat ang tih hi ka hlau a ni. Chuvang chuan, tunah hian Pu Speaker, he Resolution hi ka'n chhiarchhuak leh reng reng ang a. "Mizoram kum 25 chhung lai mai Remna leh Muanna kan nei ta hi lawmawm kan ti a. Remna leh Muanna kan nei hi chhunglam leh pawnlam atanga tihchhiat a nih loh nan mitinte inpe thar leh turin he House hian a ngen a ni" tih hi a tha ka ti a. Kan thinlung zawng zawng leh kan ngaihtuahna hi kan ram leh hnam tan, keimahni personal interest nilovin, vested interest nilovin, public interest neiin, he kan ram himna tur leh thatna tur hi a chhunglam leh pawnlam atangin venhim kan tum ang a, dikna leh rinawmna atan, hnathawh nan kan hmang tur a ni. Chuvang chuan, he Resolution hi ka rilru leh ka ngaihtuahna zawng zawngin ka thlawp a ni tih kha Pu Speaker, ka'n sawi ve duh a ni e, ka lawm e.

**S P E A K E R** : Tunah chuan Pu R. Lalrinawma kan ko ang a, a hnuah Pu B. Lalthlengliana.

**Pu R. LALRINAWMA** : Pu Speaker, ka lawm e. Hei, vawiinah Resolution lawmawm tak mai sawihona kan han nei a, a hmalamah rambuai kan tuar nasat zia te, experience-tuten an sawi tawh a. Kan hre theuh a, rambuai a

hrehawmzia te, kan tuar nasat zia, khawkhawm te, khaw hal te, vawiin thlenga kan ram dinhmun economics tlakchhiat leh mi tamtak eizawna mumal nei lova rahbi tleua an awmdante kan hre theuh a. Tin, chumai bakah chuan kan Mizo nunphung, kan moral-te a tihchhiat zia kha rambuai khan, rinawmna te, taihmakna te, Mizote intodelh thin zia, thenawm khawvengte intanpui thin a khatianga inpeizawn thin leh intodelh tum tlat thin kha vawiinah chuan kan lo tlachhe ta a, kan moral-ah thil ti thei, nei leh neilo inkar lo zauhna te, heng zawng zawng, kan society lo buarchuarna chhan zawng zawng, Central YMA tena khawtlang nun siamthat kum an puan hial te a lo ngaihna chhan te hi rambuai nghawng a ni a. Chu chu engvanga buai nge a ni tih tepawh chiangtakin kan ngaithla tawh a, Politics- a zirtirna diklo a awm vang a ni a, Politics zirtirna diklo chu a pawm ve lemlo, kha zirtirna awi ve lemlo tepawh khan kan tuar tlang ta vek a ni a, tiang chuan vawiin thlengin kan tuarna chin a lo awm ta a. Amaherawhchu, remna leh muanna, kan hotute Congress Sorkar an thutiam an din thin avanga, an thutiam anga an inpekna avangin remna leh muanna a lo awm thei a, vawiinah hian kum 25 a lo tling ta a. Hemi hi a lawmawm em a, ti a lawmna chang kan hriat a, chumi atan chuan tha thawhtute mi tam tak an awm, kan sawi tawh a. Amaherawhchu, pawimawh bik chumi chu tel lo se, tih theih loh, tha lo thawh ve ringawt mah se, remna leh muanna thlen thei si lo a nih te kan hriatchian a tulin ka hria a, a pawimawh bika khan tha lo thawh lo se, remna leh muanna atan lalthuthleng lo kian lo ta se, eng ang pawhin midang khan tha lo thawh sa teh mah sela, a thleng thei dawn chuang lo a ni, vawiina kan dinhmun ang hi, tih te kha thudik a ni a. Chu chu kha buainaa kha rambuai kan tawrhna zawng zawng kha politics zirtirna diklo a ni kan tih tawh kha. Chuvangin vawiinah pawh hian politics zirtirna diklo hi kan la tuh leh zeuh zeuh thin a. Fak ngai in fak ila, infak te hi hreh lo ila, sawiselna tur a awm anih pawhin a tha zawnga insawisel te chu kan tihtur a nihna chin a awm a. Chutih lain politic zirtirna diklo he ramah hian a leng chho leh zauh thin a.

Chawhma lama member zahawmtak pakhatin a rawn sawiah pawh khan he remna leh muanna kan neiha State-a kan lo awmna tur atan khan khatih laia sorkar kha an ban hrim hrim ngai ang leh President Rule-a awm ngai anga rawn sawi kha a ni lo deuhvin ka hria a. Indian Constitution-ah hian President Rule a awm theihna tur chu Article 356-ah chiang takin a zia k. Failure of Constitutional Machinery in the State, Constitution anga State sorkar a kal theih loh chuan Central-in President rule a puang thin a ni. Emergency provision kan ti a, Article 352 atangin emergency provision a awm a. Chutah chuan sorkar namthluk theihna, thiah theihna a awm a ni. Chutah chuan India himna hi Indona pawn lam indona vang emaw, chhunga buaina arm rebellion hetiang ralthuam te nena buaina a thleng emaw a nih chuan internal security emaw external aggression avangin emaw, Article 355 hmangin emergency puangin Sorkar State khawilai emaw India ram khawilai emaw thenkhatah sorkar te pawh tihdanglam theih a ni a.

Tin, Article 356-ah hian State sorkar kha constitution anga a kal theih tawh lova, a buai chuan Central-in Sorkar kha a namthlu leh thei a ni. Tin, Article 360-ah Financial Emergency a awm leh a, chu chu Economic dinhmun tlakchhiata sum leh paiah harsatna nasa tak ramin a tawhin Financial Emergency puan leh theih a ni a. State chungchangte hi chu Article 1-ah chiang takin a sawi a, 2-ah New State admission chungchangte hei 2(a)-ah Sikkim-te



pawh Indian Union-ah State pakhat anga lakluh a ni a. Article 3-ah hian State thar lo pian dan turte, State awmsa tihdanglam chungchangte Parliament-in dan siamin a ti ang tih a ni mai a ni. Chu chu a ni a, tunah chuan thu dik tak kan inzirtir a, zirtirna dikloin ram a tibuai thin a ni, buaina kha chen kan tuar a ni tih kan sawi lai hian zirtirna dik tak inpek te pawh hi a tha hle in ka hria a. Chuvangin Parliament-in dan siamin state remna leh muanna 1986 a awm hma khan state kan ni thei daih tawh a ni. North Eastern Area Re-Organisation Act, 1971-ah chutah chuan kan thenawm Assam state-ah state an hmu a ni chutah chuan, keini pawhin UT kan lo hmu ta a khangah te a hnuah te pawh state hi chu kan dinhmun turin Central atang pawn zawrh a ni reng a, amaherawhchu, rammu an awm a Independence an sual chhuak dawn si lova, engemaw tal zahawm ve deuhva an rawn hawn turin kan hotute khan an lo dah a ni a, rambuai kher lo, rammu kher loh pawh khan State an lo nei daih tawh a ni a, khang a state an lo awm chhoh khan emergency emaw President rule puan kha emaw kha a awm chuang lova, Parliament-in dan a siam, state an nih dan tur chu chu a ni mai. 1986-ah Constitution 53<sup>rd</sup> Amendment Act 1986 hmangin Mizoram kha State-ah kan ni ta a ni mai a, chutiang chuan vawiinah hian remna leh muanna thlenna tur atana pawimawh kha kan fak hreh em em mai a, tute emaw tangkai theuh a kan sawi te pawh hi zirtirna diklo kan tih zing ami kha a ni. Fak tlak te chu aw mawi chhiar sen loh pawh nei ila kan fak tawp thei dawn lo a ni tih zawk kha kan ngaihtuah dan tur a ni a. Chuvang chuan Pu Speaker, remna leh muanna hlu em em kan neih hi vawng nung zel turin, sorkar kal ta-ah khan a tichhe lek lek a, thalaite pawh an chia hman a, amaherawhchu, tun sorkar chak takah Law and Order tih angreng te pawh thawm a reh deuh a, heng hi kan vawng nung zel tur a ni tih kha ka sawi ve duh a ni e, ka lawm e.

**Pu B.LALTHLEGLIANA** : Pu Speaker, Minister zahawmtak Pu Lalsawta'n he resolution Mizoramin kum 25 chhung lai mai remna leh muanna kan nei ta hi lawmawm kan ti a remna leh muanna kan nei hi chhunglam leh pawm lam atanga tih chhiat anih loh nan mitinte inpe thar leh turin he House a ngen a ni tih ngaihtuahna ka lo hman phak ngai loh kum 25 remna leh muanna denchhena he resolution, he House zahawmtak maia a lo lut hi remchang hria ka ti a, a lawmawm pawh ka ti a ni. Amaherawhchu, chutih lai chuan memberte thusawi ngun taka ka lo ngaihthlak khan thu muhnu, thil kal tawh, mi rilru tina thei zawng ang lek leka thusawi awm thin khan he kan resolution hmel hi a ti hem thei mai awm mang e aw. Khang kha vawiinah chuan kan sawina hun tur niin kei chuan ka hre lova. Thing leh mau innawh hun lai kha sawi dawn ila chuan khatih hun lai khan ram tangrual kan ni ve tawh a, thil engkim hre pha kan ni a, sawi tur tam tak a awm. Amaherawhchu, khang zawng zawng kha vawiinah hian sawina hun a ni lova, a hmun a ni lova. He remna leh muanna a awm theihna atana kan mi hmasate inpekna zawng zawng kan hriat ve chinah hian ropui ka ti a. Vawiinah hian mi tam tak he leiah hian an awm tawh lova, an thlarau pawh zahawm ka ti a. Pu Speaker, mimal tin inpekna kha ropuiin zahawm ka ti a. Nangni pawh remna leh muanna awm theihna turin MLA nihna atangte a bangin sul in lo su tawh a, thenkhatin nihna te pawh an lo kian a ni thei. Tin, party-te pawh a lo phel phah hlawk hlawk kha a ni a. Chutiang chuan he remna leh muanna awm theihna tur hian mitin mai khan hna an thawk a. Kha tih hun lai khan zirlaite kan ni a, sorkar hnate kan thawh avangin remna leh muanna awmna turin mi angin kan thawk ve thei lo. He remna leh muanna awmna

tur atana nunna leh tha leh thil tam tak senso anih ngaihtuah hian vawiinah hian a inpir zawng emaw, khang thil, rambuai, zirtirna dik lo avanga thil awm anga insawi te hi kan sawi tur niin ka hre lova. Bangladesh-in Independence an soal a, silai hmangin, Independence an hmu a, chu chu zirtirna dik lo ah kan pawm em? MNF in Independence an soal a, an hmuh loh avanga remna leh muanna a awm a zirtirna dik lo anga inpuh kha vawiinah hian he kan resolution tha tak mai hmel tihem theitu a ni ang tih ka hlau a. Chuvangin vawiina helai hmuna lo kal khawm zawng zawngten remna leh muanna avanga kan inpek thar lehna turah hian thil kal tawh, politics-a kan inbeih thinna te, tunhmaa kan lo chin thin te a awm a nih pawhin remna leh muanna tichhe thei zawng hi chuan politics-ah pawh hian inchirhthehna hi awm lo se tih hi ka sawi duh a. Tunlai thangthar han ti ve leh chhawng ila, hian remna leh muanna hlut zia hi Mizoram-in a tawrhna nasa tak an hriat loh chuan an hrethiam lovin ka ring a. He remna leh muanna lo awmna atana bul tanna kha rambuai vang a ni a.

He ram a lo buai khan India Sorkar hian khua leh tuiah min pawm lo emaw tih mai turin jet fighterin min bomb a, namen lovin in leh lo te min halsakin khua min khawm a, mizote chu kuthnathawka ei zawng kan nih avangin thlawhhma kan la lo thei lova, thlawhhma lak min phal sak a nih pawhin chhun chaw ei lo chuan hna kan thawk thei lova, chawfun pawh awih lovin kawtchhuahah sipaiin nasa takin feh tur zawng zawng an check vek a, riltam thi kulin kan nu leh paten hna an thawk a. Chutiang chuan ram buai kha kan lo tuar a. Khua an khawm a, kan phurh theih chin zawng min phurhtir a, a bak zawng zawng chu buhzema buh a tlem emaw a tam emaw, in leh lo nen an hal fai vek a. Khatiing kha khatih hun laia kan tawrh a ni. Ka hriat reng chu, Farkawnah sipai an lo lut thut mai a, khua mi zawng zawng ni 4 leh zan 4 Biak Inah min hreng a. Pulpit hnunglam kha zunram thiarna a ni mai a, zah a awm thei tawh lo. Tiang khan min khawm a. Buhfai tham Pulpit-a engemawzat la awm kha nau hnute pek lai leh chawfah ngai te tan an hmang a. Chulaia ka la hriat reng, nuih tiza ve angreng chu, kan thianpa pakhat hian Biak in chhuatah vaimim fang khat a chhar a, thianpa pakhat hian a phel kha min puktir rawh a ti a. Chutiang khawp chuan riltam kan tuar a ni.

Keini pawh khatianga harsatna namen lo a thlen avang khan Shillong lamah risk kan la a, kan chhuk thla a. Shillong lamah pawh chuan muanna a lo awm reng reng lova, zirlaite CID tam takin min hel reng a. Khulaiah pawh muanna kan hmu chuang lova. Mizoram atanga lehkhathawn kan hmuh hi kan chhiar zawhah kan halral nghal zel a. Chutiang khawp chuan Mizoram pawnlam amite pawh chu kan buai a ni. Army lama awm officer liante pawhin rinhlelh an kai a. Khatih lai khan Assam hnuiaia awm kan nih avangin kan officer tam takte pawhin rinhlelh an kai phah a. Chutiang khawp chuan he ram buai hi kan lo tuar tawh a. Vawiinah hian remna leh muanna kan nei a. He remna leh muanna awm theihna tura thawktute zawng zawng hi, a tu a te pawh ni sela chawimawi an phu a, kan chawimawi zel tur pawh a ni. Chung thawktute chu vawiina thangthar, ram buai hre lo, remna leh muanna nawmzia hre lo ho hian an hriat theihna turin khatih laia thawktute kha an hming te pawh a theih chin chin chu tarlan tulin ka hria a. Khatih hun lai ka zuk ngaihtuah khan remna leh muanna nawmzia leh hlutzia ka hre tam tawlh tawlh a, a hminga Minister kan nih ve lai pawh khan muanna hi nuam ka ti khawp a, India rama state ralmuang ber kan tihte pawh kha lehlam atang khan hnialna han awm deuh thin mahse ralmuang hi ka han ti khawp a. Khawiah pawh hian vengtu awm lovin kal mah ila him hian ka in hria a, Mizoramah chuan. Tumah huat ka nei lova, tuman min huain ka hre bawk si lova. Politics-a kut inthlak duhna mai mizote thinsungah hian a awm ka ring bawk si lova.

Chuvang chuan ka rilru hi thlamuannain a khat veng veng mai a. A chhan chu he remna leh muanna vang hi a ni. Tunah pawh hian kan ram chhungah hel an lo awm a nih pawhin, mi kutthlak duhna khawp thinlung hi an put theih ka ring lova. Tuna kan sorkar hian mipuite him theihna turin nasa takin hna a thawk a. Chuvangin Pu Speaker, he remna leh muanna kum 25 lai kan hman hi kum 100 lo awm tur piah lam thleng pawhin remna leh muanna hlutzia hriaa, kan ram chhungah hian rem lohna awmtir theitu thil dang tam tak a awm a nih pawhin vawiina helaia mipui thlan lal leh a mawhphurtute tal hi chuan mei si dep kai tur zawng chuan hma la lo ila. Tichuan he remna leh muanna hi thang leh thar lo awm zel turte tan hlu taka a awm theihna turin kan zavai hian inpe thar leh ila. Chu chu kan ngaihtuahnaah awm thei se thain ka hria a. Kum 25-na den chhena resolution a rawn pulut hi a finthlakin a rem hriat thlak ka ti a. Pu Speaker, he House-ah hian resolution hi kan pass hnem tawh a, official resolution a ni emaw, private resolution a ni emaw, amaherawhchu, ngaihsak zui hi a hlawh lo riau thina hriatna ka nei a, a hlut pawh hi a ti hlu lo riau ka hria a, amaherawhchu, he resolution erawh hi chu kan zavaia tana tawrhna thlen the, laka min veng himtu, keimahni kan intuai thar leh na ni sela, he resolution “Mizoram kum 25 lai mai remna leh muanna kan nei ta hi lawmawm kan ti a, remna leh muanna kan nei hi chhung lam leh pawn lam atanga tihchhiat a nih loh nan mitinte inpe thar leh turin he House hian a ngen a ni”, tih hi full support ka rawn pe a ni e, ka lawm e.

**SPEAKER** : Aw le sawi duh kan la tam na a, kan sawidan kha a kal rualin ka hria a, against zawnga sawi kan awm lo va, bill pahnih la tihtlang leh tur kan la nei si a, mi 10 in kan sawi tawh a, chuvangin i sawi tawh lo mai ang, remna leh muannaah hian mitdel Sai hmu ang deuh kan nia, mahni side side-ah chuan kan thawk tangkai vek a ni, kan tangkai vek, theihtawp pawh kan chhuah vek, amaherawhchu, politics-a buai kan ni a, politics-a chin fel a ngai a, chu chu kan hriat reng a ngai a, politics-a chingfel tur chuan politician khan engemaw an tih a ngai a ni, khatilai kha chu hria i langin a thain ka hria a. Tu emaw khawlai leng ve mai maiin ka thawk khawp mai tih kha chu a ni ber lem lo, mahse, kan rilru chuan in chu chu a tin vek a, mahsela, hei remna leh muanna tha tak kan nei tawh a, chumi vawnhim erawhchu kan mawh a ni, kan nu leh pa ten thi leh thau pawlhin, India sorkar rinhleleh em emin tluk leh tlak fawmin hah taka an lo tih tawh, an lo thawhchhuah tawh boruak tha hi kan lo vawn nun zel hi a pawimawh em em a, tunah chuan sawi hona kha kan khar tawh a nga, bill-ah khan sawi leh kha in duh tho awm si a, aw le, Dr.R.Lalthangliana han sawi leh lawk rawh se.

**Dr.R.LALTHANGLIANA** : Pu Speaker, ka lawm e, ka sawi rei lo vang, keipawh he kan resolution hi a tha ka ti a, kumin hi Silver Jubilee-te a ni a, a pawimawh khawp mai a, chuvangin keini Party phei chuan kumtina kan lo lawm tawh thin leh kan lo hman tawh thin a nih angin, kumin phei chu nikum lam atangin Celebration Committee, Silver Jubilee a nihna ang hian hmang i langin tih te kha ngaihtuahna te kan nei a, chumi Committee-ah te pawh chuan a Chairman-ah te pawh min han dah a, mahse Silver Jubilee anih na ang khan hmang ila tihna te kha kan nei a, chu mi committee-ah te pawh chuan Chairman angte pawh chuan min han dah a, amaherawhchu, kan meeting-a nikum tun ang hun vel khan, nakuma kan celebration turah kha chuan party pakhat ringawt thil a ni lova. Mizoram mipui, mizo fate zawng zawng tan a ni a, chuvang chuan zau taka Mizoram mipui huap ang a hemi Silver Jubilee hi lawm nise tih kha kan duh thu kan thing ri a, hei, a lawmawm ka tih na em

em chu Pu Speaker, kumin kan hriat vek tawh angin, ni 30 kan han lawm kha Mizoram MKHC te khan committee-te vawi tam tak an lo nei tawh a, khang khan ngaihtuahna fing tak leh fel tak an lo nei tih kha a takin kan hmu ta kha kan hmang a, hlim takin hun kan han nei thei kha thil kan la neih ngai loh niin ka hria a, lawmawm ka ti khawp mai a, khang kan Kohhran hrang hrang inzawmkhawm committee-te chungah pawh khan vawiinah sawi hi he House hian kan ba niin ka hria a, lawmawm ka ti khawp mai.

Pahnihnaa ka sawi duh chu Pu Speaker, remna leh muanna han tih lai hi a thu hi a ropui a, Pathian thu nen pawh a inmil em em mai a. Bible-ah khan kan hmu a, Lal Isua tawngkam ngeiah chuan, “Remna siamtute chu an eng a thawl e, Pathian faa vuahin an la awm dawn si a”, a ti a. Remna siam hna kha a pawimawh a ni, Lal Isua lo pian an puan lai pawh a, chungnung berah remthu leng rawh se tih kha kan hmu a. Chuvang chuan Biblical a ni, a Pathian thu a ni, Pathian mission, Pathian duh dan a ni tih hi a Chiang em em mai a. Chuvang chuan heti kawng zawnga ram buai lai ti mai ang, remna awm hma a Kohhran hruihute, thlarau mite leh zoram mipuiin tihtakzeta remna leh muanna Mizorama a awm theihna tura tawngtaina hi Pathian hian a chhang a ni tih hi a lang Chiang em em mai a, harsatna tam tak sutlang tur a awm tih pawh kan hria a, mitam takin nunna an chan a ni, tin, mi tam tak an martyr a, tin, piansual phah tam tak an awm a ni, in leh lo te pawh chan an awm a, sorkara hnathawk lai te pawhin an hna an chan tih te pawh kan hria a. Chuvang chuan tawrhna tam tak awmna karah han inbiak fel dawn pawhin MNF underground sorkarte leh khatih hunlaia Central-a sorkar tan pawh khan a hautak, a buaithlak, in negotiate a lai leh laia in tan a insiamrem pawh kha thil hautak tak mai a ni tih kha a hmuh theihin ka hria a. Amaherawhchu, khang zawng zawng chungah khan kan dilna Pathianin a hlawhtlin tir a ni tih a lang ching hle a. Hei, khawvela inremna hmun hrang hrang ami kan han thlir pawn Mizorama inremna muanawm leh hlawhtling hi a vang khawpin ka hria Pu Speaker, chuvang chuan thil lawmawm tak a ni tih hi kan hriat a pawimawh a.

Tin, keini Mizote lampang ai mah hian Pu Speaker, sorkarna kan han chelh chungte pawha Delhi tlangah te leh khawi khawi emaw kan han zin nikhua pawh a ropui titu te hi central sorkar-a tu a te pawh party bik pawh ka sawi lo, khung khuanin min lawmpui hle a, ropui an ti a. 2004 nge 2005 bawr vel phei kha chuan khatih hunlaia MNF sorkar lai khan Peace bonus te pawh kha nuaikhat leh singkua lai mai kha min pe nghe nghe a, tiang ang khawp chuan a lawmawm hle a ni tih kha min hriatpui a ropui an tia ni. Tin, kum 20 an han tlin khan khatih hunlaia helaia sorkarna chelhtute khan Pu Speaker, Prime Minister hnenah lehkhate an siam a, Home Minister-ah te an sem a, central ah. Kum 20 a tlin cham hi chu minrawn lawmpui ve ula, nangmahni ngei lokal thei ula tiin kan Prime Minister-te leh kan mi pawimawhte kan zuk sawm a, amaherawhchu, eng eng emaw harsatna avangin an lo kal thei lova. Amaherawhchu, kan Prime Minister khan a ngaipawimawh hlein ka hria a, an aiawh kha Minister Pu ..... Pathia a tir nghe nghe a. Chung arawn tih te pawh chuanin rah chhe te te te chu helaiah kan lo seng ve nghe nghe a. Information Department tih tur ang chi khan culturer center sawm leh paruk cheng tam tak phei chu a ni lo sakna te pawh kha khu lampanga kan hotute khan anrawn pe a, tikhan eng eng emaw a zar te pawh kha kan zo a ni. Chuvang chuan meeting-naah te leh thil tihna reng rengah an thusawi tam ber hi chu muanna boruak a pawimawh zia, inremna boruak a pawimawh zia hi

kan sorkar laipuite pawhin an tawngkam hman ber a ni tih hi vawiinah hian ka sawi chhuak duh hrim hrim a.

Hmannia celebration ropui tak mai kan neih tum khan souvenir-te kha kan MKHC te khan an rawn buatsaih a, a ropui hlein ka hria a. Tin, thusawitute pawhin an thusawi kan han ngaihthlak khan remna hlut zia kha ti zawng hliir khan kan han sawi a, a lawmawm hi ka ti em em mai a, chuvang chuan credit ti mai ila, political party kan nihna ang pawhin tuman lak tum kan awm lovin ka hria a. Hei hi Pathianin malsawmna ropui tak min pek a ni tih hi vawiinah hian kan hriat a, chumi vawng nung tur chuan helai kan Resolution-ah pawh hian chhunglam leh pawn lam atanga tihchhiat a nih loh nan a ti a. Nidanga Pu Speaker, kan Resolution nen a inang lohna chu, tam tak kan Resolution kan lo pass tawh thin, he House-ah hian Central Sorkarah thlen ni rawh se tih te kha a ni a. Tuntum ami hi chu zuk thlen chi a nih pawh ka hre vak lova, a thu hi a tha khawp mai a, helaiiah keimah ni ram hruaitu kan nihna zawnah te, sorkar hnathawk kan nihna zawnah te, tin kohhran hruaitu nihna zawnah te, NGO te, ram mipui zawng zawng, mizo citizen tawh phawt chuanin mawhphurhna inangkhat tlang kan nei tih pawm dam nuam tak mai Resolution-in dah a lo ni hi a lawmawm ka ti khawp mai. Chuvang chuan Pu Speaker, he Resolution hi kan pass hi a tha kan ti khawp mai a. Amaherawh chu, heng kan pass hian helai ram rorelna khawl sang ber, thuneihna sang ber te pawh kan nih vena lai a awm a, hetiang meuhin kan han sawi hi chuan kan thinlung tak taka a hlawhtlinna tur atan hian bial represent nei kan ni vek bawk a, ram pum huap kan ni bawk a, theihtawpa tan kan lak chhoh pawh kha a pawimawh dawnin ka hria a. Tin, keimahni ringawt hi a mawhphurtu tur pawh kan ni lo a ni tih kha kan hriat nawn leh a thain ka hria a. Mi zawng zawng hetah hian min huamin ka hria a. Tin, a tawp berah chuan Pu Speaker, ka'n sawi duh chu, he remna a awm theihna tur atana thawktu zawng zawngte, kan Kohhran hruaitu zawng zawng te, political party-ah te pawh a hruaitu zawng zawngte political party ahte pawh a hruaitu zawng zawngte, tin, kan NGO lama mawh latu zawng zawngte leh heng atana tawngtaina hmangtute, nunna hlu tak pe a martyr chhungkua zawng zawngte leh in leh lo te leh sawrkar hna hialte pawh chan a theihtawp a beitungte zawng zawng chungah hian vawiinah hian lawmthu te pawh hi sawi thain ka hria a ni. Pu Speaker, ka lawm e.

**S P E A K E R** : Le, kan duhtawk tawh ang a, la phar in awm a. Opposition lam hi 8 an ni a, 6-in an sawi tawh a, rulling lam hi 31 in ni a 7-in in sawi tawh a, a ratio dika kan tih chuan kan rei lutuk ang, dar 7 kan thleng leh mai ang. Chuvang chuan, sawi ve lawk lo mai rawh u, insum theihna te hi nei rawh u, i duhtawk ang u against zawngin sawi kan awm lova, heti lai hi kan lawm tlang a, kha kha duhtawk ila. Amaherawhchu, chair atanga ka'n sawi duh chu, hon'ble Member ka atangin India-a leng lo ang a ngaih theih zawng tawngkam, vawiinah leng deuh tho mahse naktuk lawkah chuan len loh tum ang khatiang aw kha hon'ble Member, India Constitution-a chhechham a, he House-a lo lut chuan sawi lo hram ila tih kha ka request duh che u a ni.

Tunah Minister zahawmtak kha kan lo sawm ang a, resolution neitu kha, adopt te pawh han dil nghal sela.

**Pu LALSAWTA, MINISTER** : Pu Speaker, ka lawm e. Official Resolution hi pass ka dil hma hian nichina kan sawi, Assembly question zawhna chungchang kha hetia a hminga mawhphurhna ka neih avanga kan department-te lampang ka sawina a ni lova, Parliamentary Affairs Minister ka nihna anga Minister tena an chhanna ka hnena lo thleng khawm a, a tlem lutuk a, churang chuanin, ka mangang ve tho va, Officer-ah pawh lo remind vek teh u ka tih avangin kan sawi zawk a ni a, min lo hriatthiam ka beisei a.

Pu Speaker, vawiina kan resolution hi sawrkarin uluk taka kan ngaihtuah hnuah kan han phuah chhuak a, a sawitu zawng zawngin a tha kan ti tlang hle mai a, a lawmawm. Churang chuan, kei chuan thui sawi lovin a tawp kharna ang deuh hlekin tlem kan sawi ve ang a. Ram buai hrehawm zia hi sawi dawn ilangin mi pakhat ringawt pawhin nilengin sawi ila kan sawi sen ka ring lova, a chhan chu, a taka tawngtu tan, a tuar ve chin tan chuan a hrehawm em em a ni. Tin, keini ang rual te, keini aia naupang deuh thleng pawh hian, Mizoram kan ngaihtuahna hrim hrim pawh hi ; hun hi pahnihah kan then tawp mai a ni, ram buai hma leh ram buai hnu, tihian kan ngaihtuahna-ah pawh hian, kan duh reng vang pawh ni lo hian Mizoram hun hi kan then tawp mai a ni.

Chuti khawp chuan Mizoram history-ah hian ram buai hnu leh ram buai hma hi kan hre hrang a ni. Tin, ram buai lai leh vawin thleng hian state dangah leh khawvel ram dangah reng reng pawh hian zawhna in zawh zahthlak lutuk, “Lungin i tang ve em?”, tih hi Mizoramah hian a zahthlak reng reng loh. Kan chil phul fai vek a ni, lungin tang lo a ram hi kan awm mang lo zawk a ni. Churangin kan ram buai rapthlak zia hi sawi hleihtheih pawh a ni lo. Tin, kan neih ve ang chhun chhun thingtlang mi te, buh kan lo neih ve im em ang te, kum khat daih kan lo tih ang te, chungte chu kan hmuh lai ngeia hal a, grouping-a tihluhin “Saw saw i khua anih tawh saw, hei hi i khua a ni tawh lo”, ti a, sipain ran khalh ang mai a min han khalh a, kan awmna khua tur kan hmehriat pawh ni lova kan han awm thin te, a rapthlak zia kha sawi hi tul ka ti. Tin, kan khaw hming ah te khan PPV (Protected Progressive Village) tiin min han vuah sak a, a dik tak chuan a ngeiawm a ni, ironic deuh mai a nia, protected a ni lova, kan him loh zia kha tlang hriat a ni, a hrechiangtu vek kan ni “protected village” a ni lo, tin, “progressive” te phei chu a ni lo lehzual. Hmasawmna kawng reng reng kha engmah tih theih a ni lo. Mahse, heng zawng zawng hi kan tuar a, kan tuar chhuak a. He remna rawn hmu ve pha lo tam tak chu ramhnuaiyah te an thi a, ina thi an awm a, mahni khuma thi, sarthi pawh an awm a ni. Churang chuan Pu Speaker, vawiina kan Official Resolution hi a pawimawh em em reng lah tak a, mahse he mi thleng tur hian mitinin tih kan nei ta a, kan tih neih te hi in sawi chhiat sak chi a ni lo, kan tih hi a lian tlang a ni.

Pakhatnaah chuan, Aizawl khawpui ngei a, ruang tual laia awm senhawina atangin Kohhran hian hma a la tan a ni. Hei hi keini pawh tlangval kan ni tawh a kan hmu a ni. Chuta tanga bul tan chuan Rev. Dr. Ngurauva te leh mi dang dang Rev. Dr. Lalsawma ten hma an la nasa em em a ni, buai phat atang khan hma an la tan a ni, a tawp thleng zak in, a hmawr bawh thleng zak in kohhran hi engtik lai mahin a tawmim lo reng reng, a ti tha thlawt a ni, hei hi kan pawm a ngai a, khawi

kohran nge tih pawh hi sawisen pawh a ni lo. A kip hianin kan theihtawp kan chhuah takmeuh a ni. Tin, Political Parties-te pawhin Mizoram a mamawh zia hria hian hemi kawngah hian party vawiina awm ta lote thleng pawh hian theihtawp an chhuah vek a ni.

Tin, mimal hming lamte pawh hi kan han hreh thin bawk tak na a Pu Lalthanhawla hming lam hi hreh tur a ni lo, a chhan chu kan ngaihtlak tak ang khan a ni khan kha remna a thlen theihna tur atan khan Chief Minister a nih miao si avangin kut khima an lo haw ai chuan tlangnel taka an rawn haw a, a tatu an rawn nih ve a, kha khaw mi leh sa an rawn nih ve na tur atana rem a lo ruatna tura buaisaihnaah khan mi tangkai tak a ni tih hi kan pawm ngam tur a ni. A dik tak chuan tu Sorkar hnuai ah emaw khan inthlannate neiin Stateah khan pakai ta ngawt ila, a harsa ve a ni. MNF mi leh sa te chu kan hre vek a, Police-te pawhin case-te an awr tir phengphung a, IPC tih leh Armed Acts tih leh khatiang zawng zawng kha an arh rual a ni. Mizo mipuiten kan lainat em em nachungin khang kha thil kal dan ve tho a ni.

Chutiangte ngaihtuah chuan, “Hetiang chu a tha lovang, Remna leh Muanna a awm theih dawn phawt a mipuite kan engthawl theih dawn phawt chuan, an ni hi zalen taka an rawn luh a, lungmuang taka an rawn awm ve hi a tha e, Chief Minister-te an rawn nih theih te chuan a tha a lawm,” ti a mahni dinhmun a lo kian thei te kha chu fak hreh em em tur pawh a ni bik lo. Tin, MNF ho kha an fakawm ka ti, mi 580 chuang Sipai, silai keng thei thah hotute thununna pawm thei leh discipline leh control-na hnuai-a tumah a bo a bang awm lo va he remna an rawn zawm thei hi an fak awm thlawt a ni. Hmun dangah chuan hetiang hi a vang, Punjab ramah te pawh Accord chu an nei a, Assam-ah te pawh an nei a, mahse Mizoram angin a hlawhtling lo. Chuvang chuan an fakawm em em a ni. Chuvang chuan tumah hi an thawh a te love, an thawk lian vek a ni. Kan zavaia zalenna leh muanna leh lungmuanna tur atan kan thawk tlang a ni tih hi pawmtlan a thain ka hria a. Engemawti zawngin kan han sawi thin tak nain a politics zawng hi a lo awm leh zauh thin a, thil tullo niin ka hria. Chuvangin Official resolution-in a tum tak chu Remna chu engtinngge kan vawn him zel ang chung lam leh pawn lam atanga tihchhiat anih lohna turin mitinte inpekna tur ngenna tura he House zahawmtak in sawm chungchangah hian pakhatnaah chuan zirtirna dik hi a pawimawh Pu Speaker, nichinah khan Chair atangin i rawn sawi a, i rawn sawi hma pawhin ka lo chhinchhiah tawh a. Extra Constitutional Position insawihmuh hi politic-ah hian thil hlauhawm tak a ni. Chawhma lam pawh khan ri viai viai chu a awmin ka hria. Mi hian thil tha hi kan duh em avang hian, kan neih theih phak piah lam an sawi hian ban duak duak a awl khawp mai. Chuvang chuan Extra Constitutional Position ang zawng, he India Constitution-in India citizen kan nihna anga kan chanpual leh kan tih ang tur piah lampang kan sawinaah hian duhthusam sam luat hi a hlauhawm em em a. Mipui kan thunun zawh loh leh tepawh hi a hlauhawm em em a ni. Hei hi chin loh a tha ka ti, pakhatnaah chuan.

Tin, pahnihnaah chuan Sorkar mek tunah kan ni a, kan Chief Minister zahawmtak hovin, Rorelna dik leh tha kan neih hi a pawimawh. Nichinah kan Member zahawmtak Pu K.Liantlingan a rawn sawi a. Hemi Remna leh Muanna venhim zuina atan hian thil pawimawh tak a ni. Hei hi tihtakzeta kan hotu zawng zawng leh kan thawhpui zawng zawngte pawhin kan tih ngai chu a ni.

Tin, a pathumnaah chuan buai duh lo thalai kan neih a ngai. Buai duh lo thalai, buai hlah hrim hrim vang nilo, kan neih hi a pawimawh khawp mai. Thalai hian a tlangpui thuin buai maite hi an han cho thin a. Chutah tak chuan insum kar a ngai em em thin a ni. Buai duh lo, hlah vang ni lo, dawizep vang ni lo, Remna leh Muanna hnuai a awm a hlutzia hrechiang thalai ten buai an duh tlat loh hi chuan fupawrh tuin fuihpawrh tum thin mahila, thalai rualte hian buai hi duh miah lo sela tih hi ka'n sawi tel duh a ni. Sawi tur tam tak awm karah Kohhran leh Tlawmngai Pawl ten tunhmaa an lo thawh nasat tawh zia hria a, buai tur awm chi reng reng hi 'E khai, khatiang tur a ni ngai love, Institution-te hi zah tur a ni. Sorkarte pawh hi an tlin loh ang ang hian pawmzam nilovin zah nachang hi chu i hria ang u' tih te hi chu inzirtir thar leh a ngai khawpin ka hria a. Khawvel-in kan entawn thin United Kingdom-ahte chuan an Lal fapa, lal ni leh lo tur, nuthlawi a duh vanga lal ni leh lo tur avang ringawt pawhin khawvel hi a nghawrnging a ni. Engatinge kan tih chuan, khang lalte kha mihring ve satliah mai an ni. Mahse, khawvel kalhmangah lal an lo ni miao a, mi hian an phu lo chung pawhin an lo chawimawi em em a. Lalthutthleng aia nuthlawi an thlang mai pawh kha khati khawp khan a nghawng a na a ni. Hei hi ka sawi na chhan chu Institution zahna hi kan hriat leh zual a pawimawh em emin ka hria a. Mizo chauh lo pawh, khawvel hnam tin hian institution an zah a. USA-ah te chuan an lungawiloh pawhin India rama tuallaia inchaih chhuak inchaih chhuak lo hian a nih dan phung dik tak hian a damna turah a correct-na tur hmunah hian an sawi thin. Hei hi a pawimawh a, Court-te leh thil dangte pawh a awm, a hmanrua, chung ang hmang chuan tih tur a niin ka hria a.

Chuti anih loh chuan underground-a engemawtia kal palh a nih hian lam tang lam tang a lo awm thuai a, rin aiin North East-ah te pheih hi chuan underground avanga hemi harsatna hi vawinah hian chinfel sen loh hi a awm tawh a ni. Chuvangin Pu Speaker, heng zawng zawngah hian Sorkar-in a ti vek thei lova. Kan zavai takmeuh meuha kan tih a ngai a. Chutichuan, he Resolution hi lungrua takin kan sawi tawh a, la sawi lo te pawhin min lungrua pui tho ka rin avangin khawngaihni kan chhiar chhuak leh ang a, hei hi min pass pui turin ka sawm che u a ni. "Mizoram kum 25 chhung lai mai Remna leh Muanna kan nei ta hi lawmawm kan ti a. Remna leh muanna kan neih hi chhunglam leh pawnlam atanga tihchhiat anih loh nan mitinte inpe thar leh turin he House hian a ngen a ni" tih hi lungrua taka min pass pui turin ka ngen a ni. Ka lawm e.

**S P E A K E R** : Awle Resolution puluttu Minister zahawmtakin tiang khan a rawn sawi a. Kan dam tlanna tur thu tak ni te khan ka hria a, a lawmawm khawp mai.

Tunah chuan adopt a rawn dil a, he Resolution hi a chiang bawk a, House hian kan adopt thei em ? Awle, kan adopt thei a, a lawmawm e.

Awle, . "Mizoram kum 25 chhung lai mai Remna leh Muanna kan nei ta hi lawmawm kan ti a. Remna leh muanna kan neih hi chhunglam leh pawnlam atanga tihchhiat anih loh nan mitinte inpe thar leh turin he House hian a ngen a ni" tih Official Resolution chu House-in lungrua takin a adopt ta a ni.



Tunah chuan Business dangah kan kal leh ang a, Pu H. Liansailova, Minister zahawmtakin “The Mizoram Protection of Interests of Depositors (in Financial Establishment)(Amendment) Bill, 2011

**S P E A K E R** : Financial Establishment Amendment Bill, 2011 hi House-ah introduce rawn dil rawh se i lo ko ang.

**Pu H. LIANSILOVA, MINISTER** : Pu Speaker, i remtihnain he House zahawmtakah hian he Dan “The Mizoram Protection of Interest of Depositors (in Financial Establishment) Amendment Bill, 2011 hi introduce ka rawn dil e.

**S P E A K E R** : Kan phalsak em? Kan phalsak maw, Minister zahawmtakin introduce a rawn dil a kan phalsak a, tunah introduce pahin House-a ngaihtuah atan rawn move nghal sela, i lo ko leh ang.

**Pu H. LIANSILOVA, MINISTER** : Pu Speaker, “The Mizoram Protection of Interest of Depositors (in Financial Establishment) Amendment Bill, 2011” hi hetiang chhawpchuah a han nih chhan chu kha kan Amendment Bill-ah khan statement of object and reasons tihah khan chiang taka tarlan a ni a, hei kan ramah hian sum khawih a, sumdawna deposit mipui atanga lakkhawm te, tin, inpuik tir te, chu chu Company hming eng emaw nei leh tin, Corporation ang deuh te pawha indin an awm nual a, chungte chuanin mipui hnen atangin deposit te khawnkhawm a, an la a, tin, hlawkna engemawzat pawh tiamin hun engemaw atang khan kan ramah hian chutianga hmala an awm thin a.

Tin, kan hriat angin mimal nge ni pawlho nge ni chutianga han ti ve mai pawh an lo awm a. Tuna kan hriat lar chhiahpuam pawh hi chutiang deuhva illegal investment tin, fraudulent operation nei-a kal ni te pawhin a lang a. Kan hriat theuh angin hetia han hriat theih chinah chuan hemi a sum involve pawh hi crore 300 chuang zet 338.83 ni hial te pawh a sawi a ni a. Tin, tunah hian hetia kan hriat theih chinah chuanin non banking financial companies NBFC leh unincorporated bodies hi 30 lai awmin hriat a ni a, tin, heng zinga sawm hi chuanin company Act 1956 hnuaiyah emaw, Reserved Bank of India Act 1934 hnuaiyah emaw a hming chuan registration te chu an nei baw na a, mahsela an operation tih tur tak a kha, nichina kan sawi tak ang khan, illegal emaw unauthorised operation kha hmangin mipuite atangin pawisa, deposit an la a. Tin, loan te pawh han puk chhuah tirin dahkham leh eng emawte siamin, in leh lo in chhuhsaknate pawh a thleng tih hriat a ni a. Hetiang thil thleng tur venna atan leh lo awm zel tur venna atan kum 2002 khan sawrkarin a principle Act hi alo pass tawh a. Amaherawhchu tuna kan dinhmun leh kan ram problem zirchianna, kan Finance Department te, tin hetiang concern-a han tel tur awm chi leh Reserved Bank of India-ten July thla khan Mizoramah hian Seminar neih a ni a, 12<sup>th</sup> July 2010 ah, chuta tanga han thlir chhoh zui zel leh zirchianna atang chuan tuna kan Dan dinglai hi kan rama thil thleng leh he harsatna chinfelna atan a tawk ta lova, chuvang chuan

amendment siam hi tul ti a han chhawp chhuah a ni ta a ni. Amendment han chhawp chhuah hian section pahnihna hi deposit tih hi hrilhfiahna Chiang Zawc leh financial establishment tih pawh hi sawifiahna Chiang Zawc leh definition thar, tuna kan rama thil thleng kan thunun theih nana tihchian ngaia hriat a nih avangin section hnihna kha amend a, substitute turin han rawt a ni a.

Tin, chutiang bawc chuan section pathum na ah khanin, thuneituten tuna kan Dan hman laiah hi chuan, thil a thlena a pawl tawh hnuah chauh action lak turin emaw ngaituahna hman theih ang chauh a awm a. Amaherawhchu, helaia loophole awm lai hi hnawhkhah ngaia siamthat ngaiin kan mithiamten an hria a. Chuvang chuan, Section 3 clause pumpui hi a thara rawn thlak, tuna kan rawn chhawp chhuah ang hi amendment tur angin kan rawn kalpui ta a. Hetah hian tawi tea han sawi theih chu khatanga financial company emaw banking lam hawi zawnga hna thawk tur chuanin a District Magistrate hnenah an in report ang a. Tin, anni pawhin an activity kha lo thlirin harsatna leh buaina a awm lohna turin District Magistrate-te khan hma an la zui nghal thei ang a. SP te pawhin anmahni thuneihna zawn turah kha chuan hma lain hetanga unauthorized operation emaw illegal taka operation lo awm thin hi an thunun thei ang a. Chutiang chuan sawrkar hian kan depositor te, kan mipuite heng mite lakah hian kan humhim tha zawc ang tih beiseina leh tula hriatna avangin he dan thar Amendment Bill hi kan rawn chhawp chhuak a ni a. Kan House Member-ten in lo zir Chiang tawhin ka ring a, vawiinah hian he kan chhawp chhuah ang taka min ngaituahsaka min pass sak turin ka'n ngen nghal a ni e. Ka lawm e.

**S P E A K E R** : Aw le, Minister zahawm takin Amendment Bill a rawn introduce ta a, ngaituah turin a rawn move bawc a. A copy kha kan sem vek tawh kha a ni a. Tunah kan sawiho ang a, Member tinte kha minute 5 inpe mai ila a tha ang. Tunge han sawi dawn le? Pu R. Lalrinawma, a dawtah Dr. R. lalthangliana. In lamah khan kan dakte khan an rawn sem vek che u a, in buai lutuk a in lo hre lo a ni ang e.

**Pu R. LALRINAWMA** : Pu Speaker, Bill kha ka rawn support duh a. Sawi vak ngaiin ka hre lova, thil tha a ni a. Dan hmasa a lo awm a, chumia famkim tawc lo siam thatna chu a ni mai a. Tunah khan kan Minister zahawmtakin a rawn sawifiah tawh a. He Dan 2002-a pass a nih hnuah harsatna tam tak kan ramin a tawc a, Chiahpuam te a lo awm a. Khang avang khan a loopholes kha tunah siamthat turin a rawn chhawp chhuak a, a lawmawm hle mai a. Kan mipuite tan, ram tana thil tha leh tul he sawrkarin ngaituahna senga a rawn ti thin hi Assembly-ah kan tel ve hnuah Dan tam tak mipui tana tha tur passed chhoh a ni tawh a, siamthat ngaituah siamthat chhoh a ni a. Company-a in register ve der der si kha, a hma a dan khan a lo huam si lova, tunah hian khang te huam tir tur kha a ni a. Tin, engemaw thil an tih pawl phawt hnu a hmalak theih chauh ni te kha tunah chuan a thlen hma pawhin hma lak theih tur a ni ta te, dik lova thil an ti ni a a lan chuan, District Magistrate leh SP ten suo moto a investigation-te pawh an tih theih nghal na tur, complaint emaw, report emaw awm kher lo pawha rinhlelh awm leh hlauhthawn awm a thil a awm a nih chuan. Chuvang chuan sawiho vak pawh ngai lova, remtih tlan mai tur chi niin ka hria a. Kan mamawh em em a ni a.

Kan Minister zahawmtakin a move-naa a sawi ang khan Mizote kan fimkhur tawc lova, kan duham leh hlawk kan tumnaah mi tam tak kan chesual nasa ta

hle mai a. LSC te an inhawh a, cheng singhni khat chawi te in an inhawh a, nuai tam tak pukna turin an dahkham a. Khang kha LSC neitute khan an chan leh a. Khatiangte kha kan tuar mek a ni a. Hlawkna dik erawh hi chu a tha a. Bank pangngaite a awm a, Pu Speaker, chu mi ni lova in sawi rinawm te, Pathian thu nena ka tawngtainaah i lang tlat an tih pheih chuan awih loh telh telh tur a ni a. Chu chu kan mipuite hian hria se ka duh a. Kan buai nasa em em a. He Amendment hi pass turin ka rawn support a. Chutih rualin typing mistake hi chu kan Dan pawhin a phal angin correct theih a ni a. Phek 4-naah khan (b)-na han chhiar thlak a tlar 8-na kha Financial Establishment is not likely to return the deposits, the Government may in order protect tihah hian The Government may in order to protect ni tur awm tak a ni a. 'to' hi hmaih palh niin a lang a. Kha kha siamthat theih ni se tiin ka'n support a ni. Ka lawm e.

**S P E A K E R** : Dr. R. Lalthangliana i lo ko ang.

**Dr. R. LALTHANGLIANA** : Pu Speaker, a lawmawmin ka hria, Bill Amendment mai a ni a. Amaherawhchu, a pawimawh viauin ka hria. Tlem lai deuh khan Seminar an buatsaih a, chu Seminar an buatsaihah chuan fimkhur a tul zia sawi a ni a. Khawvel hi a thang nasa tawh em em a. Internet leh Website leh thil dang hman hianin, mahni In atang hian thil tam tak hi a lo tih theih tawh a, mahni inlum atangin, mahni dawhkan atangin Air Ticket-te pawh kha a lak theih vek tawh mai si a, kan awlsam tawh si a. Chumi karah chuan kan Account atangte pawha pawisa inruk sak theih dan kawngte pawh hi lo awm thei khawp hialin khawvelte pawh hi mak deuh hian a lo awm tawh a. Chutih karah chuan Mizoramte pawh chutiang chu a ni chiah lova, pawisa peipunna kawnga fimkhur taka thiltih ngai a ni tih hi 2002 kuma hetiang Act-te kan han neih, chumi hmanga tlema han strengthen ti mai ila, chumi atana a lo lut hi thil pawimawh tak, kan pass ngei ngei turah ka lo ngai a. Hei, tunlai hian engemaw tiin instruction hi a tam khawp mai a, State Bank leh khawi khawi emaw KYC an tia mawni, 2006 hma lampanga account neite chuan identity prove, Photo I.D tih te, Ration Card rawn tiru tihte pawh hi a tam a, tiang velah khan kan fimkhur hrim hrim hi a tul hle a ni tih a lang a. Chuvang chuan, hemi sumpai engemaw reliable, hriatchian mang siloh te an han tih kan venna tur pawimawh tak mai Bill hi a ni hrim hrim mai a. Chuvang chuan, tihmakmawhah ngai ta ila, pass mai hi keini lam pawh hian tha kan ti a. Vawiin chu rinai in kan tui tlang a, a lawmawm a, a remna lampang kha Pu Speaker, hlim deuhin kan sawitlang thei a, hei pawh hi thil tha tlang a ni a, kan zavai atan, Mizoram mipui tan hetia a lo luh ang hian pass mai ila tih kha ka'n rawt teh ang.

**S P E A K E R** : Awle, Minister zahawmtak kha han ko leh ilangin, ani khan sawiduh a neih chuan chungte pawh chu han sawi tho sela. Tichuan, Pass han dil nghal mai se a tha awm e.

**Pu H. LIANSILOVA, MINISTER** : Pu Speaker, Member-ten ngaihtuahna thatak hmangin Bill kan han putluh ang pawh pass mai min han sawipui kha a lawmawm hlein ka hria a. Tin, han sawibelh vak lehchuan tur pawh a awm lova. Amaherawhchu, kan Member zahawmtak Pu R. Lalrinawma'n typing mistake/omission a rawn sawi erawh kha chu correct nghal turah a ngaih theih

maiin ka ring a. Grammatical emaw, typing mistake-a chiangsa a, khatianga min pawmsak theih mai chuan a lawmawm khawp ang a, chuvang chuan, Member-ten min pass pui turin ka han dil nghal a ni e.

**S P E A K E R** : Awle, Minister zahawmtakin a Bill kha pass pui turin a rawn dil a, helaia siamthat tur tlem te te kha chu kan dan pawhin min phalsak angin kan Office lam atang pawhin an lo ti mai ang a. Tichuan kan tihdan pangngaiin he bill hi pass remti apiangin ‘remti’ ti rawh u le. Remti lo kan awm chuan ‘remti lo’ ti rawh u le. Awm lo maw. Awle, ‘The Mizoram Protection of Interests of Depositors (in Financial Establishment) (Amendment) Bill, 2011’ chu House-in lungrual takin a pass ta a ni. **(Pu H.LIANSILOVA, Minister : Pu Speaker ka lawm e.)**

Bill dang ngaihtuah leh tur kan nei a. Pu Lalsawta, Minister zahawmtakin, ‘The Mizoram (Pension for Members of the Defunct Mizo District and of the Defunct Pawi-Lakher Regional Council) (Amendment) Bill, 2011’ hi House-ah Introduce phalna han dil sela, ilo ko ang.

**Pu LALSAWTA, MINISTER** : Pu Speaker, ka lawm e, i remtihna leh i mi sawmna angin ‘The Mizoram (Pension for Members of the Defunct Mizo District and of the Defunct Pawi-Lakher Regional Council) (Amendment) Bill, 2011’ hi he House zahawm takah hian ka rawn chhawpchhuah min phalsak turin ka rawn dil e.

**S P E A K E R** : Le, kan phal sak em ? Kha introduce a rawn dil a, chuan rawn introduce sela ngaihtuah turin rawn move nghal bawk rawh se, ilo ko ang.

**Pu LALSAWTA, MINISTER** : Pu Speaker, ka lawm e. He Bill ‘The Mizoram (Pension for Members of the Defunct Mizo District and of the Defunct Pawi-Lakher Regional Council) (Amendment) Bill, 2011’ hian a tum chu hun rei tak tawh laia Mizo District Council member lo ni tawh te la dam te tana Pension pekna tur a ni a. Tin, chung an chhungte tana Family Pension pekna tur Bill a ni bawk a.

Pu Speaker, Pension hi a la damte tlemte an ni a. kan han chhut a, hei mi 10 pawh kan zia hlei thei lova, kan hresual mai thei a. Chungte tan chuan pension hi thlatin tunah ₹ 4500 la ve tawh se, chutah kumtin ₹ 300 in pung ve se, amaherawhchu, Dan siam leh hmata a nih chuan chumi chhung zawng chuan Maximumah ₹ 84000 hi la ve se, ₹ 8400 hi pel lo thung se, pension la damte hian la ve thung se tihna tur atana he Bill hi introduced a ni a. Tin, anmahni awm tawh lo an chhungte tan Family Pension hi an nupuite emaw an fate emaw chungte tan chuan thlatin ₹ 2500, kum tin 100 a lo pung ve zelin amaherawhchu a pun tam hle pawh a ₹ 3500 pel lo turin he Bill hian a rawn buatsaih a, chutiang tak chuan kan ram tana lo thawk tawh, kum 40 vel lai liam ta-a lo thawk tawhte, vawiinah harsa taka lo awm tawh te pawh an awm

ve ang a, chungte tan chuan he Bill-in a rawn ken luh la damte tan pension ₹ 4500 atanga ₹ 8400 an lak theihna tur leh a awm tawh lo te pawh an chungte talin ₹ 2500 atanga ₹ 3500 an lo lak ve theihna tur hi sorkar chuan kan buatsaih a, hei hi he House-in a pass loh chuan a tak a chang thei dawn lova. An dinhmun-te hrethiam a, an harstanate pawmpui a, chungah chuan kan ram tana lo thawk tawh kan hriatzuina leh an tana kan tih ve theihna lai hre rengin he Bill hi ngaihtuah tlang turin ka han sawi hawng a ni e. Ka lawm e.

**S P E A K E R** : Heti laiah hian mizo district tih ringawt em ni? Council a tel lo em ni? A danah khan “Members of the Defunct Mizo District” a ti ringawt mai a.

**Pu LALSAWTA MINISTER** : Pu Speaker i sawi ang chiah khan a chungah hi chuan “Mizo District Council” tih chiahin a awm e.

**S P E A K E R** : Kan hruaitu hmasate theihtawp chhuah a kan duhsak theihna a rawn sawi chiang khawp a. Kan ram hruaitu hmasa te, kan theih ang tawka kan duhsak theihna lai a ni a. An lo liam hnem tawh hle a. Min la dam pui te an lo tlem hle tawh a ni tih te pawh kha kan han hria a. Chu chu kan sawiho ang a. Minute 5 inpe leh ilangin. I’n sawi leh dawn teh ang u. Tunge sawi hmasa dawn? Pu C.Ramhluna.

**Pu C.RAMHLUNA** : Pu Speaker, ka lawm e. Hei, vawiinah, “The Mizoram (Pension for Membrs of the Defunct Mizo District and of the Defunct Pawi-Lakher Regional Council) (Amendment) Bill”, 2011 kan sawi ho thei hi lawmawm ka ti a. Kan Minister-in fing takin leh remhre takin leh duhsak takin tuna kan member, hmana mi tawh, la dam ho te leh an chungte tana duhsak taka thil a rawn ti a, rawtna a rawn siam hi a lawmawm ka ti a. Tunlaih thil man a lo to tawh a. Chuvang chuan hetiangah han tihsan hi a tul ve hrim hrima hriatpuina keini lampang atang pawhin kan nei a. Chuvang chuan he Bill hi a thain a lawmawm kan ti a, chuvang chuan kan thlawp a ni tih kha ka han sawi duh a. Chutih rual chuan Pu Speaker, he dan hi kum 1996 ah te, 2001 ah leh 2005 ah te khan amend a lo ni tawh tih kha Statement of Objects and Reasons-ah khan a lang a. Member ten kan hriat ve mai mai atan kum 1996 ah leh 2001 ah leh 2005 ah te khan engzatnge an lo lak ve reng reng a, pension-ah khan. 2005 atang khan tunah hian engzatin nge a lo pun tak tih te kha inhriattir ve theih ni sela a thain ka ring a. Chu chu ka han ngen duh a. Tin, chubakah chuan thil pakhat ka’n sawi duh chu District Council leh PL Regional Council-a family pension-te kha tlemin a inthlau deuh em aw ka ti a. Amaherawhchu, tuna han rawtna tur chu ka nei chuang vak lova. Entirman, District Council hnuai a ₹ 4500-8400 an lak laiin sawlam pang ami te khan ti ta mai ila, a awlsam zawngin ₹ 2500-3500, leh a dang te pawh kha. Chuvang chuan kha lai kha a enchian theih deuh hlek em aw tih kha ka ngaihtuah deuh hlek a nih chuan Pu Chairman kha lai kha chu a dik mai a, kan hriat chian duh chu 1996, 2001, 2005 ah khan engzat nge an lo lak tih kha kan Minister zahawmtak khan min han hriattir thei em? tih kha ka zawt duh a ni. Ka lawm e.

**SPEAKER** : Tunge sawi leh dawn, in sawi tawh dawn lo maw, keini zingah chuan kan pension ah pawh a enjoy kawp thei tur chu Pu Hiato te an ni mai a, Regional Council-ah pawh khan a ni hi a ni pha a, a CM phak em loh pawhin a EM pha daih mai a, a ni hi chu a enjoy kawp chi kha a ni dawn a ni, sawi duh Pu Hiato khan a nei em?

**Pu S.HIATO, MINISTER** : Pu Speaker, min han sawm takah chuan a lawmawm viauin ka hria a. AMDC Mizoram District Council hi a dam hi tlemte kan ni tawh a, family pension-te hi tam takin an dawng tawh lo va, tin, PL Regional Council-a member chin kha tlemte kan ni bawk a, vawiinah a awm zingah chuan regional council-ah chuan pension ₹ 4500 dawng ve tur zing ami ka ni mai a, midang hi chu dawng ve tur pawh in awmlo a nga, hei hi sorkar bill a ni a, MDC a tar tawh tak Pu Pahlira te pawh hi an tel dawn a, tuna MR hlawh pawh zat lo hi chu nakinah chuan amendment hi min ngaihtuhsak leh ang chu tih hi ka duh a. MDC hlui meuh a dam tlemte si, ₹ 4500 chauh a ni mai kha chu, a tlem deuh mang e aw !! kei chuan ka ti a, tin, family pension ho pawh kum khatah ₹ 100 chauha a pung mai hi chu a tlem ka ti a, chu pawh chu kum 10 a tlin hnuah chuan pek belh theih tawhloh han tih te hi chu kei chuan ka ti a. Engpawhnise, Parliamentary Secretary hian engzat chiah nge tunah hian MDC la dam tih te, Mizo District Council ami tih te, PL Regional District a mi tih te, Pu Ramhluna rawn sawi dan ang khan engzat chiah nge kum khatah khan a rawn pun chhoh dan tih kha min hrilh theiin ka ring a, chu chu kan House hi min hrilh thei se, ka lawm khawp ang.

**SPEAKER** : Aw le, a changtu Minister-in khang sawifiah ngai, member ten an rawn sawi kha rawn sawifiah sela House tihbengvar nan pawh a tul e, i lo ko ang tichuan pass rawn dil nghal se la.

**Pu LALSAWTA, MINISTER** : Pu Speaker ka lawm e, Mizo District Council Member-te kha kan han ziak kan han ziak a, 10 chu kan ziak thei a, a dangte pawh an lo awm mai thei a, amaherawhchu, Region lam ami kha chu kan hre vek thei ta lova, pali panga vel bak chu. Tuna an han zawhna tak mai kha Bill-ah hian tel tur awma ka lo ngaih avangin a tel si lova, ka chhang mai thei lo a ni. Hemi Statement of Objects and Reasons tih ah hian a tel miah lova, eng pawhnise, ka hnena lokal ve thin, Pu Sapnela te ang te hi chuan 'kan pension a tlem em maia' an ti a, mahse a pun tam theih lutuk theih lohna chhan chu tuna kan ngaihthlak tak ang khan kan pawisa harsatna avangte ni ber turah ka ngai mai a. In duhsak loh vang hi chu a ni miah lovanga, chuvang chuan kan han tih theih chinte ang hi chu pension hi ₹ 4500 a ni a, chu pawh chu ₹ 8400 bak hi pel lo se tih a ni mai a.

Finance lampangte nen uluk takin an indawr anga, kan pawisa dinhmun te atanga heng hi rawn chhutchhuah anih ka ringa. Tuna kan member zahawmtak Pu S.Hiato an a sawi atang khan ka hre chauh mah mah zawka ₹ 3000 emaw ni hi chu an la ve a, chuta tang chuan ₹ 4500 ah an chho ve dawn tihna a ni ang. Kan ngaihthlak tak ang khan a tam lo khawp mai a. Amaherawhchu, an mahni an lo thawh ve tawhna kan hriatpuina ang deuhah te pawh hian min ngaih sak mai loh chuan a pawisa han pek belh tur zawng hi chuan hetia Department-in Finance lamte rawna kan han tih bak chu kan tlinloh vang a ni ber e. Induhsak loh vang lam kha

nilovin. Tin, Family Pension hi kan ngaihthlak ang khan thil awm ngai lo te anih avangin tunah hian ₹ 2500 chu chu maximum-ah ₹ 3500 ni ve reuh se tih kha kan han inrawn tlan a, Department dangte nena inrawn tlan zel ngai a ni a, pawisa vawngtute kan nih loh avangin. Kha bak kha chu han sawifiah belh ngaihna ka hrelo tlat mai ka pu, ka lawm e.

**SPEAKER** : Aw le, a chiang tho mai. Hei kan zingah pawh pension huna dawng tur an awm a, Pu Zakhu te pawh kha an la ni a, Pu S. Vadyu te pawh kha an la ni vek a. Anni lam saw chu naupang te te an la ni vek a. MLA Pension nen dawng double tur hi an awm thluah thluah mai a, an thikawm viau a ni. Heti lamah erawh chuan Pu C.L.Ruala te ho kha an ni leh mai a, dawng double thei tur kha chu. Pu Pahlira te pawh dawng double thei an ni mai a. Pu Sapnela te erawh chu dawng double thei lo kha an ni a, engpawh nisela, khatiang khan tam chu an tam tawh lova, khang ang kha engti kawng maha itsik lam chi an ni lova, kan ngaithla tawha , awle passed a rawn dil maw kha! Passed han dil rawh, ila dil lo anih chu.

**Pu LALSAWTA, MINISTER** : Sawifiah tur chauha min tih avang khan ka hriat ang ang ka'n sawi fiah ngawt a, member zahawmtak tak ten thahnem ngai takin min han sawi puia ka lawm hle a, "The Mizoram (Pension for Members of the Defunct Mizo District and of the Defunct Pawi-Lakher Regional Council) (Amendment) Bill, 2011" hi he House zahawmtak hian lungrual taka min passed pui turin ka rawn ngen e. Ka lawm e.

**SPEAKER** : Awle Minister-in passed a rawn dil a, remti apiangin 'rem ti' ti rawh u le , rem tilo kan awm chuan 'remti lo' ti ula, Awle, "The Mizoram (Pension for Members of the Defunct Mizo District and of the Defunct Pawi- Lakher Regional Council) (Amendment) Bill,2011" chu House-in lungrual takin a passed ta a ni.

**Pu LALSAWTA MINISTER** : Ka lawm e, Pu Speaker.

**SPEAKER** : Nichinah khan chawhnu lam deuhah khan kan House Leader khan ka awm a nuam lo deuh hleka chawhnu lam hi chu min lo ngaithiam teh u a ti, hei chawhnu lam a absent a ni. Awle wawiina kan tih tur chu kan zo ta a, kan chawl tawh ang a, naktuk ni 8.7.2011 (Zirtawpni) zinglam dar 10:30-ah kan thukhawm leh dawn nia.

Sitting is adjourned at 3:45.